

## **Kho Kate-kate Asá yerewí** **Unindo Njunde Tangurí** **Mande Kembé**

Komo suki uni kato sokome ña **Grik** mandewore nakayáñaró, quko eneño owí kama nakayáñaró. Itaka iño-iño uni qambu ñande yeyotengo, Luk, ñu uni Miti Mande sokome ka nakayáñaró, ñundo sowo mande ñu sowe tero sokome ña nakayáñaró.

Itaka iño-iño uni kumimbo ñande yeyotengo, ko kumima naru 62AD nakayáñaró, peka. (Asa “62AD” murí muko ñandiro, ko Yesu nimí pisiyaró, yate kumima naru 62 ñunde rotaró. Nore kumima naru 2,000 ñunde rotoro yate itaka yoteto.) Njunde yeyotengo, dokoro nore ñande ye iñoyoteto, ko Polko 64AD ñuno **Rom** yendémo ñuno uri khumaró. Quko sokomeko mande weñako ñuno Polko **Rom** yendé parámi ñuno kusikusi yano watí yora. (*Asá yerewí Uni 28:30-31* weyo qembe.) Nuya kumima naru 64AD ñunoko **Rom** ñuno ya qambu qayi kini taró. Quko Lukiko o parámi tunoqaró ñuro kama yaró. Njundiro nange Luk koro sowo mandí ñuko 62AD kama rotaró, peka.

Miti Mande sokome nakayáñaró ñundiro nange, sokome ñako uni parámi ka, owí Teopilus, koro nakayáñaró. (*Asá yerewí Uni 1:1* weyo qembe.) Uni ñundo onono uni kato Luk samakanoní sokome irisa ñu nakayáñaró, peka.

Sokome korete quno ηuno Lukiko Yesuko o soso taró ηuro yaró. Sokome ηanoko enendo Yesu khumoro otoqoroqo **Yuqa Surumí** riní umburo **asá yerewí uni** ηuwore noko soso ηuno kho taró ηuro nakayáηaró. Asa Yerusalem ηuno hurí tero, yate-yate **Rom** ηuno uyaro engé parámi tunoqaró. Nñndiro nanqe Lukiko witú nereró, ko **miti mande** ηuko parámi tero noko soso weheηaró.

*Yesuko Yuqa Surumí umbuweya yaró*

<sup>1</sup> Teopilus, komo nondo sokomeko sowo mande ka nakayáηanowó. Sowu mande ηuko ηandiro: Yesuko hurí tero o qambu tero mande rondaqe unipare yunoro, <sup>2</sup> yate-yate Yuqa Surumíwore asá yerewí uni rokó yereró ηu khoye ηuro yimironí kini tiní Anutuko riní samboko oró. <sup>3</sup> Koretero ene kowe surumí tero khumaró. Tukú pitu ko yoraró ηu witú yerewero quro o qambu tero asá yerewí uni ηuno tunoqe yunaró. Kosa naru 40 qurowore ηuno Anutuko unipareyó wiri yereyote naruyó\* ηuro yimiraró. <sup>4</sup> Asa naru kano ene ηuya o kopo nanqurí quno ηuno ηande yimiraró, “Nondo komo Awandó o meté yunowero mande kusiyaró ηuro yimiranowó. Asa Yerusalem ma rotowero, o meté ηu sopoyi qembe. <sup>5</sup> Mande kusiyowí ηuko ηandiro, komo Jonko unipare yorerero sono re yunaró. Quko naru tukuni nanqe Anutuko Yuqa Surumí ye re yunoweya,” yaró.

---

\* **1:3:** “Anutuko unipareyó wiri yereyote naruyómo” ηuno ηonduku unipareko hamó Anutu kusunjoyómo yowanqo.

<sup>6</sup> Nunde ñuroko naru kano huruworu ñande oseyañgurí, “Uni Parámi, itaka naru ñanope keto Israel yori eneño wiri yerete uniyembo nançe pitu ko Israel unipare wiri yereweyape, ma kini?”

<sup>7</sup> Nunde yi ñande yimiraró, “Awa eneñombo nançe do naru o enesó-enesó qu tunoqeweya ñu rokóñaró. Ye naru ñuro okeyá ta injowero mepémo kini. <sup>8</sup> Quko imemoñgo Yuqa Surumímbo ma-hero ye sañayemo yotoro wimbu yunoweya. Nunde yunoní neneño muríne yesowowañgo. Yerusalem ñuno, ko Judia, Samaria mira soso ñuno, ko noko soso ñuno yesowowañgo.”

*Yesu samboko oró  
(Mak 16:19-20; Luk 24:50-53)*

<sup>9</sup> Asa Yesuko mande ñu yiní kini tiní toñetero geni riní koreko oní koporeko wisumuñaró.

<sup>10</sup> Oní wisumuñoní samboko watí toñeteyuriqo, waka ta nançe uni irisa kutage ñuno kañariyó. Uni irisa ñu tuwiyari sara qu. <sup>11</sup> Asa ñuno kañero ñande osese yiririyó, “Ye Galili uni, do karo kina kañero koreko toñeteyotenço? Yesu Anutuko riní yorotoro samboko ote ñundo imemoñgo ñundiro nançe pitu ko maheweya.”

<sup>12</sup> Nunde yiníqo, mira purí Oliv ñu rotoro pitu ko Yerusalem ñuno unñgurí. Mira purí ñu Yerusalem tañgímo ñuno, asa kheyómboro piruyó ñuko Sapat naruko khete uyarewero quro piruyó ñundiro.† <sup>13</sup> Asa ya quroko oro wasa koreko

---

† **1:12:** Piruyó ñuko kilomita kanata ñundiro. Hutuño mande ñuro ino-ino unindo ñande yañgurí, ko Sapat naruko ñuno Juda unipareto eneño miraye rotowero mepémo kini (Toñeñgurí 16:29 weyo). Asa ko kilomita kanata takaro khe ka howewero mepémo kini.

quño ηuno oro kundite sopoyango. Owéye muko ηandiro: Pita, Jon, Jems ko Andru; Filip ko Tomas; Bartolomeyu ko Matyu; Jems, ηuko Alipeus koro nañuní; ko Saimon, ηuko Selot koro wini qu ka;† ko Jutas, ηuko Jems koro nañuní. <sup>14</sup> Nju uni ηuya pare kumi ηuya soso kondé kañero newonde kanata na tero hariri teyango. Ko Yesu koro nimí Maria, ko Yesu koro kone-topé, ηu ηuya mahero eneya hariri teyango.

*Matiasko Jutas mepé raró*

<sup>15</sup> Nju naruko ηuno Pitako inondutu unipare keweroyemo kañero mande ka yaró. Qambuye ηuko unipare 120 ηundiro. <sup>16-17</sup> Asa ηande yaró, “Uni topo, Jutas ηuko noreya topo tero khonani ηuya taró. Quko enendo khe witú yiriní unindo Yesu towangurí. Nundiro nañge mande ka sokomeko yote ηu Yuqa Surumímbo komo Dewit mañgó moñgo yaró ηu hamó tunoqaró,” yaró.

<sup>18</sup> (Komo Jutasko o piyimi taró ηuro kimoyó ηu rero mira ka kimoro ηuno rokaráñoro nokono umbuní kowí kosañiní qahí soso huñero nokono umburó. <sup>19</sup> Uni soso Yerusalem yangurí qundo ηuro inangurí. Ko mira ηu eneño mandeko ηande ye nekanğurí, “Akelitama,” yangurí. Owé ηuro murí muko ηandiro, “Sitú Mira.”)

<sup>20</sup> Asa, Pitako ηande yaró, “Hamó, komo suki mande ηu Hariri Yambo koro sokomeko ηande nakayañangurí,

---

† **1:13:** “Selot koro wini” ηuko sañgiri uni. Enendo Rom unindoya kuma teyangurí, dokoro Rom koro wiri yerete uni parámimbo ene sopo yerewero quro piyiminangurí.

“Yayó ñu kina yoní,  
uni kato ñuno ma kunditewero.’

“Ko mande kañuya ñandiro,

“Uni meyowo kato khoyó ñu riní.’

<sup>21</sup> “Ñunde ñuro uni keweronanimo ka rokóñatoka yoní. Rokóñowato uni ñuko Uni Parámi Yesu noreya uya mahe teyara naruko ñuno yora, <sup>22</sup> asa Jonko sono re inaró qu nongo yate-yate Anutuko riní koreko oró, ñu naru soso ñuno norendo uni rokóñowato ñuko noreya yora. Eneya noreya Yesu uni tapu koñgo pitu ko otoqaró ñuro mande yesowoyowato.”

<sup>23</sup> Asa uni irisa rokó yerengurí. Kako Josep, ñuko Barisapas ma Jastus nekoyañgurí. Ko uni kako Matias. <sup>24</sup> Ñande hariri tañgurí, “Uni Parámi, keto uni soso newondeye gene inoyote. Keto uni irisa ña dani ka rokóñaró ñu nore witú nereka <sup>25</sup> Jutas koro mepé tero asáñowí unindoro kho ña teweya. Jutasko kho ñu huwóñoro eneño yendémo tonjeró.” <sup>26</sup> Ñunde yero mipu kumi ranjico, Matias koro mipu ñu tunoqaró. § Ñunde ñuro enendo asá yerewí uni<sup>\*\*</sup> 11 ñuya kañaró.

---

§ **1:26:** “mipu kumi ranjico” ñuro murí muko ñandiro peka: uni irisa quro owéyari mipu kanata-kanatako ñuno nakayáñoro kusíko yorotoro kusí ñu towo yukuwoní mipu ka roto umburó. Ñande ye inañgurí, ko Anutuko mipu ñu riní umbuweya. (Ino-ino Mande 16:33 weyo qembe.) **\*\* 1:26:** “asá yerewí uni” ñuko Yesuko rokó yerero asá yirini eneño khoyó tañgurí.

## 2

### *Yuqa Surumí saṅayemo umburó*

<sup>1</sup> Asa Pentikos o ne-ne\* naruko ṅuno unipare soso ṅundo ya kano huruwaṅgurí. <sup>2</sup> Waka ta niri ka matú parámi ṅunde qembe tero sambo koṅgo mahero ya kunditeyaṅgo ṅu maṅgoraró. <sup>3</sup> Maṅgoriní te suru qembe ka usoworo mipi ṅunde tero enemo-enemo saṅayemo kunditaṅgurí. <sup>4</sup> ṅunde ti Yuqa Surumí ṅundo unipare soso quroyemo uro wimbu yunoní kimani tero mipiyembo mande enesó-enesó yaṅgurí.

<sup>5</sup> ṅu naruko ṅuno Juda unipare mira enesó-enesó ṅu noṅgo mahero Yerusalem ṅuno yaṅgo. Juda unipare ṅu Anutu hamó potorku te inoyaṅgo. <sup>6</sup> Asa niri ṅu tunoqiní iṅoro mahe koporo mande enesó-enesówore yeyaṅgurí qu ṅu iṅaṅgurí. Yi iṅoro yukuwaṅgurí, dokoro eneṅo mandeye enesó-enesówore naṅge iṅaṅgurí. <sup>7</sup> Iṅoro parámi newondeye uroní ṅande yaṅgurí, “Unipare ṅuko Galili noṅgo qu naṅge, hamómbe? <sup>8</sup> Date koro nore mandenani enesó-enesówore ṅande ye iṅoteto? <sup>9</sup> Nore mira enesó-enesó rotoro ṅano mahetowó. Nore kumi Partia mira koṅgo qu, Mitia mira koṅgo qu, ko Elam mira koṅgo qu, ko kumi Mesopotemia mirako yoteṅgo qu; kumi Judia mira koṅgo qu ko Kapatasia mira koṅgo qu; kumi Pontus mira koṅgo qu ko Esia mira koṅgo qu; <sup>10</sup> kumi Pirikia mira koṅgo qu ko

---

\* **2:1:** “Pentikos o ne-ne” naru ṅuko Juda uniparetoro naruye parámi ka. Taka yereró quro o ne-ne ṅu kini tiníqo, yate kosa naru 50 ṅunde rotoro Pentikos tunoqaró.

Pambilia mira koŋgo qu; kumi Isip mira koŋgo qu ko Lipia mirako Sairin yendé kutaqemo ŋu noŋgo qu; kumi Rom yendé ŋu noŋgo <sup>11</sup> ŋuko Juda uniparetoya unipare meywombo Juda koro muríye howeyotenŋo qu; kumi Kiriti noko mosowí moŋgo qu ko Arepia mira koŋgo qu. Asa nore soso uni ŋu Anutuko kho wimbí ŋuro mandenaniwore yi inoteto.” <sup>12</sup> Nunde yero soso yukuwanŋurí, ko newondeye uroní epe mitomito taŋgurí, “O itaka tunoqete ŋuko, do murí ka?”

<sup>13</sup> Quko kumimbo huwó mande ŋande yaŋgurí, “Uni ŋu wain parámi nero kape-kape tetenŋo.”

### *Pitako mande yesowaró*

<sup>14</sup> Asa Pita otoqoro asá yerewí uni† 11 ŋuya kaŋero kondé nekoru unipare ŋande yimiraró, “Ye Juda uni, ko ye soso Yerusalem yotenŋo qu, o tunoqiní qenetenŋo ŋuro murí rondaqe yunowe teteno. Kusumbo re mandene inji. <sup>15</sup> Yembe uni ŋambe wain koro kape-kape tetenŋo yero, hamómbe? Nju kini. Itaka ita saraŋoní 9 kilok naŋge. <sup>16</sup> Kini, o itaka tunoqete ŋaro, komo ye-ye uni‡ ŋu Joel ŋundo ŋuro ŋande yaró,

<sup>17</sup> “Anutuko ŋande yete, “Naru wenja qunoko nenejo Yuqane windoroŋowe unipare soso saŋayemo uweya.

Nunde tewe yeŋo nambo-simóyembo Anutu koro mandí yesowowaŋgo,

---

† **2:14:** “asá yerewí uni” ŋuko Yesuko rokó yerero asá yiriní enejo khoyó taŋgurí. ‡ **2:16:** “ye-ye uni” ŋuko Anutuko mandí yunoní unipare yunajaŋgurí.

yeño simó keta-keta ñundoko o enesó-enesó qenewango,  
yeño uni pará-pará ñundoko o quko qenewango.

18 Nju naruko ñunoko no Yuqane windoronowe sunará simónemo, sunará parenemo ñuro sanayemo uweya.

Ñunde tewe Anutu koro mandí yesowowango.

19 Nondo o amana-mana siyowe koporéko tunoqewango.

Nokono amu nongo rokó kate-kate siyowe tunoqewango.

Sitú koya te qayote quya pukatutu parámi horé ñuya tunoqewango.

20 Uni Parámimboro naru parámi horé mu tukuni tiníqo

kosako huriri qembe tunoqeweya,  
ko komboko mandumi sitú qembe tunoqeweya.

21 Ko Uni Parámimbo unipare soso owí nekotenjo ñu rambaruru konjo yoreweya.” ’ §

22 “Ye Israel uni, mande ña injoyi. No Yesu, Nasaret nonjo uni ñuro yimiroteno. Ye ñande inotenjo, ko Anutuko uni ñuwore o wimbí moré enesó-enesó ye keweroyemo tero uni ñuro owí hokaró. 23 Komo suki Anutuko inoro mande kusiyaró, ko itaka uni ñu re yeño kandeyemo rotoní uni hutunjo mandenani kama howeyotenjo quro kandeyembo tipiririko\*\* uri khumaró. 24 Nunde quko Anutuko khumo koro wimbí ñu re rotoro

---

§ 2:21: Joel 2:28-32      \*\* 2:23: “tipiriri” ñunde quko wiri yerete uni kumimbo eneño uni sanjiríye yorero ñuno uroyi khumoyanjurí.



okokowoní pitu ko otoqaró. Dokoro uni tapu  
 ηundo ηu towowero mepémo kini. <sup>25</sup> Hamó,  
 Dewitko†† ηuya ηuro ηande yaró,

“Nondo Uni Parámi qenewe tanjenemo suki  
 yote.

Asa ko kandene kondésina yoníqo  
 oka kato yuku nerewero mepémo kini.

<sup>26</sup> Nu murí ηuro newondenembo meté yoweya,  
 maŋgonembo niŋgu-niŋgu mande yoweya.

Hamó, neneŋombo o meté horé ηuro  
 sopowano.

<sup>27</sup> Dokoro keto noroti uni khumowí ηuro  
 yendéyemo ηuno kama yowano,  
 keŋo uni meté horé ηu roti uni tapuko ηuno  
 kama puqeweya.

<sup>28</sup> Yoto-yoto koro khe qu witú nereró,  
 nori tonŋengemo niŋgu-niŋgu parámi tewano.’

<sup>29</sup> “Uni topo, no hamó iŋoro meté yimirowe  
 teteno, ko usinani Dewit ηundo mande  
 ηu nakayaŋaró, quko komo khumoní  
 re tapuŋaŋgurí. Ko eneŋo tapuyó nore  
 keweronanimo itaka yote. <sup>30</sup> Dewit ηuko ye-ye  
 uni ka tunoqaró. Nunde ηuroko komo Anutuko  
 mande hamó ka ηande miraró, ko imemoŋgo  
 Dewit koro sowe qu kato eneŋo yakutímo  
 kunditero unipare wiri yereweya. Asa mande ηu  
 iŋoro <sup>31</sup> Kristo ηundo‡‡ pitu ko otoqoweya ηuro

---

†† **2:25:** “Dewit” - komo suki Dewitko Israel uniparetoro wiri  
 yerete uni taró. Anutuko Dewit kondé iŋo inaró, ko yate-yate  
 Israel unipare ηuyako Dewit kondé iŋo inaŋgurí. ‡‡ **2:31:**  
 “Kristo” ηuko Anutuko rokóŋoní mahero wiri yerete uni parámi  
 horé tunoqaró ηu.

ñande yaró, ko Anutuko rotoní uni khumowí ñuro yendéyemo<sup>§§</sup> ñuno kama yoweya, kowí ñu kama puqeweya. <sup>32</sup> Yesu ñuko, Anutuko okokowoní otoqaró ñu. Nore ñano qundo soso qenero ñuro yesowoyoteto. <sup>33</sup> Komo Anutuko Yuqa Surumí nore nunoweya ñuro mande kusiyaró. Asa pitu ko otoqoníqo, Anutuko riní koreko horé oro Anutu koro kandí kondésina<sup>\*\*\*</sup> kunditero Awa kandí moñgo Yuqa ñu rero windoroñoní ye o enesó ña qenero injoyotenngo. <sup>34</sup> Qeni, Dewit enenjombo samboko kama oró. Quko ñande yaró,

“ Uni Parámimbo uni parámine ñande miraró,  
 “Kandene kondésina ñano kunditekata,  
<sup>35</sup> yate-yate sanjirínge yorewe  
 khenje kusunoyómo yowañgo.” ’

<sup>36</sup> “Ñunde ñuro ye Israel koro sowe qu,<sup>†††</sup> ye meté injoyi. Yendo Yesu rero tipiririko urañgurí ñuko, Anutuko riní Uni Parámi yote; ko Kristo<sup>†††</sup> ñunde yote.”

*Uni qambu qundo newondeye rohoréñañgurí*

<sup>37</sup> Pitako ñunde yini mande ñundo uniparetoro newondeye hamó sanjawoní unipareto Pita koya

---

**§§ 2:31:** “uni khumowí ñuro yendéye” ñuko Juda unipareto ñande ye inañgurí, ko uni soso khumoro yendé amuno ñuno uyañgurí. **\*\*\* 2:33:** Uni owé parámi moré ñu nanje wiri yerete uni kandí kondésina ñunde kunditañgurí. **††† 2:36:** “Israel koro sowe qu” ñuro murí muko ñandiro: unipare soso ñundo Yakop koro sowe qu, ko Yakop koro owí kako “Israel”. **††† 2:36:** “Kristo” ñuko Anutuko rokóñoní mahero wiri yerete uni parámi horé tunoqaró ñu.

uni asá yerewí unindoya ñande osese yereᅅgurí, “Uni topo, nore do ka tewato?”

<sup>38</sup> Pitako ñande yimiraró, “Ye kanata-kanata quhuríyembo ro newonde surumí teya quhurí ñu se rotoya Yesu Kristo§§§ owímo sono ri. Nunde tiqota Anutuko quhuríye se roto ro Yuqa Surumí rero yunoweya. <sup>39</sup> Mande kusiyaró ñu, Anutuko yeya, simóyemboya, unipare soso sewemo yotoro Uni Parámi ñu, Anutunani nekoyotenᅅo ñuya mande ñu kusiyaró.”

<sup>40</sup> Nunde yero Pitako oresaka mande kate-kate yero newondeye rukisoyoro ñande yaró, “Anutuko unipare itaka nokono ñano yotoro o pi-piyimi teyotenᅅo qu, ñu rambaruru yereweya. Ye rambaruru ñu takayi!” <sup>41</sup> Asa ko danimbo eneᅅo mandí ñu hamó ranᅅurí qu, sono re yunaᅅurí. Ko ñu naruko ñuno Anutuko inᅅondutu uni sowe tiní unipare 3,000 kaᅅuya inᅅondutuwoyaᅅurí. <sup>42</sup> Naru rokóᅅoro uni soso ñundo asá yerewí uni\* mandeye inᅅoyaᅅo, ko epe samaka-samaka teyaᅅo, bret romboᅅero o kopo neyaᅅo† ko hariri teyaᅅo.

### *Inᅅondutu unipareto newonde kanata taᅅurí*

---

§§§ **2:38:** “Yesu Kristo” - komo suki ye-ye unindo Anutuko uni ka rokóᅅoní mahero wiri yerete uni parámi horé tunoᅅeweya qu karo yaᅅurí. Juda unipareto uni maheweya ñu, “Kristo,” ma, “Mesaiya,” ye nekaᅅurí. Asa Yesu mahiní eneᅅo unipareyó, “Kristo Yesu,” ma, “Yesu Kristo,” nanᅅe ye nekaᅅurí. \* **2:42:** “asá yerewí uni” ñuko Yesuko rokó yerero asá yiriní eneᅅo khojó taᅅurí. † **2:42:** “bret romboᅅero o kopo neyaᅅo” ñuko Uni Parámimbo ro o ne-ne qu peka.

<sup>43</sup> Asa Anutuko asá yerewí uni kandeyemo o wimbí moré† gambu tiní unipare soso ηundo qenero ará parámi te inaηgurí. <sup>44</sup> Inηondutu unipare soso ηundo newonde kanata tero oye soso se kopoyaηgurí. <sup>45</sup> Onoηoye soso soweyoro wondo ηu uni o karo tukuni taηgurí ηu yunaηgurí. <sup>46</sup> Naru rokóηoro newonde kanata tero Ya Surumímo§ ηuno huruwoyaηgo, ko ya kano-kano bret romboηero newondeye meté tero niηguniηgu tero o kopo neyaηgo. <sup>47</sup> Naru rokóηoro Anutu owí hokoyi unipare soso meyowo ηundo eneηo metéηoyaηgurí. Kowe naru rokóηoro Anutuko unipare kumi yoriní inηondutu tero ηuno kopoyaηgurí.

### 3

#### *Pitako uni ka khí piyimi qu riní meté taró*

<sup>1</sup> Asa naru kano Pita koya Jon koya hariri tewero naruko ηuno, suwoya 3 kilok Ya Surumímo\* oriyó. <sup>2</sup> Ori kumimbo uni ka khí piyimi qu re koroworo ηuno uyareηgurí. Uni ηuko, nimímbo khí piyimi ηunde pisiyaró. Naru rokóηoro topé-topémbo Ya Surumí makoyómo owí muko Kekere Qu ηuno rotoyi kunditiní unipare Ya Surumímo oyiqo, wondo koro nekeyara. <sup>3</sup> Asa uni ηundo Pita koya Jon koya yiyoní Anutu

---

† **2:43:** “o wimbí moré” ηuko o enesó-enesó tunoqiní Anutu koro wimbí ηunde tunomo yoweya. § **2:46:** “Ya Surumí” ηuko Anutu koro ya qu, ηunoko Juda unipareto Anutu koya huruwowero quro hu-hariri teyaηgurí. \* **3:1:** “Ya Surumí” ηuko Anutu koro ya qu, ηunoko Juda unipareto Anutu koya huruwowero quro hu-hariri teyaηgurí.

koro Ya Surumímo ñuno owero tiri, o koro kira taró. <sup>4</sup> Pita koya Jon koya kondé qenero Pitako ñande miraró, “Ke tonjete nore niyo.” <sup>5</sup> Yiní o siyowero quro yero inoro ene tonjetaró.

<sup>6</sup> Asa Pitako ñande yaró, “No wondo silwape ma gol moré kini. Quko oka moré, ñu re kunowe teteno. Yesu Kristo,† Nasaret yendé monjo uni ñuro owímo ke kimiroteno, ootoqo kañe uyare.” <sup>7</sup> Yero kandí kondésina towo hoko wosaró. Wosoní waka ta potó soso kondérini ootoqaró. <sup>8</sup> Ootoqoro sore-sore tero irisa ñuya Ya Surumímo khete-khete oro sore-sore tero Anutu owí hokoyaró. <sup>9</sup> Unipare soso qeni ootoqo kañero khete-khetero Anutu owí hokoyoní qenero <sup>10</sup> ñande inañgurí, uni ñundo Ya Surumí makoyómo owí muko Kekere Qu ñuno kunditero wondo koro nekeyara ñuno qu. Njunde gene inoro o tunoqaró ñuro ino-inoye enesó-enesó taró.

### *Pitako Ya Surumímo ñuno mande yesowaró*

<sup>11</sup> Asa uni ñundo Pita koya Jon koya yondoworo pisi yirini unipare soso newondeye yukuwoní khenjoro mahero Ya Surumímboro‡ yokone ñu owí muko Solomon koro Yokoneyómo ñuno mahe kopañgurí. <sup>12</sup> Kopoyi Pitako yiyoro ñande osese yereró, “Ye Israel uni, ye do karo inondata

---

† **3:6:** “Yesu Kristo” - komo suki ye-ye unindo Anutuko uni ka rokónoni mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “Mesaiya,” ye nekañgurí. Asa Yesu mahini enejo unipareyó, “Kristo Yesu,” ma, “Yesu Kristo,” nanje ye nekañgurí. ‡ **3:11:** “Ya Surumí” ñuko Anutu koro ya qu, ñunoko Juda unipareto Anutu koya huruwowero quro hu-hariri teyañgurí.

parámi teyotengo? Do karo toŋetero nore niyotengo? Yembeka ŋande inoyotengo, nore irisa wimbunarimbope ma otetenari meté ŋundo uni ŋa riní meté tete, peka? Kini horé! <sup>13</sup> Abraham, Aisak, Yakop koro Anutuye, usisambananimboro Anutuye, ŋundo kho uniyó Yesu owí hokaró. Yendo kho uni ŋu rero uni saŋgirí kandeyemo rotanŋurí. Pailatko rotowero ŋuro ye inaró, guko yendo sunará simó ŋu huwóŋanŋurí. <sup>14</sup> Yendo uni roneneŋowí ŋu, uni meté horé ŋu huwóŋoro yuroní khumowero uni ka rewero quro Pailat kirayanŋurí. <sup>15</sup> Yendo uni ka nore soso yotoyoto yunaró ŋu uri khumaró, guko Anutuko uni tapu koŋgo okokowoní otoŋaró. Nore irisako ene otoŋaró ŋuro inoro mande yesowoyotero. <sup>16</sup> Uni ŋa ye ŋene inoyotengo, ŋundo Yesu owímo inondutu tiní owé ŋundo wimbu inaró. Ko Yesuko inondutu inaró ŋundo uni ŋa riní yeŋo toŋeyemo meté tete.

<sup>17</sup> “Asa, uni topo, no inoteno, yeya uni kembékembéye ŋuya kape-kape tero otete piyimi ŋu tanŋurí. <sup>18</sup> Komo Anutuko ye-ye uniŠ soso maŋgoyemo ŋande yesowaró, ko eneŋo Kristoyó\*\* quhurí korowoweya. Asa ko yendo otete tanŋurí, ŋuko mande ŋu riní hamó tunoŋaró. <sup>19</sup> Ŋunde ŋuro ye quhuriyembo newonde surumí teya quhurí ŋu se rotika Anutuko quhuriye sowoní. <sup>20</sup> Ŋunde tiŋo, Uni Parámimbo wimbu keta yunoro Kristo komo rokóŋaró ŋu, Yesu

---

Š 3:18: “ye-ye uni” ŋuko Anutuko mandí yunoní unipare yunanŋurí. \*\* 3:18: “Kristo” ŋuko Anutuko rokóŋoní mahero wiri yerete uni parámi horé tunoŋaró ŋu.

nanġe, asáñoní yeno mahiní. <sup>21</sup> Itakako samboko yotoro Anutuko o soso keta towoweya naruyó ñu sopoyote. Anutuko komo suki ye-ye uni meté horé ñuro mañgoyemo ñunde yaró. <sup>22</sup> Mosesko ñuro ñande yaró, ‘Uni Parámi ñu, Anutuyembo ye-ye uni ka neneño qembe ye keweroye moño riní otoqoweya. Mande soso yeyoweya ñu iño howeyuri qembe. <sup>23</sup> Ko dani kato eneño mandí kama iño howeyoweya qu, Anutuko eneño unipareyó keweroye moño howiní piyo teweya.’ ††

<sup>24</sup> “Ko ye-ye uni soso, asa Samuel koño yateyate, ñundo naru ñaro mande yesowañgurí. <sup>25</sup> Anutuko usisambayemboya mande kondé rero Abraham ñande miraró, ‘Keño soweke moño unipare soso nokono ñano qu puriño rewaño.’ †† Asa yeko ye-ye unindoya uni mande kondé rañgurí ñuya ñuro sowe qu. <sup>26</sup> Anutuko sunará simóño rokóño yeno koretero asáñoní ye puriño yunowero maheró. Ñunde yunoro yoriní newondeye rohoréñoní oteteye piyimi horé ñu rotowaño.”

## 4

### *Pita, Jon yorero kusi-kusi yano yorotañgurí*

<sup>1</sup> Asa Pita, Jon irisa ñundo mande yeyori o qa-qa unindoya\* Ya Surumíboro† sopo-sopo uni

---

†† **3:23:** Hutuño Mande 18:15, 18-19 †† **3:25:** Murí Tero 22:18 \* **4:1:** “o qa-qa uni” ñundo Ya Surumímo Anutu koro kho tero uniparetero quhuriye rotowero quro wondo yakutímo ñuno o qa-qa te inañgurí. † **4:1:** “Ya Surumí” ñuko Anutu koro ya qu, ñunoko Juda unipareto Anutu koya huruwowero quro hu-hariri teyañgurí.

ɲuya Sadyusi unindoya† ɲuno uyareɲgurí. <sup>2</sup> Uni ɲundo irisa ɲuro piyimiɲaɲgurí, dokoro enendo unipare mande rondaɲe yunoro, Yesu uni tapu koɲgo pitu ko otoɲaró ɲuro yariyó. <sup>3</sup> Asa suwo tini ɲuno uyaro irisa ɲu yondoworo kusi-kusi yano yorotaɲgurí. ɲuno yorika ita saraɲoníqota, ye iɲaɲgurí. <sup>4</sup> Quko unipare qambu mandeyari iɲoro iɲondutu taɲgurí. ɲunɲiro iɲondutu unipare qambuye ɲu sowe tero 5,000 kaɲuya taɲgurí.

*Uni pará-parámbo Pita, Jon mande kho yu-  
naɲgurí*

<sup>5</sup> Ita saraɲoníqo, o qa-qa unindoro tapá unindoya§ uni kembé-kembéboya hutuɲo mande ɲuro iɲo-iɲo unindoya\*\* Yerusalem ɲuno kopaɲgurí. <sup>6</sup> O qa-qa unindoro tapá uni Anas koya Kaiapas, Jon, Aleksanda ko tapá unindoro suwisawiyó kumi ɲuya ɲuno kopaɲgurí. <sup>7</sup> Asa Pita, Jon yorero keweroyemo yoroti kaɲiri ɲande osese yereɲgurí, “Yari wimbu da noɲgo rero ko danimboro owé ɲu rero o ɲu tari?”

<sup>8</sup> ɲunde yiɲo, Yuqa Surumímbo Pita quroko maɲgoriní ɲande yimiraró, “Ye uniparetoro uni kembé-kembéye qu, ko ye uni pará-pará, <sup>9</sup> yembeka nore irisako uni khí piyimi ka o meté te inaro meté tete ɲuro osese nerewero nore ɲano

---

† **4:1:** “Sadyusi uni” ɲuko unindoro huru-huru ka Israel mirako ɲuno yaɲgurí. Eneko wondo uni kumi owéye parámi tero unipare soso sopo yereyaɲgurí. § **4:5:** “o qa-qa unindoro tapá uni” ɲundo Ya Surumímo hu-hariri sopo ronda-ronda huru-huru owí muko, “Sanedrin,” ye nekoyaɲgurí ɲu sopoyaró. \*\* **4:5:** “hutuɲo mande ɲuro iɲo-iɲo uni” ɲundo Anutu koro mande ɲu unipare rondaɲe yunoyaɲgurí.



noroti kañetero, hamómbe? <sup>10</sup> Asa yeya Israel unipare soso ñuya ñande inoyi, Yesu Kristo,†† Nasaret yendé mongo uni ñuro owímo uni ña meté tero itaka ye tonjeyemo kañete. Yendo Yesu rero tipiririko‡‡ urañgurí, quko Anutuko uni tapu koñgo okokowoní otoqaró. <sup>11</sup> Eneko

“ wondo ñuko ya re-re unindo ñuro yañgurí, “Ñu piyimi.”

Quko ñundo ya koro wondo korete-korete qu tunoqete.’

<sup>12</sup> Uni meyowo kawore nore rambaruru kama takawato. Dokoro uni soso nokono yotengo quro owí kato nore rambaruru koñgo kama noreweya. Yesu koro owímo nanje.”

<sup>13</sup> Nñunde yini uni pará-parámbo ñande inañgurí, ko Yesu koya yariyó nanje, sokome yano oro ino-ino ñundiro kama rariyó. Quko irisa ñundo mande kondé yero sasaro kama tariyó. Nñunde ñuroko inondata parámi tañgurí.

<sup>14</sup> Ko uni khí piyimi ñu meté tero irisa ñuya kañañgurí. Nñunde ñuro uni pará-parámbo mandeyari topé tewero mepémo kini. <sup>15</sup> Asa irisa ñu yori huru-huru rotoro mirako uriqo, epe mito-mito tero ñande yañgurí, <sup>16</sup> “Norendo uni ñu do yerewato? Kho wimbí moré ka tari,

---

†† **4:10:** “Yesu Kristo” - komo suki ye-ye unindo Anutuko uni ka rokónoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “Mesaiya,” ye nekañgurí. Asa Yesu mahini enejo unipareyó, “Kristo Yesu,” ma, “Yesu Kristo,” nanje ye nekañgurí. ‡‡ **4:10:** “tipiriri” ñunde quko wiri yerete uni kumimbo enejo uni sañgiríye yorero ñuno uroyi khumoyañgurí.

ko unipare soso Yerusalem yotengo qu inango. Re tapunowero mepémo kini. <sup>17</sup> Quko mande nando unipareko wimbo uweya koro. Nunde njuro mande kondé eneya yatoqo, uni meyowo ka owé njuro ka kama yimirowari,” yanğurí.

<sup>18</sup> Asa neko yerero mande kondé nande yimiranğurí, “Yesu owímo mande kanata ka wati-watí ma yeyowero, ko owímo unipare kumi mande rondage ma yunowero.”

<sup>19</sup> Yi Pita koya Jon koya mandeye topé nande yariyó, “Nore irisa Anutu koro mande qu ro-toro yejo mande qu howewaro tiníqo, numbeka Anutu tonjimo ronenejowímbe ma kini? Yeñombo gene rondañi qembe. <sup>20</sup> Dokoro norendo o qenerowó ko injarowó njuro mondó ta yowero mepémo kini.”

<sup>21</sup> Nunde yiriqo, oresaka mande nançe yunoro yoroti yendémo uriyó. Uni pará-parámbo irisa nu quhurí yunowero kheyó seqanğurí, quko mepémo kini, dokoro uniparetoro soranğurí. Hamó, unipare soso o tariyó njuro inoro Anutu owí hokoyanğurí. <sup>22</sup> Dokoro uni nu o wimbí moréŞŞ ka towori meté taró njuko kumima naru 40 nunde rotaró.

### *Injondutu unipareto hariri ka tanğurí*

<sup>23</sup> Asa yendémo uro topo-topoyarimboya koporo mande o qa-qa unindoro tapá unindoya uni kembé-kembémboya yimiranğurí nu soso yariyó. <sup>24</sup> Topo-topoyarimbo manğoye koporo

---

ŞŞ 4:22: “o wimbí moré” njuko o enesó-enesó tunoqini Anutu koro wimbí nunde tunomo yoweya.

Anutu koya ñande hariri taṅgurí, “Uni Parámi, keto sambo, noko, windi, o soso ñuro quuroko yote qu, ñu yondowaró. <sup>25</sup> Komo Yuqa Surumímbo usinani Dewit,\*\*\* keño sunará simónge maṅgó moṅgo mande ka riní tunoqiní ñande yaró,

“ ‘Do karo uni wini meywombo newonde saṅgiri parámi teyaṅgurí?  
Do karo unipareto inondutu piyimi kina towoyaṅgurí?

<sup>26</sup> Noko soso koro wiri yerete unindo kañero, ko uni kembé-kembéye koporo, Uni Parámimboya eneño Kristoyómboya owéyari rato umbuweya, ye inoyaṅgurí.’

<sup>27</sup> “Hamó horé, Herot,††† Pontius Pailat, uni wini meyowo,††† Israel unipare, soso ñundo Yesu, keño sunará simónge rokóñaró, ñuro owí re umbuwerero quro yendé ñano kopañgurí. <sup>28</sup> Koporo o soso taṅgurí ñuko komo keto wimbukepoya ino-inokepoya o ñu tunoqeweya, yero rokóñaró. <sup>29</sup> Asa itaka, Uni Parámi, mandeye piyimi ñu inoya nore sunará simónge samaka nereka sasaro kama tero mandeke yesowoyowato. <sup>30</sup> Kandeke rero keño sunará simónge meté horé ñu, Yesu,

---

\*\*\* **4:25:** “Dewit” - komo suki Dewitko Israel uniparetoro wiri yerete uni taró. Anutuko Dewit kondé ino inaró, ko yate-yate Israel unipare ñuyako Dewit kondé ino inañgurí. ††† **4:27:** “Herot,” owí kako “Antipas,” ñundo Galili mira sopo yereró, quko enendo Rom koro wiri yerete uni parámi kasirayómo yora. Wiri yerete uni parámi ñundo owé parámi ka Herot inaró. Komo Herot koro iwímbo Juda unipare soso wiri yiriniqo, Mariako Yesu pisiyaró. ††† **4:27:** “uni wini meyowo” ñunde quko Juda unipare kini qu nanje.

ηuro owímo se khumo uni yori pitu ko meté tewango, ko o wimbí moré§§§ enesó-enesó tuno-qewango.”

<sup>31</sup> Hariri ηu ti kini tiníqo, ya ηuno kopangurí quno ηuno kunduru ranoní yukuwaró. Ko Yuqa Surumímbo eneno mangoriní sasaro kama tero Anutu koro mande qu yesowangurí.

*Injondutu unipareto ononoye koporo epe ino-ino tangurí*

<sup>32</sup> Injondutu unipare soso newonde kanata na, ino-ino kanata na tangurí. Uni kato ene oka qu genero ηande kama yaró, “O ηuko neneηo qu nanqe.” Kini, oye soso ηuko uni soso koro qu ηuya. <sup>33</sup> Ko asá yerewí uni\* ηundo Uni Parámi Yesu uni tapu konqo pitu ko otoqaró ηuro mande yesowoyango, ko mandeye muko wimbí parámi horé. Ko samaka-samaka tuwó ηu† parámi sanayemo ηuno yora. <sup>34</sup> Uni ka keweroyemo ηuno otoro kama tukuni teyara. Dokoro uni soso yaye, miraye soweyoro wondo ηu re mahero <sup>35</sup> asá yerewí uni kandeyemo ηuno roto yunangurí. Yunoyi rondanero uni otoro tukuni teyangurí qu yunoyango.

<sup>36</sup> Uni kako, owí Josep, ηuno yora. Asá yerewí unindo, “Barnabas,” ηunde ye nekanqurí. Owé

---

§§§ **4:30:** “o wimbí moré” ηuko o enesó-enesó tunoqiní Anutu koro wimbí ηunde tunomo yoweya. \* **4:33:** “asá yerewí uni” ηuko Yesuko rokó yerero asá yiriní eneηo khayó tangurí. † **4:33:** “samaka-samaka tuwó” ηuko Anutu eneηombo nore samaka yereyote. Kimoyó moré kini.

ɲuro murí muko ɲandiro, “Uni newondeye ruk-  
isoyote.” Ɗuko Liwai koro sowe qu ka,<sup>†</sup> ko  
nimímbo Saipras noko mosowímo ɲuno pisiyaró.  
<sup>37</sup> Asa enendo mirayó kawore soweyoro wondo  
ɲu rero mahero asá yerewí uni kandeyemo roto  
yunaró.

## 5

### *Ananias, Sapaira o kaná-kaná tariyó*

<sup>1</sup> Asa uni kako, owí Ananias, koya parí muko,  
owí Sapaira, ɲuno yariyó. Ananiaso mirayó ka-  
wore soweyoro <sup>2</sup> parímboya newonde kanata tero  
wondo kumi eneɲombo tapuɲoro kumi naɲge re  
mahero asá yerewí uni\* kandeyemo roto yunaró.

<sup>3</sup> Ɗunde roto yunoní Pitako ɲande yaró,  
“Ananias, ke date koro Monimbuko  
newondekemo maɲgoriní Yuqa Surumí kanáɲoro  
mira koro wondo qu kumi tapuɲote? <sup>4</sup> Komo,  
kama soweyaró quno, mira ɲuko keɲo qu  
naɲge, ko imemoɲgo soweyoro keɲombo naɲge  
wondo ɲu sopa, hamómbe? Date koro otete  
ɲu newondekemo iɲote? Keko uni ka kama  
kanáɲote. Kini, Anutu kanáɲote.”

<sup>5</sup> Yiníqo, Ananias mande ɲu iɲoro rokaráɲoro  
umburo kindo khumaró. Uni soso ene khumaró  
ɲuro piɲa mande iɲaɲguri qundo sasaro parámi

---

<sup>†</sup> **4:36:** “Liwai koro sowo qu ka” - Liwai ɲuko Yakop koro nanuní,  
asa ɲundiro Israel uniparetoro puko ka. Anutuko Liwai koya  
eneɲo sowe qu horé kho ka yunaró. Enendo Ya Surumímo ɲuno o  
soso roɲgaruwoyaɲguri. \* **5:2:** “asá yerewí uni” ɲuko Yesuko  
rokó yerero asá yiriní eneɲo khayó taɲguri.

tanğurí. <sup>6</sup> Ko uni keta qundo mahero ukúño rero tuwipo pokamoro re tapuñanğurí.

<sup>7</sup> Imemoñgo naru tukuni nanğe eneño parímbo kamí khumaró ñu kama iñoro maheró. <sup>8</sup> Mahiní Pitako ñande oseseyaró, “Ke yeka iñowe. Wondo ñu re mahiri, ñuko mirayari soweyariyó ñuro kimoyó sosope, ma kini?”

Yiní ñande yaró, “Iyo, ñuro kimoyó soso.”

<sup>9</sup> Yiní Pitako ñande miraró, “Date koro yarindo Uni Parámimboro Yuqa qu towonowero mande kusiyariyó ñu? Injo, uni kameñge re tapuñotenğo ñuno qu mahero makono kañeyotenğo. Ke ñuya kore uyarewanğo ñu.” <sup>10</sup> Yiní waka ta rokaráñoro Pita khímo umburo kindo khumaró. Khumoní simó keta qundo ya quroko oro pare ñu qeniço, ñu ñuya khumaró. Rero koroworo oro kamí roroworo tapuñanğurí. <sup>11</sup> Ko Anutu koro huru-huru soso† ñuya unipare soso o tunoqaró ñuro iñanğurí ñuya sasaro parámi tanğurí.

*Asá yerewí uni ñundo se khumo uni qambu yori meté tanğurí*

<sup>12</sup> Asa asá yerewí uni‡ ñundo o wimbí moré§ enesó-enesó unipare keweroyemo tanğurí. Ko iñondutu unipare soso ñundo newonde kanata tero Ya Surumí\*\* ñuno Solomon koro

---

† **5:11:** “Anutu koro huru-huru” ñuko unipare soso Yesu iñondutuwooro nokone-nokone ñuno huruwoyotenğo qu. ‡ **5:12:** “asá yerewí uni” ñuko Yesuko rokó yerero asá yiriní eneño khoyó tanğurí. § **5:12:** “o wimbí moré” ñuko o enesó-enesó tunoqini Anutu koro wimbí ñunde tunomo yoweya. \*\* **5:12:** “Ya Surumí” ñuko Anutu koro ya qu, ñunoko Juda unipareto Anutu koya huruwowero quro hu-hariri teyanğurí.

Ya Yokoneyómo ñuno kopoyañgurí. <sup>13</sup> Uni kumi eneya kopowero ñuro sasaro tañgurí, guko unipareto uni ñuno kopoyango ñuro metéyoyañgurí. <sup>14</sup> Nunde ñuroko uni qambu, pare qambu ñuya Uni Parámi inonduwoyañgurí. <sup>15</sup> Nunde tiqo, kumimbo se khumo uni yorero kheko yakutiyemo yorotoyi Pitako mahiníkata enejo yonoyómbo poka yereweya. <sup>16</sup> Topoyembo se khumo unindoya uni yuqa pusú†† soso qundo rambaruru yereyango ñu yorero yendé Yerusalem kutaqemo ñu nonjo mahiqo, yori meté tañgurí.

*Sambo simómbó asá yerewí uni kusi-kusi yano samaka yereró*

<sup>17</sup> Asa o qa-qa unindoro tapá unindoya‡‡ enejo topé-topé ñuya, asa Sadyusi koro huru-huru kumi,§§ ñundo soso otoqoro newonde tutu tero <sup>18</sup> asá yerewí uni\*\*\* ñu yondoworo yorero kusi-kusi yano yorotañgurí. <sup>19</sup> Guko suwonoko Uni Parámimboro sambo simó††† kato kusi-kusi ya ñuro makoyó kosoro yoriní mirako umbuñgurí.

---

†† **5:16:** “yuqa pusú” ñuko sambo simó ñunde qembe, guko Anutu koro sañgirí tero unipare rowore yereyotengo. ‡‡ **5:17:** “o qa-qa unindoro tapá uni” ñundo Ya Surumímo hu-hariri sopo ronda-ronda huru-huru owí muko, “Sanedrin,” ye nekoñyaurí ñu sopoyaró. §§ **5:17:** “Sadyusi uni” ñuko unindoro huru-huru ka Israel mirako ñuno yañgurí. Eneko wondo uni kumi owéye parámi tero unipare soso sopo yereyaurí. \*\*\* **5:18:** “asá yerewí uni” ñuko Yesuko rokó yerero asá yiriní enejo khayó tañgurí. ††† **5:19:** “sambo simó” ñuko komo suki-suki Anutuko unipare kama yoriní tunoqi sambo simó yondowaró. Ko itaka enejo sunará teyotengo.

Umburo ḡande yimiraró, <sup>20</sup> “Ye uya Ya Surumí<sup>†††</sup> ḡuro yendémo ḡuno kaḡeya unipare yoto-yoto keta ḡaro yimiri,” yaró.

<sup>21</sup> Ita saraḡoní Ya Surumí ḡuro yendémo ḡuno oro mande rondaḡe unipare yunaḡurí.

Ḥu naruko ḡuno naḡe o qa-qa unindoro tapá unindoya topé-topémboya mahero huru-huru parámi ḡu owí Sanedrin, Israel koro sopo-sopo uni soso ḡu, neko yereḡurí. Neko yiri huru-woro kumba tukuni kumi asá yerewí uni ḡu kusi-kusi ya nonḡo yore mahi, yero yaḡurí. <sup>22</sup> Quko uni ḡu kusi-kusi ya quroko ḡuno kama yiyaḡurí. Asa ko rohoréḡo mahero ḡande yimirḡurí, <sup>23</sup> “Nore kusi-kusi ya ḡuro makoyó qeneteto ḡu, mako ḡu towi kondériní unindo mako ḡu ene-ene sopo wuririyoyotenḡo. Quko mako kosoro uni ḡu quroko ḡuno kama yiyato.” <sup>24</sup> Ḥunde yiḡo, Ya Surumímboro sopo-sopo unindoya o qa-qa unindoro tapá uni ḡuya iḡondataḡero, “Do ka tunoḡeweya?” ye iḡaḡurí.

<sup>25</sup> Asa uni kato mahero ḡande yimiraró, “Iḡoyi, uni yore kusi-kusi yano yorotaḡo ḡuko itakako Ya Surumí ḡuro yendémo ḡuno kaḡero mande rondaḡe unipare yunoyotenḡo.” <sup>26</sup> Ḥunde ḡuro Ya Surumímboro sopo-sopo uni ḡuya kumba tukuni ḡuya uyaro asá yerewí uni ḡu yore mahēḡurí. Quko mondó ta yondowaḡurí, dokoro unipareto wondo raḡo nurowaḡo, ye soraḡurí.

---

††† **5:20:** “Ya Surumí” ḡuko Anutu koro ya qu, ḡunoko Juda unipareto Anutu koya huruwowero quro hu-hariri teyaḡurí.



*Asá yerewí unindo uni pará-pará toņeyemo mande yesowanğurí*

<sup>27</sup> Asa yore mahero Sanedrin§§§ huru-huru uni toņeyemo yorotaņğurí. Ko o qa-qa unindoro tapá uni ñundo ñande yimiraró, <sup>28</sup> “Norendo komo ñande yero kusi yeretowó, ye uni ñaro owímo mande rondaqe unipare ma yunowero. Quko watí-watí yeyuri mandeye ñundo Yerusalem maņğorete. Ko uni ñu khumaró ñuro potó ñu nore nunowero ñuro kondé ye inoyoteņgo.”

<sup>29</sup> Ko Pita koya asá yerewí uni kumimboya mande topé ñande yaņğurí, “Norendo Anutu koro mandí howeyoteto, unindoro mandeye kini. <sup>30</sup> Yendo Yesu rero te kano poroworo uri khumaró ñu. Ko usisambananimboro Anutu ñundo okokowoní pitu ko otoqaró. <sup>31</sup> Anutuko re oro kandí kondéwore rotoro owé parámi inoní noreño kembénani tunoqaró. Nunde tunoqero nore rambaruru koņgo noreweya. Nunde tunoqiní Israel unindo newonde rohoré tiqo, quhuriye se rotoweya. <sup>32</sup> Ko nore o soso ñu qenetowó ñuro mande yesowoyoteto. Ko Yuqa Surumí ñuya ñuro yesowoyote. Anutuko Yuqa ñu re unipare mandí howeyoteņgo ñu yunoyote.”

*Gamalielko uni pará-pará iņo-iņo mande yunaró*

---

§§§ 5:27: “Sanedrin” ñuko uni kembé-kembémboro huru-huru ka. Enendo Anutu koro hutuņo mande sopro Juda unipare sopo yereyaņgo.

<sup>33</sup> Nunde yi Sanedrin\* huru-huru uni nundo sangirí tero yurato khumowaŋgo yaŋgurí. <sup>34</sup> Quko Sanedrin koro uni ka, Farisi uni ka,† owí Gamaliel, nundo otoqo kaŋaró. Nuko hutuŋo mande nuro rondaqe-rondaqe uni, ko unipareto ará te inaŋgurí. Asa yimironí asá yerewí uni sonŋa wosoro mirako uŋgurí. <sup>35</sup> Uyiŋo, enendo huru-huru ŋu nande yimiraró, “Ye Israel uni, ye oka unino teweroqo meté inoroqota. <sup>36</sup> Qeni, sonŋa komo quno nuno uni ŋu owí Teutasko otoqoro yaró, ‘No owéne moré,’ yini uni 400 nunde uyare howeyaŋgo. Quko wiri yerete uni nundo uroní khumoní topé-topé sore wisikaraŋoro o taŋgurí ŋu roti kina umburó. <sup>37</sup> Tukú wiri yerete unindo unipare owéye nakayaŋowero mande kondé yaró quno, nuno uni ka owí Jutas, Galili nonŋo uni nundo otoqoro unipare kumi ino-inoye wosoní otoqoro kuma taŋgurí. Wiri yerete uni nundo uni nuya uroní khumaró, ko eneŋo uniyó soso wisikaraŋaŋgurí. <sup>38</sup> Asa itaka nondo ye yimiroteno, uni yondowotenŋo ŋu yorotika kina yowaŋgo. Dokoro o teyotenŋo nuko unindoro ino-ino ŋu nanŋe howeyote tiniŋo, kina umbuweya. <sup>39</sup> Quko o teyotenŋo nuko Anutu koro ino-ino howeyote tiniŋo, yendo kusi yerewero mepémo kini. Ye yate Anutu koya kuma tewaŋgo

---

\* **5:33:** “Sanedrin” nuko uni kembé-kembéboro huru-huru ka. Enendo Anutu koro hutuŋo mande sopro Juda unipare sopo yereyaŋgo. † **5:34:** “Farisi uni” nuko unindoro huru-huru ka Israel mirako nuno yaŋgurí. Enendo Anutu koro hutuŋo mande nuro okeyá ta howero uniparetoro tonjeyemo owéye parámi taŋgurí.

koro.” Nunde yiniqo, eneño mandí howewero mande kusiyangurí.

<sup>40</sup> Asa asá yerewí uni ñu neko yerero yore haususu yerero Yesu owímo mande ma yeyowero yero yoroti tonjengurí. <sup>41</sup> Nunde ñuro Sanedrin huru-huru ñu yorotoro mirako uro ñingu-ningu tanjurí. Dokoro Anutuko ino yunoro rokó yirini Yesu owí riqo, unindo eneño owéyari ri umburó. <sup>42</sup> Kowe naru rokóñoro yayemo ñuno ko Anutu koro Ya Surumímo† ñuno ene unipare mande rondaqe yunoro miti mande ñande yesowoyango, ko Kristo ñuko§ Yesu nanje.

## 6

*Samaka-samaka uni kande sanjyoro irisa qu rokó yerejgurí*

<sup>1</sup> Ñu naruko ñuno ino-ino rewero unipare qambu\* tunoqangurí. Nunde ti kumi Grik mande yeyango qundo kumi Hibu mande yeyango quya kisikasa mande ka yangurí. Nande yangurí, “Ko yendo o qoyembo unipare yunoyotengo quño ñuno noreño wapu ñundo o kama siyoyotengo,” yangurí. <sup>2</sup> Asa ko asá yerewí uni† 12 ñundo ino-ino rewero unipare soso neko yiri mahi ñande yimirangurí, “Asa nore Anutu koro mande

† **5:42:** “Ya Surumí” ñuko Anutu koro ya qu, ñunoko Juda unipareto Anutu koya huruwowero quro hu-hariri teyangurí.

§ **5:42:** “Kristo” ñuko Anutuko rokóñoní mahero wiri yerete uni parámi horé tunoqaró ñu. \* **6:1:** “ino-ino rewero unipare” ñunde qundo rondaqe-rondaqe unindoya uyaro ino-ino yunoyaró. † **6:2:** “asá yerewí uni” ñuko Yesuko rokó yerero asá yirini eneño khayó tanjurí.

yesowowero kho qu rotoro o qoyembo ron-  
danje yunowero kho tewato tiníqo, ñu meté kini.  
3 Nñunde ñuro, uni topo, uni kande sanjyoro irisa  
keweroyemo ñano qu seqa yiri, ñu owéye unipare  
toñeyemo meté yote qu, ko injo-injoye meté qu,  
ko Yuqako ñu quroko yote qu. Norendo kho ñu  
yunato sopowañgo. 4 Noreñombo kho tero hariri  
tero Anutu koro mande qu yesowoyowato.”

5 Nñunde yiqo, ñuro metéñangurí. Asa Stiven  
rokóñangurí, ñuko inñondutuyó kondé, ko Yuqa  
Surumímbo ñuno mañgoreyara. Uni meyo  
rokó yerengurí ñuko ñandiro: Filip, Prokorus,  
Nikanor, Timon, Paremenas ko Nikolas. Nikolas  
ñuko uni wini meyo<sup>†</sup> Antiok yendé moñgo  
qu, enendo Juda koro muriye howeyara. 6 Asa  
enendo uni ñu rokó yerero yoroti kañi asá yerewí  
uni ñundo hariri tero kandeye sañayemo rañgurí.

7 Ko Anutu koro mande qu usaye toñeró. Toñini  
unipare qambu Yerusalem ñuno injo-injo rewero  
unipare tunoqañgurí. Ko o qa-qa uni§ kumi ñuya  
inñondutuwoyañgurí.

### *Unindo Stiven mande kho inañgurí*

8 Asa Anutuko samaka-samaka tuwó koya  
wimbu koya Stiven inoní o wimbí moré\*\* enesó-  
enesó unipare keweroyemo teyaró. 9 Nñunde  
tiní uni kumimbo otoqoro Stiven koya mande

---

† 6:5: “uni wini meyo” ñunde quko Juda unipare kini qu  
nanje. § 6:7: “o qa-qa uni” ñundo Ya Surumímbo Anutu koro  
kho tero unipareto quhuriye rotowero quro wondo yakutímo  
ñuno o qa-qa te inañgurí. \*\* 6:8: “o wimbí moré” ñuko o  
enesó-enesó tunoqini Anutu koro wimbí ñunde tunomo yoweya.

saŋgirí teyaŋgo. Nju uni ŋuko Juda koro huru-huru ya†† kanata noŋgo qu, huru-huru ya ŋu ŋande ye nekoyaŋgurí, “Uni Oroso yereŋgurí qu,” ‡‡ yaŋgurí. Uni ŋuko Sairin yendé, Aleksandria yendé, Silisia mira ko Esia mira koŋgo qu. <sup>10</sup> Mande saŋgirí eneya yaŋgurí, quko mandeyembo eneŋo iŋo-iŋoyó ŋuya Yuqapo mandí yaró ŋuya takawero mepémo kini.

<sup>11</sup> Asa saŋgirí ŋundo kota-kota uni siyoro iŋo-iŋo ka yunoyi Stiven ŋuro ŋande yaŋgurí, “Enendo Moses§§ koya Anutu koya yesará yiriní nore iŋatowó.”

<sup>12</sup> Njundiro naŋge enendo uniparetoya uni kembé-kembéyemboya hutuŋo mande ŋuro iŋo-iŋo unindoya newondeye ri otoqoní Stiven kondé toworo Sanedrin\*\*\* huru-huruko ŋuno re maheŋgurí. <sup>13</sup> Re mahero kota-kota uni ŋu ŋuya yore yoroti kaŋero ŋande yaŋgurí, “Uni ŋando Ya Surumíboya††† hutuŋo mande‡‡‡ ŋuya huwó

---

†† **6:9:** “huru-huru ya” ŋuko Juda uniparetoro ya parámi mu. Sapat naruko ŋuno hu-hariri tero Anutu koro mandí weyoyi iŋoro hariri teyaŋgurí. ‡‡ **6:9:** “Uni Oroso yereŋgurí qu” - ŋuko Juda uni kumi komo meyowomboro kho simó teyate uni parámiyembo oroso yereŋgurí qu naŋge. §§ **6:11:** Komo suki “Mosesko” uni parámi tero Israel unipare sopo yereró. Anutuko Sainai purímo hutuŋo mande inoní mande ŋu rondaqe unipare yunaró. \*\*\* **6:12:** “Sanedrin” ŋuko uni kembé-kembémboro huru-huru ka. Enendo Anutu koro hutuŋo mande sopro Juda unipare sopo yereyaŋgo. ††† **6:13:** “Ya Surumí” ŋuko Anutu koro ya qu, ŋunoko Juda unipareto Anutu koya huruwowero quro hu-hariri teyaŋgurí. ‡‡‡ **6:13:** “hutuŋo mande” ŋuko komo suki Anutuko Sainai purímo Moses inoní Israel unipare yunaró. Mande ŋuko Juda uniparetoro yoto-yotoye soso sopoyaró.

mande suki-suki yeyote. <sup>14</sup> Yiní ñande ñatowó, ‘Yesu, Nasaret nonjo uni ñundo ya ñu rambaruru-woro Mosesko otete nunaró ñu rohoréñoweya.’ ”

<sup>15</sup> Uni soso huru-huruko ñuno kunditanğurí ñundo Stiven kondé tonjete qeneñğurí, ko umu-kembé qeneñğurí muko sambo simó§§§ umu-kembé qembe taró.

## 7

*Stivenko uni pará-pará tonjeyemo mande yesowaró*

<sup>1</sup> Asa o qa-qa unindoro tapá uni\* ñundo ñande yaró, “Mande yeteñgo ñumbe hamómbe ma kini?”

<sup>2</sup> Yiní Stivenko ñande yaró, “Uni topo, awa okite, injoyi. Komo Anutu meté horé ñundo Abrahamko tunoqaró. Ñu naruko ñuno Abraham Mesopotemia mirako ñuno watí yora, Haran yendémo kama oró. <sup>3</sup> Asa tunoqero ñande miraró, ‘Ke mirake, topoke yorotoro mira ka witú kerewano quno ñuno tonje qembe,’ yaró.

<sup>4</sup> “Asa ko Abraham Kalitia mira ñu rotoro Haran oró. Imemoñgo iwí khumoní Anutuko riní ña mira ye itaka ñano yoteñgo ñano maheró. <sup>5</sup> Riní mahero mira tomó karo simburí kama taró, ko simó moré kini taró. Quko Anutuko mande kusiyoero ñande miraró, ‘Keya sowekepoya mira parámi ñaro simburí tunoqewañgo.’ <sup>6</sup> Yero ñande

---

§§§ **6:15:** “sambo simó” ñuko komo suki-suki Anutuko unipare kama yoriní tunoqi sambo simó yondowaró. Ko itaka eneño sunará teyoteñgo. \* **7:1:** “o qa-qa unindoro tapá uni” ñundo

Ya Surumímo hu-hariri soporo ronda-ronda huru-huru owí muko, “Sanedrin,” ye nekoyañğurí ñu sopoyaró.

yaró, ‘Keño soweke uni meywomboro mirako yotoro kasirayemo yuriqo, kumima naru 400 quroko o piyimi te yunowaŋgo. <sup>7</sup> Imemoŋgo nondo unipareto o piyimi te yunowaŋgo ŋuro yore ronda yerewe sowekepo mira ŋu roto toŋero mahero ŋa mirako ŋano potoruku te nunowaŋgo.’ <sup>8</sup> Ko Anutuko Abraham koya mande kondé ka kusiyoro koweye toŋowero murí ŋu inaró. Nundi ro nange Abrahamko Aisak pisiyoro naru kande sanjyoro kapusa ŋunde kini tiní kowí toŋaró. Ko Aisakiko Yakop pisiyoro ŋunde nange te inaró, ko Yakopko usi-sinani 12 ŋu pisi yerero ŋunde nange te yunaró.

<sup>9</sup> “Asa usi-sí ŋundo koneye Josep koro newonde tutu tero towo roti uni kato kimoro Isip ŋuno uŋgurí. Quko Anutuko ŋuno eneya yotoro <sup>10</sup> quhurí soso korowaró ŋu noŋgo rero samakaŋaró. Samakaŋoro iŋo-iŋo meté horé inoní Isip koro wiri yerete uni, “Pero,” ye nekaŋgurí, ŋundo Josep ŋuro metéŋoro riní Isip mira koya wiri yerete unindoro suwisawiyó soso koro uni kembéye yora.

<sup>11</sup> “Imemoŋgo korare Isip koya Kenan mirako ŋuno tunoqini unipareto quhurí parámi korowaŋgurí, ko usi-sinani o newero qu seqaro qenewero mepémo kini. <sup>12</sup> Asa Yakopko o newero qu Isip ŋuno yote ŋu iŋoro naru koretero noreŋo usi-sinani asá yirini uŋgurí. <sup>13</sup> Ko naru irisayómo ŋuno uŋgurí quno ŋuno Josepko tunomo topé-topé yimiraró, ‘No Josep.’ Nunde ŋuro Peroko Josep koro wini quro iŋaró. <sup>14</sup> Asa Josepko iwí Yakop koya suwisawiyómboya soso ŋu ma-

hewango, yero neko yereró. Nuko unipare 75 nundiro. <sup>15</sup> Nekoní Yakop Isip nuno uró. Yate-yate eneya usi-sinani soso nuya khumiqo, <sup>16</sup> ukúye yorerero pitu Sekem yendémo ongurí. Komo Abrahamko wondo silwa kumi Hamor sowejó yunoro uni tapu ka Sekem nuno kimaró. Asa uni tapu nuno soso tapu yereṅgurí.

<sup>17</sup> “Komo Anutuko Isip rotowero naru karo mande kusiyoro Abraham miraró. Asa naru nu kutaqe mahiní usi-sinani qambu tero Isip mira nu maṅgoraṅgurí. <sup>18</sup> Ko yate-yate wiri yerete uni ka Isip nuno tunoqaró, nuko Josep nuro kama inaró. <sup>19</sup> Uni nundo usi-sinani kaná yerero o piyimi te yunoro kondé yimiraró, oṅa pisiyoteṅgo nu se sikuno yorotika khumoyi, yaró.

<sup>20</sup> “Nu naruko nuno Moses nimímbo pisiyaró, ko nuko simó meté horé. Iwí-nimímbo yano sopoyori kombo kapusa kini tiní <sup>21</sup> rero sikuno rotariyó. Nunde rotori Pero koro nambunímbo simó nu rero ene naṅuní qembe sopoyaró. <sup>22</sup> Sopoyoní Mosesko Isip koro ino-ino nu soso reyara. Ko nuko mande yewero wimbí rero kho kondé teyara.

<sup>23</sup> “Asa Mosesko kumima naruyó 40 nunde kini tiní eneṅo topé-topé Israel yiyowero inaró. <sup>24</sup> Uyariní Isip uni kato Israel uni ka roworemoyaró. Mosesko nu qenero Israel uni nu samakaṅoro Isip uni o piyimi te inoyaró nu uroní khumaró. <sup>25</sup> Nunde tero ṅande inaró, uni topémbo ṅande inoyi tondaṅeweya, ‘Anutuko Moses kandímbo nore rambaruru koṅgo yoreweya.’ Nunde inaró, quko topé-topémbo kama inoyi tondaṅaró. <sup>26</sup> Asa ita saraṅoníqo, uni



topé irisa kuma tariyó ñu yiyoro mepa mande ñande yaró, ‘Yarikañge ñunde ma tewero. Do karo yariñombo nañge roworemoyotiri?’

<sup>27</sup> “Uni ñu topé roworemoyaró ñundo Moses pitoro ñande yaró, ‘Ke dando koriní nore wiri nerero ronda nerewero tete?’ <sup>28</sup> Keto suwo Isip uni ñu uri khuma ñunde nañge nombe nurowero tete?’ <sup>29</sup> Ñunde yini Moses sore toñero mira meyowo, Mitian mirako, ñuno kunditero, yate naño-simó irisa pisi yereró.

<sup>30</sup> “Asa imemongo kumima naru 40 ñunde kini tini, sambo simó† kato mira wimbímo Sainai purí kutaqemo ñuno te kunzi qayara quno ñuno eneno tunoqaró. <sup>31</sup> Tunoqini Mosesko inondata parámi tero qenewero woso uyaro Uni Parámimboro mañgó inoni ñande yaró, <sup>32</sup> ‘No keño usingeporo Anutuye, asa Abraham, Aisak, Yakop koro Anutuye,’ yaró. Ñunde yini Moses inoro yukuworo qenewero sasaro taró.

<sup>33</sup> “Asa Uni Parámimbo ñande miraró, ‘Khe punu-punu khangemo ñu se roto. Ke mira ñano kañeyote ñako surumí. <sup>34</sup> No uniparene Isip yotengo ñu quhurí korowoyotengo ñu hamó yiyoyoteno. No tendoye inoyoteno, ko itaka oroso yerewero koro umbuteno. Asa otoqoka koreweka Isip u.’

<sup>35</sup> “Ñu Moses ñuko, komo unindo huwóñoro ñande yañgurí, ‘Ke dando koriní nore wiri nerero ronda nerewero tete?’ Asa uni ñu nañge,

---

† **7:30:** “sambo simó” ñuko komo suki-suki Anutuko unipare kama yorini tunoqi sambo simó yondowaró. Ko itaka enejo sunará teyotengo.

sambo simó te kunziko tunoqaró quno ηuno Anutuko asáñoní wiri yerete uni tero unipare kimo yerewero uni† tunoqaró. <sup>36</sup> Enendo unipare yore oro o wimbí moré§ enesó-enesó Isip ηuno taró, ko windi mandumimo taró, ko mira wimbímo kumima naru 40 quroko ηunde taró.

<sup>37</sup> “Nju Moses ηundo Israel unipare ηande yimiraró, ‘Anutuko ye keweroye moŋgo ka riní ye-ye uni ka no qembe tunoqeweya.’ <sup>38</sup> Enendo uniparetoro huru-huru keweroko mira wimbímo yora, ko sambo simó Sainai mira purímo miraró koya noreño usi-sinanimboya kewero uni tunoqaró. Enendo yoto-yoto koro mande qu ηu rero nore nunaró.

<sup>39</sup> “Quko usi-sinani muko mandí iŋowero piyimiŋgurí. Kini, ηunde pitoro newondeye rohoréŋoro Isip koro qene nuŋgu tero <sup>40</sup> Aron ηande miranŋurí, ‘Keto noreño anutunani kumi yondowoka korete uyari yohowewato. Dokoro Moses ηando nore Isip noŋgo nore ηano maheró, ηu dana u, nore kama iŋoteto,’ yanŋurí. <sup>41</sup> Nju naruko ηuno makao simó kapí-kapí ka toworo anutu kota-kota koro o qa-qa tero oka towanŋurí ηuro niŋgu-niŋgu tero hoho teyanŋo. <sup>42</sup> Nunde tiŋo, Anutuko huwó yiriní o kondé kumi samboko yote ηuro potorku te yunanŋurí. Kako komo suki ye-ye unindoro sokomeko o ηuro mande ka ηande nakayánŋurí,

---

† **7:35:** “kimo yerewero” ηuro murí muko ηandiro: unipareto o piyimi kusunjoyómo kusiyowí yoteŋgo. Njundiro nanŋe Anutuko kimo tero yoriní kina yowanŋo. § **7:36:** “o wimbí moré” ηuko o enesó-enesó tunoqiní Anutu koro wimbí ηunde tunomo yoweya.

“Ye Israel koro wini qu,  
komo ye kumima naru 40 ñunde mira  
wimbímo ñuno yotoro  
o qa-qa enesó-enesó no kama te nunangurí,  
hamómbe?

<sup>43</sup> Kini, ye Molok koro tuwi yamaru ñu re hokoro  
yeño anutuye Repan koro tutu ñuya re  
hokangurí.

Ñu kapo-kapo towangurí ñu ye potoruku te in-  
oyangurí.

Asa ko nondo ye yohowewe Bapilon amuno  
uwanço.’

<sup>44</sup> “Asa usi-sinanimbo Anutuko hutunço mande  
yunaró ñuro tuwi yamaru ka rangurí. Anutuko ya  
ñuro kapo-kapo Moses witúnjoro, ‘Ñandiro nange  
re qembe,’ ye mironí ñunde tangurí. <sup>45</sup> Ko yate-  
yate Anutuko mira ñaro simburí enesó-enesó ñu  
yohowiní usisambananimboya Josua koya tuwi  
yamaru ñu re mahangurí. Ñano yuri, yate-yate  
Dewit\*\* tunoqaró. <sup>46</sup> Tunoqiní Anutuko ñuro  
metéjoní Dewitko Yakop†† koro Anutu quro ya  
hamó ka rewero hariri taró. <sup>47</sup> Quko Solomonko  
ya ñu raró.

<sup>48</sup> “Ñunde raró, quko Anutu Koreko Horé yote  
ñundo uni ya reyotenço quno ñuno kama yote.  
Hamó, ye-ye uni‡‡ kato ñande yaró,

<sup>49</sup> “Uni Parámimbo ñande yete,

---

\*\* **7:45:** “Dewit” - komo suki Dewitko Israel uniparetoro wiri  
yerete uni taró. Anutuko Dewit kondé inço inaró, ko yate-yate  
Israel unipare ñuyako Dewit kondé inço inangurí. †† **7:46:**  
“Yakop” ñuko Juda uniparetoro pukoye, owí kako “Israel”.

‡‡ **7:48:** “ye-ye uni” ñuko Anutuko mandí yunoní unipare  
yunangurí.

‘Sambo nuko neneño yakutí kunditewero qu ko noko nuko khene re nuno kheteyoteno.

Do ya kiraró ka neneño rewanjo,  
ko dano kunditero imaqewano?

50 Neneño kandenembo o soso towanowó,  
hamómbe?’ ” §§

51 Asa nunde yero Stivenko nande yaró, “Yeko mande wenda-wenda uni. Yeño newondeye, kusumboye muko kape uni nunde qembe.\*\*\* Ye naru rokóñoro usisambaye nunde qembe tero Yuqa Surumímboya kuma teyotenjo. 52 Do ye-ye uni ka yora, asa usisambayembo o piyimi kama te yunañgurí? Ko ye-ye uni kato uni roneneñowí maheweya nuro yesowañgurí, nu nuya usisambato yuri khumanñgurí. Ko itaka yendo uni roneneñowí nu turiri re inoyi uri kumaró. 53 Yeko Anutu koro hutunjo mandeyó††† sambo simó kandeye monjo ranñgurí, quko ye nu kama howeyotenjo.”

### *Wondopo Stiven urañgurí*

54 Asa uni pará-parámbo mande soso nu inoro sanñgirí parámi tero Stiven genero metoye kindotañgurí. 55 Quko Yuqa Surumímbo Stiven quroko mañgoriní, sambo sañano kondé toñetero Anutu koro sine parámi genero, Yesu nuya Anutu koro kandí kondésina kañeyoní genero 56 nande yaró,

---

§§ 7:50: Aisaia 66:1-2 \*\*\* 7:51: “kape uni” nuko Israel koro Anutuye nu kama ino howeyotenjo. ††† 7:53: “hutunjo mande” nuko komo suki Anutuko Sainai purímo Moses inoní Israel unipare yunaró. Mande nuko Juda uniparetoro yoto-yotoye soso sopoyaró.

“Qeni! Sambo kosoní Unindoro Nañuní Anutu koro kandí kondésina kañiní qeneteno.”

<sup>57</sup> Nñunde yiniqo, kondé piyimi nekoro kusumboye wisumunoro otoqoro Stivenko kopo khengeñoro <sup>58</sup> toworo yendé hongo andusina roti umbuní wondo raño utoyanngo. Ko uni ene o piyimi taró ñuro yesowanğurí ñundo kowe punu-punu piruye<sup>†††</sup> se rotoro se simó keta, owí Sol, ñuro khímo rañğurí.

<sup>59</sup> Wondopo utoyuriqo, Stiven ñande hariri taró, “Uni Parámi Yesu, yuqane re!” <sup>60</sup> Ko potorku rero kondé ñande nekaró, “Uni Parámi, keto quhurí ñaro topé ma te yunowero.” Nñunde yero ete khumaró.

## 8

<sup>1</sup> Ko Stiven uri khumaró quño ñuno Solko qenero ñuro metéñoyaró.

*Anutu koro huru-huru ñundo quhurí koroworo wisikarañğurí*

Ñu naruko ñuno Yerusalem ñuno unindo sanğirí tero hurí rero inğondutu koro huru-huru ñu o pi-piyimi te yunoyanngo. Asa ko soso sorero Judia mirako, Samaria mirako ñuno wisikarañğurí. Asá yerewí uni ñundo nañge Yerusalem ñuno yañğurí.

<sup>2</sup> Uni kumi Anutu koro murí howeyanngo ñu Stiven re tapunoro tendo parámi tañğurí. <sup>3</sup> Quko Solko inğondutu koro huru-huru ñu rambaruru yereyara. Enendo yayemo oro uni ñuya pare ñuya yowosoro uro kusi-kusi yano yorotaró.

---

<sup>†††</sup> **7:58:** “kowe punu-punu piru” ñunde qu unipareto kowe punu-punuye meywowo wehenoyanğurí.

*Filipko Samaria mirako ñuno mande yesowaró*

<sup>4</sup> Asa unipare ñu sorero wisikaraño uyaro yendé enemo-enemo tojero miti mande\* yesowanğurí. <sup>5</sup> Filipko Samaria mirako† ñuno yendé kano uro ñu Kristo ñuro‡ yesoworo yimiraró. <sup>6</sup> Yimitoro o wimbí moré§ tiní unipare qambu qundo kondé tojetero mandí yaró ñuro kusumbo rağurí. <sup>7</sup> Dokoro enendo yuqa pusú\*\* qambu uni quroyemo yağurí ñu yohowiní kondé kiwero yorotoro tojengurí. Ko uni qambu wimbuye khumaró, ko kheye piyimi mu, ñu yoriní meté tağurí. <sup>8</sup> Njunde ñuro yendémo ñuno niñgu-niñgu parámi tağurí.

*Saimon, ñu o wimbí moré piyimi mu teyara uni ñuro sowo mande qu*

<sup>9</sup> Uni ka ñu yendémo ñuno yaró, owí Saimon. Enendo o wimbí moré piyimi kumi teyoní Samaria unipareto qenero newondeye uroní niñgu-niñgu teyağurí. Ko eneño owí hokoyağurí. <sup>10</sup> Unipare owéye moré mu ko owéye moré kini qu ñu soso mandí inoro ñande

---

\* **8:4:** “miti mande” ñuko Anutuko Kristo asájoní khumoro quhurínanimboro kimo tiní Anutu koya newonde kanata tewero ñuro mande meté mu nañge. † **8:5:** “Samaria mira” ñuko Judia mira koya Galili mira koya keweroyarimo yora. Komo suki wini kato mira meyowo moñgo mahero ñuno kunditeyağurí. Narune-narune Samaria koya Juda keweroyemo sağgirí tağurí. ‡ **8:5:** “Kristo” ñuko Yesu nañge, asa Anutuko rokójoní mahero wiri yerete uni parámi horé tunoqaró ñu. § **8:6:** “o wimbí moré” ñuko o enesó-enesó tunoqiní Anutu koro wimbí ñunde tunomo yoweya. \*\* **8:7:** “yuqa pusú” ñuko sambo simó ñunde qembe, quko Anutu koro sağgirí tero unipare rowore yereyotenngo.

yaŋgurí, “Uni ŋako Anutu koro wimbí parámi qu reyote.” <sup>11</sup> Nunde yaŋgurí, dokoro naru piru ŋundiŋo o wimbí moré ŋu teyoní newondeye uraró. <sup>12</sup> Quko Filipko Anutuko unipareyó wiri yereyote naruyó†† ko Yesu Kristo owí ŋuro miti mande qu yesowaró quno ŋuno uni ŋuya pare ŋuya inondutu tero sono raŋgurí. <sup>13</sup> Ko Saimon ŋuya inondutu tero sono raró. Enendo Filip koya uyaro Filipko o wimbí moré parámi teyaró qu qenero newondí uroní niŋgu-niŋgu taró.

<sup>14</sup> Asá yerewí uni‡‡ Yerusalem ŋuno yotero mande piŋa ŋande inŋgurí, asa Samaria uni Anutu koro mande qu raŋgurí. Asa ŋunde inoro Pita koya Jon koya asá yiri eneno uriyó. <sup>15</sup> Uro Yuqa Surumí saŋayemo umbuweya ŋuro hariri tariyó. <sup>16</sup> Dokoro Uni Parámi Yesu owímo sono raŋgurí naŋge, Yuqa ŋundo keweroyemo ka saŋano kama umburó. <sup>17</sup> Asa kandeyari saŋayemo riri, Yuqa raŋgurí.

<sup>18</sup> Asa Saimonko asá yerewí uni irisa ŋu yiyoní kandeyari unipare saŋayemo riri Yuqa raŋgurí. Nunde ŋuro wondo yunowero tero ŋande yaró, <sup>19</sup> “Yarindo wimbu ŋu ka re no ŋuya nunorika no kandene rero uni ka saŋano rewano ŋuko Yuqa reweya.”

<sup>20</sup> Yiní Pitako ŋande miraró, “Ke Anutu koro puriŋo kimowero quro inote! Nunde ŋuro wondoke muko keŋomboya piyo tewari!” <sup>21</sup> Keto

---

†† **8:12:** “Anutuko unipareyó wiri yereyote naruyómo” ŋuno inondutu unipareko hamó Anutu kusunoyómo yowaŋgo.

‡‡ **8:14:** “asá yerewí uni” ŋuko Yesuko rokó yerero asá yiriní eneŋo khojó taŋgurí.

mande yesowowero kho qu tewero mepémo kini, dokoro Anutu tojímo newondeke muko ronenejowí kini. <sup>22</sup> Njunde njuroko oteteke piyimi njuro surumí tero newonde rohoré teya Uni Parámiwore hariri teka newondekemo o piyimi injoyote njuro quhurí ñu re rotoní. <sup>23</sup> Dokoro no ke kiyo injoteno, ko keño newondeke piyo tiní quhurímbo kondé kusi kereyote.”

<sup>24</sup> Njunde yiniqo, Saimonko mande topé ñande yaró, “Yari Uni Parámiwore hariri tirika no samaka niriní o piyimi njuro yitiri njuko nono kama tunoqiní,” yaró.

<sup>25</sup> Asa Yesu njuro yero Uni Parámimboro mande qu yesowori kini tiní pitu ko Yerusalem oro yendéne-yendéne Samaria khewore miti mande§§ yesoworo oriyó.

### *Filipko Itiopia unino miti mande yesowaró*

<sup>26</sup> Asa Uni Parámimboro sambo simómbo\*\*\* Filip ñande miraró, “Otoqoya khe Yerusalem ro-roto Gasa yendémo njuno uyote njuwore u.” Khe njuko mira wimbíwore uyote. <sup>27</sup> Asa yini Filip otoqoro tojeró. Kheko njuno Itiopia mira koro uni ka qeneró. Njuko Itiopia koro wiri yerete pare, Kandake,††† njuro kho uniyó ka. Enendo

---

§§ 8:25: “miti mande” njuko Anutuko Kristo asáñoní khumoro quhurínanimboro kimo tiní Anutu koya newonde kanata tewero njuro mande meté mu ñange. \*\*\* 8:26: “sambo simó” njuko komo suki-suki Anutuko unipare kama yoriní tunoqi sambo simó yondowaró. Ko itaka enejo sunará teyotengo. ††† 8:27: “Kandake” njuko Itiopia mira koro wiri yerete pare soso quro owé ka.



onoṅoyó soso sopoyaró. Komo potoruku te inowero quro Yerusalem oní <sup>28</sup> kini tiní rohoréṅoro uyaró. Uyaró karis saṅano kunditero ye-ye uni<sup>†††</sup> Aisaia koro sokome qu weyaró. <sup>29</sup> Asa Yuṅako Filip miraró, “Uyareya karis ṅuro taṅgímo u.”

<sup>30</sup> Nunde yini khenṅeṅoro uyarini uni ṅundo ye-ye unindoro sokome qu weyoni inaró. Filipko yaró, “Kepe mande ṅuro muri ṅumbe inotepe ma kini?”

<sup>31</sup> Yini ṅande yaró, “Uni kato no kama witu nereweya tiniṅo, ṅu date inowano?” yero ṅande miraró, “Are noya kundite.”

<sup>32</sup> Mande sokome quroko qu weyaró ṅuko ṅandiro,

“Sipsip urowero ṅunde qembe,  
sipsip simó huí toṅowero qembe,  
enendo mondó ta naṅge yora.

<sup>33</sup> Unindo ri umbuni muri piyimiwore ron-  
daṅṅurí.  
Danimbo eneṅo soweýómboro yeweya?  
Dokoro noko noṅgo yoto-yotoyó re  
rotaṅurí.”

<sup>34</sup> Sopo-sopo uni ṅundo Filip ṅande miraró, “Meté, yeka inowe. Ye-ye uni ṅundo dani karo mande ṅa yaró? ṅumbe eneṅomboro yarómbe ma uni meýowomboro yaró?” <sup>35</sup> Yiniṅo, Filipko hurí

---

††† **8:28:** “ye-ye uni” ṅuko Anutuko mandí yunoni unipare yunangurí.

rero ñu mande ñuro murí yero Yesu koro miti mande§§§ ñu yesowaró.

<sup>36</sup> Asa khe ñuno uyareyate sopo-sopo uni ñundo sono ka genero ñande yaró, “Qeno, sono ña. Do kato kusi niriní no sono kama rewano?” <sup>37</sup> (-)\*

<sup>38</sup> Asa, yini karis kañini Filip koya sopo-sopo uni ñuya sonono uro Filipko uni ñu sono re inaró.

<sup>39</sup> Sono roto arini waka ta Uni Parámimboro Yuqa qundo Filip rini toñeró. Toñini sopo-sopo uni ñu pitu ko kama generó. Ko niñgu-niñgu tero khe ñu howe uró. <sup>40</sup> Quko Filip Asotus yendemo ñuno tunoqaró. Ko yendé enemo-enemo uro miti mande yesowoyara, yate Sisaria yendemo ñuno uró.

## 9

### *Sol newonde rohoré taró*

<sup>1</sup> Asa Solko Uni Parámimboro iño-iño rewero uni\* yuroweka khumoyi yeyara. Ñunde tero

---

§§§ **8:35:** “miti mande” ñuko Anutuko Kristo asañoni khumoro quhurinanimboro kimo tini Anutu koya newonde kanata tewero ñuro mande meté mu nanje. \* **8:37:** Komo suki Lukiko

mande soso ña nakayañaró, ko imemonjo uni kato mande kañuya nakayañoro sowe taró. Kowe sokome kumimboko mande ñu wini 37 rokóñoyotenjo. Mande ñuko ñandiro: Yini Filipko ñande yaró, “Kepe newondekepo soso iñondutu tiniqo, sono meté ñundiro reweya,” yaró. Yini sopo-sopo uni ñundo mande topé ñande yaró, “No ñande iñondutu teyoteno, ko Yesu Kristo ñuko Anutu koro Nañuni,” yaró. \* **9:1:** “iño-iño rewero uni” ñunde qundo rondage-rondage unindoya uyaro iño-iño yunoyaró.

enendo o qa-qa unindoro tapá unin<sup>†</sup> uyaro<sup>2</sup> sokome karo kirayaró. Juda unindo Damaskus yendé parámimo ñuno sokome ñu qenero wimbu Sol inoyi unindoya paretoya Khe ñu<sup>‡</sup> howeyango ñu kondé yondoworo se Yerusalem owango. <sup>3</sup>Asa sokome ñu rero uyarini Damaskus kutaqemo ñuno hiyó kondé ka sambo konjo eneno ñuno umburó. <sup>4</sup>Umbuní Sol kina nokono umbu ranoro mango ka inoní ñande yaró, “Sol, Sol, do karo ke no rowore nereyote?”

<sup>5</sup> Ko Solko yaró, “Uni parámi, ke dani?”

Yini ñande yaró, “No Yesu. Ke no rowore nereyote. <sup>6</sup> Quko otoqoya yendé quoko oyo. Imemongoko uni kato ke o teweya ñuro kimiroweya.”

<sup>7</sup> Uni Sol koya uyarengurí ñuno qu yukuworo mande yewero rukusuwangurí. Mande ñu inangurí, quko uni ka kama qenengurí. <sup>8</sup> Asa Sol otoqo tonjetaró, quko toní huriri taró. Nunde tini kandímo toworo Damaskus yendémo ongurí. <sup>9</sup> Kosa naru kapusa ñunde toní huriri tini o, sono kama neyara.

<sup>10</sup> Ino-ino rewero uni ka Damaskus ñuno yora, owí muko Ananias. Asa Uni Parámimbo quko owí nekoró ñande yaró, “Ananias.”

Yini ñande yaró, “Uni Parámi, no yoteno,” yaró.

<sup>11</sup> Uni Parámimbo ñande miraró, “Uni kako owí Jutas, yendémboro khe ñu, ‘Roneneñowí,’ ye

---

<sup>†</sup> **9:1:** “o qa-qa unindoro tapá uni” ñundo Ya Surumímo hu-hariri soporo ronda-ronda huru-huru owí muko, “Sanedrin,” ye nekoyangurí ñu sopoyaró. <sup>‡</sup> **9:2:** “Khe” ñuko murí keta qu inondutu unipareto howeyangurí.

nekoyotenngo qu, ηuno yote. Asa otoqoya ya ηu seqa uyareya uni ka Tarsus yendé monngo owí Sol ηuro osese te geno qembe. Itaka hariri tero yorote. <sup>12</sup> Tonjí muko huriri tete. Quko ηuno uni ka qene, owí muko Ananaias, ηu arero kandí tonjímo ra. Njunde tiní tonjí meté tero tonjeta.”

<sup>13</sup> Ananaiasko mande topé ηande yaró, “Uni Parámi, no inotenno, quko uni ηuro mande parámi yetenngo, otete piyimi enesó-enesó keño unipareke meté horémboya§ Yerusalem ηuno te yunoyara. <sup>14</sup> Ko o qa-qa unindoro tapá uni ηundo wimbu inoyi, unipareke keño mande inoro hariri teyotenngo ηano qu kusi yereweya.”

<sup>15</sup> Uni Parámimbo ηande miraró, “Ke u. Neneηombo ene rokóηoro kho ka inano, ko enendo uni wini meyowomboya,\*\* wiri yerete unindoya, Israel uniparetoya tonjeyemo neneηo owéne ηuro yesowo yimiroweya. <sup>16</sup> Hamó, do o quhurí ka neneηomboro korowoweya ηu ene witúηowano.”

<sup>17</sup> Asa Ananaias uyaro ya ηu quroko oro kandí re Sol saηano rero ηande miraró, “Topo Sol, ke kheko maheyuri Yesu keno tunoqaró, ηuko Uni Parámi, ko enendo no asá niriní keno areteno ηa. No arewe tonjenge meté tiní Yuqa Surumí qundo keno uya maηgoriní.” <sup>18</sup> Njunde yini, waka ta oka soró qembe ka Sol tonjí monngo tondaje umbuní

---

§ 9:13: “unipare meté horé” ηuko oteteye soso muko meté nanje kini. Kini, owé ηu “unipare meté horé” ηuro murí muko ηandiro, “Anutu koro unipare” nanje. \*\* 9:15: “uni wini meyowo” ηunde quko Juda unipare kini qu nanje.

meté tojetero otoqoní sono re inaró. <sup>19</sup> Ko o qímboro nero wimbu raró.

*Solko Damaskus ηuno mande yesowaró*

Asa Sol kosa naru kumimo ino-ino rewero unindoya Damaskus yendémo ηuno yoraŋgo. <sup>20</sup> Nju naruko ηuno Juda uniparetoro huru-huru yayemo†† mande ηande yeyara, Yesu ηuko Anutu koro Nanuní, ye yesowoyara. <sup>21</sup> Uni soso mandí inoro yukuworo ηande yaŋgurí, “Komo uni ηundo unipare owé ηuwore hariri teyotengo ηu Yerusalem ηuno rambaruru yereyaró, ko itakako unipare ηunde qu kusi yerero o qa-qa unindoro tapá unino‡‡ ηuno se owero ηano maheró, hamómbe?” <sup>22</sup> Quko Solko wimbu parámi tero Juda uni Damaskus yaŋgurí ηu yorerero ino-inoye takaro ηande witú yereró, ko Yesu ηuko Kristo§§ ηu. Njunde yini mande topé tewero rukusuwaŋgurí.

<sup>23</sup> Asa naru piru ta rotoníqo, Juda unindo koporo Sol uri khumowero quro mande kusiyaŋgurí. <sup>24</sup> Quko Sol mande ηuro inaró. Ko Juda unindo uri khumowero quro yendé ηuro mako qu soso kosa suwo sopoyaŋgurí. <sup>25</sup> Quko Sol koro ino-ino rewero unindo suwono ri toŋgo

---

†† **9:20:** “huru-huru ya” ηuko Juda uniparetoro ya parámi mu. Sapat naruko ηuno hu-hariri tero Anutu koro mandí weyoyi inoro hariri teyaŋgurí. ‡‡ **9:21:** “o qa-qa unindoro tapá uni” ηundo Ya Surumímo hu-hariri sopro ronda-ronda huru-huru owí muko, “Sanedrin,” ye nekoyaŋgurí ηu sopoyaró. §§ **9:22:** “Kristo” ηuko Anutuko rokóŋoní mahero wiri yerete uni parámi horé tunoqaró ηu.

puŋge parámi quroko kunditiní honŋo wituwore re rotoyi uró.

### *Sol Yerusalem oró*

<sup>26</sup> Asa Sol Yerusalem oro Yesu koro iŋo-iŋo rewero unindoya<sup>\*\*\*</sup> kopowero yero inaró. Quko uni ŋundo sasaro tero eneko iŋo-iŋo rewero uni ka tunoŋaró ŋuro kama inŋaŋguri. <sup>27</sup> Quko Barnabasko Sol rero asá yerewí uninot<sup>†††</sup> oro ŋande yimiraró, ko Solko kheko Uni Parámi qeniní mande ka miraró, ko Damaskus ŋuno wimbu rero Yesu owímo mande yesowoyaró. <sup>28</sup> Nunde ŋuro Sol eneya Yerusalem ŋuno yotoro uyare mahe tero wimbu rero Uni Parámimboro owímo mande yesowoyaró. <sup>29</sup> Enendo Juda uni Grik mande yeyanŋo ŋuya mandeto kuma teyara. Ko uri khumowero ŋuro kheyó seŋaŋguri. <sup>30</sup> Quko topétopémbo ŋuro inŋoro Sol rero Sisaria yendémo uro asáŋi eneŋo yendéyó, Tarsus,<sup>†††</sup> ŋuno oró.

<sup>31</sup> Nunde ŋuroko mira soso Judia, Galili ko Samaria ŋuno inŋondutu koro huru-huru<sup>§§§</sup> ŋu meté kunditeyanŋguri. Nunde yuriŋo, inŋondutuye kondériní Uni Parámi ŋuro sasaro ti Yuŋa Surumímbo newondeye rukisoyoní unipare qambu eneya kopoyanŋguri.

### *Pitako Ainias rini meté taró*

**\*\*\* 9:26:** “iŋo-iŋo rewero uni” ŋunde qundo rondage-rondage unindoya uyaro iŋo-iŋo yunoyaró. **††† 9:27:** “asá yerewí uni” ŋuko Yesuko rokó yerero asá yiriní eneŋo khayó tanŋguri. **††† 9:30:** “Tarsus yendé” ŋuko mira meyowo, owí muko Silisia, ŋuno yora, Esia mira parámi ŋuno nanŋe. **§§§ 9:31:** “inŋondutu koro huru-huru” ŋuko unipare soso Yesu inŋondutuworo nokone-nokone ŋuno huruwoyotenŋo qu.

<sup>32</sup> Naru kano Pitako mira soso ñuwore tonjeyate Lita yendémo ñuno uro unipare meté horé\* quya ñuno yoraŋgo. <sup>33</sup> Ñu yendémo ñuno uni ka qeneró, owí muko Ainias. Wimbu khe kandí soso khumoní yakutímo nanje eteyoní kumima naru kande sanjyoro kapusa ñunde rotaró. <sup>34</sup> Pitako genero ñande miraró, “Ainias, itaka Yesu Kristo† ñundo koriní meté tete. Otoqoya yakutíŋge roŋgaruwo.” Yiní waka ta otoqaró. <sup>35</sup> Ko Lita uni soso koya Saron mira koro uni ñuyako soso genero Uni Parámiwore newonde rohoré taŋgurí.

*Pitako Tapita riní pitu ko otoqaró*

<sup>36</sup> Asa Jopa yendémo ñuno iño-iño rewero pare ka owí Tapita ñuno yaró. Owí ñu Grik mandewore ñande nekoyanjo, Dokas, yeyanjo. Naru rokóŋoro enendo o meté unipare te yunoro uni otero tukuni teyanjurí ñu samaka yereyara. <sup>37</sup> Asa ñu naruko ñuno se khumo teyate khumaró. Khumoní ukúño sonoworo rero ya quroko ñuno wasa koreko quño ranjurí. <sup>38</sup> Lita yendé ñuko Jopa yendé taŋgímo yora. Ñunde ñuro iño-iño rewero unindo, Pita Lita yendémo ñuno yote, yero iñanjurí. Ko uni irisa asá yiri eneno oro ñande kirayariyó, “Waka ta noreno mahe,” yariyó.

---

\* **9:32:** “unipare meté horé” ñuko oteteye soso muko meté nanje kini. Kini, owé ñu “unipare meté horé” ñuro murí muko ñandiro, “Anutu koro unipare” nanje. † **9:34:** “Yesu Kristo” - komo suki ye-ye unindo Anutuko uni ka rokóŋoní mahero wiri yerete uni parámi horé tunoqeweya qu karo yanjurí. Juda unipareto uni maheweya ñu, “Kristo,” ma, “Mesaiya,” ye nekanjurí. Asa Yesu mahiní enejo unipareyó, “Kristo Yesu,” ma, “Yesu Kristo,” nanje ye nekanjurí.

<sup>39</sup> Asa Pitako otoqoro irisa ñuya toñeñgurí. Ko ñuno uyaro wasa koreko quno ñuno oró. Oní wapu kumimbo Pita tañgímo mahe kañero tenduruworo Dokasko eneya yara quno kowe punu-punu kumi tiñiyaró ñu se witúñañgurí.

<sup>40</sup> Asa Pitako unipare soso yohowiní yendémo uyiqo, potoruku rero hariri tiní kini tiní ukúño ñande miraró, “Tapita, otoqo,” yaró. Ñunde yini pare ñu toñetero Pita genero otoqoro kunditaró.

<sup>41</sup> Kunditini kandímo towoní otoqoro kañini unipare meté horémboya† wapu ñuya neko yerero pare pitu ko otoqaró ñu witú yereró. <sup>42</sup> Ñunde tiní mande piña ñu Jopa yendéwore toñini unipare soso piña mande iñañgurí, ko uni qambu Uni Parámi iñondutuwoyañgurí. <sup>43</sup> Pitako naru piru ta Jopa ñuno makao kowí roñgaruwoyara uni kaya yari.

## 10

### *Sambo simómbó Kornilius mande ka yaró*

<sup>1</sup> Asa uni ka Sisaria yendémo ñuno yaró, owí muko Kornilius. Ñuko kuma unindoro sopo-sopo uni qu ka, ko enendo Rom koro kuma unindoro huru-huru parámi ka, owí “Itali koro huru-huru,” yeyañgurí, ñuro quoko uni kumi sopo yereyara.\*

<sup>2</sup> Ñu uni ñuya suwisawiyómboya Anutu koro murí howero Anutu koro soreyaño. Enendo Juda uni

---

† **9:41:** “unipare meté horé” ñuko oteteye soso muko meté nanje kini. Kini, owé ñu “unipare meté horé” ñuro murí muko ñandiro, “Anutu koro unipare” nanje. \* **10:1:** “kuma unindoro huru-huru parámi” ñunde quko uni 600 ñuno yoraño. Sopo-sopo uni ñunde qundo kuma uni 100 sopo yereyaño.



otoro tukuni teyangurí ñu wondo yunoro samaka yereyara. Ko naru rokóñoro Anutuwoore hariri teyara. <sup>3</sup> Naru kano, suwoya 3 kilok ñunde tiníqo, kapo ka qeneró muko sambo simó† ka qeneró. Sambo simó ñundo eneno mahero ñande yaró, “Kornilius.”

<sup>4</sup> Yiní Kornilius kondé toñetero sasaro tero ñande yaró, “Uni parámi, do ka?”

Yiníqo, ñande yaró, “Anutuko keño haririke ñuya oteteke meté ñuya o qa-qa meté mu qembe ñuro inote. <sup>5</sup> Asa itakako uni ka asá yereka Jopa uyaro Saimon, owí kako Pita, ñu seqayi. Gene nekoyika mahiní. <sup>6</sup> Uni ñundo makao kowí roñgaruwoyara uni owí Saimon ñundo yano yote. Saimon koro ya qu windi sumeyoro yote.”

<sup>7</sup> Sambo simómbo mito roto toñiníqo, sunará simóño irisa koya kuma uni kanata ñuya neko yereró. Kuma uni ñuya Anutu koro murí howeyara, ko Kornilius koro sunará teyara. <sup>8</sup> Neko yerero o soso ñuro yimitoro asá yiriní Jopa uyarengurí.

### *Pitako kapo ka qeneró*

<sup>9</sup> Asa uyareyate sarañoní kosa keweroko ñuno Jopa yendé kutaqemo uyarengurí. Ñu naruko ñuno Pita hariri tewero ya sañano oró.‡

<sup>10</sup> Oro qímboro khumoro o newero quro inaró. Asa topémbo o roñgaruwoyuriqo, ino-inoyó

---

† **10:3:** “sambo simó” ñuko komo suki-suki Anutuko unipare kama yoriní tunoqi sambo simó yondowaró. Ko itaka enejo sunará teyotenjo. ‡ **10:9:** Israel mirako ñuno “ya umó” ñuko suruño kini, papare nanje. Uni kumimbo ñuno kañero piña mande meté yeyangurí.

rohoréjoní <sup>11</sup> sambo qeniní kosoní oka tuwi parámi qembe qeniní kato nuŋginí nimí kini ŋu toworo rondaníní nokono umburó. <sup>12</sup> Tuwiko ŋuno po murí-murí, sire ko nú yaŋgurí. <sup>13</sup> Ko maŋgo kato ŋande miraró, “Pita, otoqoya nú-qare ka yuto ne.”

<sup>14</sup> Quko Pitako yaró, “Uni Parámi, noko no ma! No oka ka pusú ŋunde qu kama nanowó.” §

<sup>15</sup> Ko maŋgo ŋundo pitu ko ŋande yaró, “Anutuko o sara naŋge towaró ŋu keto pusú yero ma yewero.” <sup>16</sup> Ŋu soso naru kapusa ŋunde tunoqiní tuwi ŋu waka ta samboko koreko oró.

<sup>17</sup> Asa Pitako iŋo-iŋoyó kape tiní newondímo ŋande yaró, “O enesó qeneteno ŋuro murí muko, ŋu datiro?” Ene watí ŋunde naŋge iŋoyoní uni Korniliusko asa yereró ŋundo mahero Saimon koro ya ŋuro osese tero, yate mahero ya makono kaŋaŋgurí. <sup>18</sup> Kaŋero ŋande nekoyaŋgurí, “Saimon, owí kako Pita, ŋumbe ŋano yotepe ma kini?”

<sup>19</sup> Pita kapo qeneró ŋuro watí iŋondataqeyoní Yuqako ŋande miraró, “Qeno, uni kapusako ke seqa kereyotenŋo. <sup>20</sup> Asa ko otoqo uya eneya toni. Neneŋombo uní ŋu yorewe mahetenŋo. Ŋuro ma iŋondataqewero.”

<sup>21</sup> Yiní Pitako uro ŋande yimiraró, “No uni ŋu seqayotenŋo. Ye do karo mahetenŋo?”

<sup>22</sup> Yiní ŋande yaŋgurí, “Kuma unindoro sopo-sopo uniye Kornilius, ŋundo nore asá niriní ma-

---

§ **10:14:** Juda unipareto hutuŋo mande howero posepo, nú-qare kiraróye kumi naŋge neyaŋgo, ko kumi muko Anutu tonímo pusú tete, unipareto newero mepémo kini.

heteto. Njuko uni ronenejowí\*\* ko Anutu koro soreyote. Juda wini soso njande yeyotenjo, ‘Njuko uni meté,’ yeyotenjo. Asa sambo simó†† surumí kato njande miraró, ko enendo ke neko kiriníka keto yayómo mahero mande ka yeka injoweya.”<sup>23</sup> Njunde yiqo, yorero yano oro kunditanjuri.

*Pitako Korniliusko yano njuno oró*

Asa sarañoníqo, Pita otoqoro eneya tonenjuri. Ko injondutu uni kumi Jopa nonjo qu njuya tonenjuri.<sup>24</sup> Toneyate sarañoní Sisaria yendémo njuno onjuri. Kornilius suwisawiyómboya nembe topémboya neko yirini mahe koporo sopoyanjuri.<sup>25</sup> Asa Pita ya quroko oníqo, Kornilius eneno mahero khímo rokaráño umburo potoruku te inaró.<sup>26</sup> Quko Pitako okokoworo njande yaró, “Otoqo. No njuya uni nanje.”

<sup>27</sup> Njunde yero irisa njundo mande yero ya quroko oriyó. Oro unipare qambu kopoyuri yiyaró.<sup>28</sup> Asa Pitako njande yimiraró, “Yenjombo injotenjo, Juda koro hutunjo mande qundo njande yete, ko norendo uni wini meyowo quya kunditewero mepémo kini.†† Quko Anutuko njande no witú nereró, ko nondo uni ka qene rondañero

---

\*\* **10:22:** “uni ronenejowí” njuko Anutuko qenero potó moré kini tini enejo uniyó tunoqete. †† **10:22:** “sambo simó” njuko komo suki-suki Anutuko unipare kama yorini tunoqi sambo simó yondowaró. Ko itaka enejo sunará teyotenjo. †† **10:28:** Naru rokóñoro Juda uniparetoya uni wini meyowomboya sanjirí tanjuri. Juda unipareto njande ye injanjuri, ko nore Anutu koro unipare, uni meyowo kini. Uni wini meyowo njundo njande ye injanjuri, ko Juda unipareto unipare soso huwó yereyanjuri. Njundiro nanje sanjirí tanjuri.

pusú yewero mepémo kini. <sup>29</sup> Nunde nuro no neko nerengurí quuno kina maheteno. Asa ko nñande osese yereteno, ye do murí karo no neko nerengurí?”

<sup>30</sup> Ko Kornilius nñande yaró, “Kosa naru nimí kini komoko, suwoya 3 kilok nñandiro nange, no yanemo hariri teyanowó. Nunde teyowe uni ka kowe punu-punuyó muko hiyóqeyaró nñundo mahero tonenemo kanaró. <sup>31</sup> Ko nñande yaró, ‘Kornilius, Anutuko haririke inote, ko uni otero tukuni teyotenngo qu samaka yerero o yunoyote nuro inote. <sup>32</sup> Asa ko uni ka asá yereka Jopa uyaya Saimon owí kako Pita nekoyika mahiní. Uni nñu makao kowí rongaruwoyara uni owí Saimon koya kunditero yayó windi sumeyoro nñuno yote,’ yaró. <sup>33</sup> Nunde nuro nondo waka ta mande ka rewe keno uyaró nñu. Ko keto o meté te nunoro mahete. Asa nore soso koporo Anutu tonjimo nñano kanato Uni Parámimbo mande kunaró nñu yeka inowato.”

### *Pitako Kornilius miti mande yesowo miraró*

<sup>34</sup> Asa Pitako hurí tero nñande yaró, “Hamó horé, itaka nñande inoteno, ko Anutuko unipare soso nuro otete kanata nange howeyote. <sup>35</sup> Enendo uni wini soso eneño soreyotenngo, ko o roneneñowí mu teyotenngo, nñu soso quoro metéyoyote. <sup>36</sup> Anutuko miti mande nñu rero nore Israel nunaró. Mande nñuko nñandiro: Yesu

Kristo,§§ uni soso koro Uni Paráminanimbo nore noriní Anutu koya newonde kanata teyoteto. <sup>37</sup> Yendo Judia mirako o soso tunoqaró ñuro injoyotengo, quko Galili mirako ñuno hurí taró. Ñuno Jonko unipare mande yesoworo sono re yunaró. <sup>38</sup> Yate Anutuko Nasaret yendé uni ñu, Yesu, rokóñoro Yuqa Surumí inoro wimbu parámi inaró. Anutuko eneya yoní wimbo-wimbo uyaro o meté unipare te yunoyara, ko enendo Monimbuko uni rowore yereró ñuno qu yoriní meté tanjurí.

<sup>39</sup> “Asa norendo o soso Judia mirako, Yerusalem yendémo ñuno taró ñu qenero ñuro yesowoyoteto. Ko unindo utoro te kano porowoyi khumaró. <sup>40</sup> Quko naru kapusayómo ñuno Anutuko okokowoní otoqoro tunomo tunoqaró. <sup>41</sup> Quko uni soso ñundo kama qeneñgurí. Kini, uni Anutuko komo rokó yereró ñundo nanqe qenetowó. Uni tapu koñgo otoqoníqo, norendo eneya o kopo natowó. <sup>42</sup> Ko norendo unipareko mande ka yesowowato ñuro nimiraró. Mande ñuko ñandiro, ko Anutuko Yesu rokóñaró, ko enendo unipare yotengo quya unipare komo khumanjurí quya ronda yereweya. <sup>43</sup> Ye-ye uni\*\*\* soso ñande yeyango, ko unipare soso Yesu injondutuwoyotengo ñu, Anutuko Yesu owíwore

---

§§ **10:36:** “Yesu Kristo” - komo suki ye-ye unindo Anutuko uni ka rokóñoni mahero wiri yerete uni parámi horé tunoqeweya qu karo yangurí. Juda unipareto uni maheweya ñu, “Kristo,” ma, “Me-saiya,” ye nekanjurí. Asa Yesu mahiní enejo unipareyó, “Kristo Yesu,” ma, “Yesu Kristo,” nanqe ye nekanjurí. \*\*\* **10:43:** “ye-ye uni” ñuko Anutuko mandí yunoní unipare yunanjurí.



# 11

*Pitako o taró ηuro sowo mande topé-topé yimiraró*

<sup>1</sup> Asá yerewí unindoya inondutu unipare Judia mirawore yoraᅅgurí ηu ηuya mande piᅅa ηande inᅅaᅅgurí, ko unipare uni wini meyowo mu\* ηuya Anutu koro mande qu raᅅgurí. <sup>2</sup> Asa ko Pitako Yerusalem oró quno ηuno inondutu uni koweye toᅅaᅅgurí qundo† qenero <sup>3</sup> ηande yaᅅgurí, “Keto yano oro uni koweye kama toᅅaᅅgurí quya o kopo naᅅgurí!”

<sup>4</sup> Asa Pitako hurí rero o soso tunoqaró okeyá ta ηande yaró, <sup>5</sup> “No Jopa yendémo yotoro hariri teyano, ino-inone rohoréᅅoní o enesó-enesó ka qenenowó. Oka tuwi parámi qembe qenewe kato nuᅅginí nimí kini ηu toworo rondaᅅiní nokono umburó. <sup>6</sup> No okeyá ta toᅅetanowó, ko tuwiko ηuno po murí-murí, nú-qare, sire ko nú yaᅅgurí. <sup>7</sup> Ko maᅅgo kato no nimiraró, ‘Pita, otoqoya yuto ne.’

<sup>8</sup> “Quko nondo ηande yanowó, ‘Uni Parámi, noko no ma! No oka ka pusú ηunde qu kama nanowó.’ ‡

---

\* **11:1:** “uni wini meyowo” ηunde quko Juda unipare kini qu nanᅅe. † **11:2:** “inondutu uni koweye toᅅaᅅgurí qu” - ηuko Juda uni nanᅅe. Komo suki Anutuko Abraham, Juda unindoro pukoye ηu, ηande miraró, ko enendo rokó ka tero eneᅅo naᅅo-simó soso koweye toᅅoweya. ηunde tero, yate-yate Juda uni soso koweye toᅅaᅅgurí. ‡ **11:8:** Juda unipareto hutuᅅo mande howero posepo, nú-qare kiraróye kumi nanᅅe neyaᅅgo, ko kumi muko Anutu toᅅímo pusú tete, unipareto newero mepémo kini.

<sup>9</sup> “Ko maŋgo ŋundo pitu ko ŋande yaró, ‘Anutuko o sara naŋge towaró ŋu keto pusú yero ma yewero.’ <sup>10</sup> Ŋu soso naru kapusa ŋunde tunoqiní tuwí ŋu waka ta samboko koreko oró.

<sup>11</sup> “Ŋu naruko naŋge uni kapusa qundo ma-hero nore yato quno ŋuno kaŋaŋgurí. Sis-aria yendé uni kato uni ŋu asá yiri nono ma-heŋgurí. <sup>12</sup> Mahiqo, Yuqako ŋande nimiraró, ‘Ma iŋondataqewero, eneya toŋe,’ yaró. Asa ko noya uni topo kande saŋyoro kanata ŋuya uro uni ŋuro ya quroko otowó. <sup>13</sup> Ko enendo nore nimitoro ŋande yaró, ‘Sambo simó ka ya ŋano kaŋero ŋande nimiraró, “Keto uni ka asáŋoka Jopa oya Saimon owí kako Pita ŋu yeka mahiní. <sup>14</sup> Enendo Anutuko keya suwisawikepoya rambaruru koŋgo yoreweya ŋuro mande ka kimiroweya.”’

<sup>15</sup> “Ŋunde yiniqo, no hurí rero mande yey-owego Yuqa Surumímbo komo noreno umburó ŋundiro naŋge eneno umburó. <sup>16</sup> Ko Uni Parámimbo mande komo yaró ŋuro iŋanowó. Ŋande yaró, ‘Jonko unipare sono re yunaró, guko yendo Yuqa Surumí rewango.’ <sup>17</sup> Ŋunde ŋuroko Anutuko puriŋo nore Uni Parámi Yesu KristoŶ iŋondutuwoyatowó qu re nunaró ŋu uni ŋu yunowero ye iŋaró tiniqo, no date tero eneŋo kheyó wisumuŋowano?”

---

§ 11:17: “Yesu Kristo” - komo suki ye-ye unindo Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “Mesaiya,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí.



18 Nunde yini mande topé kama yero Anutu owí hokoro n̄ande yaṅgurí, “Asa ko Anutuko uni wini meyowo n̄uya yorini newondeye rohoréjoro yoto-yotoye moré tewango.”

*Antiok unipare kumimbo in̄ondutu taṅgurí*

19 Komo Stiven uroyi khumoní quhurí parámi tunoqini in̄ondutu unipare quhurí korowaṅgurí. Asa ko kumi wisikaraṅoro sorero Ponisia mirako, Saipras noko mosowímo, Antiok yendémo n̄uno uṅgurí. N̄uno uro Juda uni nange mande yesowo yimiran̄gurí. 20 Quko uni kumi keweroyemoko, Saipras uni koya Sairin yendé uni, ene Antiok oṅgurí quno n̄uno Uni Parámi Yesu n̄uro miti mande Grik uni n̄uya yesowo yimiran̄gurí. 21 Nunde yimitoro Uni Parámimboro wimbí eneno yoní unipare qambu newondeye rohoréjoro Uni Parámi in̄ondutuwoyaṅgurí.

22 Asa in̄ondutu koro huru-huru\*\* n̄u Yerusalem n̄uno yoraṅgo n̄undo piṅa mande n̄u in̄oro Barnabas asáṅoyi Antiok uró. 23 Uro Anutuko samaka-samaka tuwó†† unipare yunaró n̄u gene in̄oro niṅgu-niṅgu tero Uni Parámi suki howewero n̄uro yimitoro newondeye rukisoyaró. 24 Barnabas n̄uko uni meté, ko Yuqa Surumí eneno maṅgoreyaró, in̄ondutu kondé teyara. Ko unipare qambu horé Uni Parámimboro wini guroko maheyaṅgo.

---

\*\* **11:22:** “in̄ondutu koro huru-huru” n̄uko unipare soso Yesu in̄ondutuwooro nokone-nokone n̄uno huruwoyotenggo qu. †† **11:23:** “samaka-samaka tuwó” n̄uko Anutu enejombo nore samaka yereyote. Kimoyó moré kini.

<sup>25</sup> Asa Barnabas Tarsus yendémo oro Sol se-qaró. <sup>26</sup> Seqa qenero re Antiok mahero kumima naru kayata na soso Antiok ñuno yariyó. Irisa ñundo inondutu uniparetoya huruwo mande rondaqe unipare qambu yunoyariyó. Ko Antiok ñuno nanqe unindo koretero Yesu koro ino-ino rewero unipareyó†† ñu “Kristen” neko yereñgurí.

<sup>27</sup> Ñu naruko ñuno ye-ye uni§§ kumi Yerusalem rotoro Antiok unñgurí. <sup>28</sup> Ko keweroyemo kato, owí Akapas, kañero Yuqa koro wimbímo korare noko soso ñuno tunoqeweya ñuro yaró. (Korare ñu, Kolotiasko\*\*\* unipare soso wiri yereró naruyómo ñuno tunoqaró.) <sup>29</sup> Asa ino-ino rewero uni ñundo topoye Judia mirako yanñgurí ñu samaka yerewero mande kusiyañgurí. Uni kanata-kanata eneño wondoyó rondañero kumi se kopañgurí. <sup>30</sup> Ñunde koporo Barnabas koya Sol koya rokó yiri wondo ñu rero huru-huru koro tapá unino oriyó.

## 12

### *Herotko Pita rero kusi-kusi yano rotaró*

<sup>1</sup> Asa ñu naruko ñuno wiri yerete uni Herot\*

---

†† **11:26:** “ino-ino rewero unipare” ñunde qundo rondaqe-rondaqe unindoya uyaro ino-ino yunoyaró. §§ **11:27:** “ye-ye uni” ñuko Anutuko mandí yunoní unipare yunañgurí. \*\*\* **11:28:** “Kolotias” ñuko Rom koro wiri yerete uni parámi ka. Rom unindo mirane-mirane wini soso sopo yereñgurí. \* **12:1:** “Herot,” owí kako “Agripa”, ñundo Juda unipare sopo yereró, quko enendo Rom koro wiri yerete uni parámi kasirayemo yora. Wiri yerete uni parámi ñundo owé parámi ka Herot inaró. Komo eneño usímbo unipare wiri yirini Mariako Yesu pisiyaró.

ηundo o piyimi inondutu unipare kumi te yunowero yondowaró. <sup>2</sup> Nundiro enendo yini Jems, Jon koro payó, ηu suke parámimbo toņoyi khumaró. <sup>3</sup> Khumoní Juda unindo ηuro niņguniņgu taņgurí. Nunde ηuroko Bret Yis Moré Kini ηuro o ne-neko<sup>†</sup> ηuno Herotko Pita ηuya rero kusi-kusi yano rotaró. <sup>4</sup> Nunde rotoní kuma unindoro kopo-kopo nimí kini qundo narunenarune sopoyanņo. Kopo-kopo kanata-kanata ηuko kuma uni nimí kini nanņe. Herotko ηande ye inaró, imemoņņo Taka yereró quro o ne-ne ηu<sup>‡</sup> kini tiníqo, Pita re umburo unipare toņeyemo mande khono rotoweya.

<sup>5</sup> Nunde ηuro Pita kusi-kusi yano yora, quko inondutu koro huru-huru ηundo<sup>§</sup> suki-suki eneņo Anutuware hariri teyanņo.

### *Sambo simó kato Pita samakanaró*

<sup>†</sup> **12:3:** “Bret Yisiyó Moré Kini quro o ne-ne” ηuko naru parámi ka, asa Israel unipareto sonda kanata soso ηuno bret yisiyó moré kini nanņurí. Komo suki Anutuko unipare ηu Isip noņņo yorini areņņurí. Arewero taņņurí quno ηuno bret hamó qawero mepémo kini. Kini, bret yisiyó moré kini nanņe, asa plaua, sono nanņe qanņurí. Nunde ηuroko kumima naru rokóņoro o tunoqaró ηuro inoro o ne-ne ηu teyanņo. <sup>‡</sup> **12:4:** “Taka yereró quro o ne-ne” ηuko naru parámi ka. Komo suki Anutuko Israel unipare Isip noņņo yorini areņņurí. Nηu naruko ηuno sambo simó sanņiri kato Isip koro simó urumuni korete qu soso yuri khumaņņurí. Quko Israel unipareto Anutu koro mandí howero sipsip simó yutoro sitú makoyemo sonowoyi sambo simómbó eneņo simóye taka yirini kama khumaņņurí. Nunde ηuroko kumima naru rokóņoro sipsip simó yutoro o ne-ne teyanņurí. <sup>§</sup> **12:5:** “inondutu koro huru-huru” ηuko unipare soso Yesu inondutuworó nokone-nokone ηuno huruwoyotenņo qu.

<sup>6</sup> Yate Herotko ñande ye inaró, kuyepo Pita rero mande khono rotowano. Quko kosa kama areyoníqo, suwonoko Pita kuma uni keweroyarimo etaró. Utó kondé irisa qundo kusiyaᅇguri, ko kuma uni irisa kusi-kusi ya mako soporo kaᅇariyó. <sup>7</sup> Ko waka ta Uni Parámimboro sambo simó ka\*\* tunoqero kusi-kusi ya quroko hiyóqaró. Tunoqero Pita taᅇgímo utoro okokoworo yaró, “Waka ta otoqo,” yini utó irisa ᅇu wisiyoro nokono umburiyó.

<sup>8</sup> Kowe sambo simómbó ñande miraró, “Utómbó kowe punu-punuke kosopengemo kusiyoya khe punu-punuke se kᅇᅇgemo re.” Yini ᅇunde tini ñande miraró, “Kowe punu-punu piruke†† reya no nohowe.” <sup>9</sup> Yini kina howaró, quko sambo simómbó o taró ᅇuko hamómbe ma kini, ᅇuro kama inaró. Kini, kapo qeneteno naᅇge ye inaró. <sup>10</sup> Asa irisa ᅇundo ya ᅇuno oro sopo-sopo uni korete qu takaro, yate irisayó takaro mako aini ᅇu ya wembó weᅇa quno ᅇuno uriyó. ᅇuno uriqo, mako ᅇu eneᅇombo koso yunoní yendémo uro khe ka howero oriyó. ᅇunde tiriqo, waka ta sambo simó ᅇu Pita roto toᅇeró.

<sup>11</sup> Toᅇini Pita ino-inoyó hiyóqini ñande yaró, “Asa hamó inoteno, Uni Parámimbo sambo simóᅇo asáᅇoní mahete, ko Herot kandí moᅇgo noriní Juda unindoro ino-inoye piyimi ᅇu takateno.”

---

\*\* **12:7:** “sambo simó” ᅇuko komo suki-suki Anutuko unipare kama yoriní tunoqi sambo simó yondowaró. Ko itaka eneᅇo sunará teyoteᅇgo. †† **12:8:** “kowe punu-punu piru” ᅇunde qu unipareto kowe punu-punuye meyowo weᅇeᅇoyᅇguri.

<sup>12</sup> Asa ñunde qene iñoro enendo Jon, owí kako Mak, ñuro nimí Mariako yano uyaró. Ya ñuno unipare qambu koporo hariri teyangurí. <sup>13</sup> Asa Pitako hongo pawa piru koro mako uroní sunará pare ka, owí Rota, ñundo mako kosowero umburó. <sup>14</sup> Quko Pita koro mañgó iñoro niñgu-niñgu parámi tero mako kama kosaró. Kina khengeñoro ya quroko oro yimiraró, “Pita makono kañeyote!”

<sup>15</sup> Yiní mirañgurí, “Ke kape pare!”

Quko kondé yaró, “Kini, hamó horé amena yote!”

Enepa yangurí, “Ñuko eneño kapí na.”

<sup>16</sup> Asa Pita mako watí utoyoní uyaro mako kosoro qenero newondeye uraró. <sup>17</sup> Quko kandímbo rokó-rokó tiní mañgoye kusiya Uni Parámimbo date kusi-kusi ya noñgo re maheró ñuro yimiraró. Ñande yaró, “Ye Jems koya topo-toponanimboya ñaro yimiri qembe,” yero yendémo uro mira meyowomo toñeró.

<sup>18</sup> Ita sarañóniqo, kuma uni otoqoro parámi yukuworo epe osese-osese tañgurí, “Pita dano ute?” <sup>19</sup> Herotko Pita seqayate kama qeneró. Ñunde ñuro enendo, kuma uni ñu yore mande khono yorotoro yuroweka khumi, yero mande kusiyaaró.

### *Herot khumaró*

Asa Herotko Judia mira ñu rotoro Sisaria yendémo uro ñuno yaró. <sup>20</sup> Komo enendo kiro sañgirí parámi Tair koya Saiton uniparetoya††

---

†† **12:20:** “Tair koya Saiton” ñuko kape unindoro yendéye, Juda koro miraye sumeyoro windi tapémo ñuno yorariyó.

taró. Unipare ηundo o qoyemboro Herot nongo nanje siyoyanğurí. Nunde ηuro, kiro mande ηu ronğaruwowato, yero uni ka owí Bilasitas koya koporo Herot qenewero mahenğurí. Bilasitas ηuko wiri yerete unindoro kho tero yakutí etewero qu sopoyaró.

<sup>21</sup> Asa naruyómo ηuno Herotko wiri yerete unindoro kowe punu-punu meté horé qu re taró, ko mande kho inowero yakutímo<sup>§§</sup> kunditero mande ka unipareko yesowaró. <sup>22</sup> Yesowoní inoro ηande kiwe nekanğurí, “Nuko unindoro manğó kini, anutu kanata karo nanje!” <sup>23</sup> Nunde yiğo, Herotko Anutu owí kama hokaró, ηunde ηuro waka ta Uni Parámimboro sambo simó<sup>\*\*\*</sup> kato uroní punipo newondí ni khumaró.

<sup>24</sup> Quko Anutu koro mandímbo parámi tero yendé soso toñeró.

<sup>25</sup> Kowe Barnabas koya Sol koya khoyari Yerusalem ηuno tiri kini tiníğo, pitu ko uriyó. Uro Jon, owí kako Mak, ηu rero toñenğurí.

## 13

*Inğondutu koro huru-huru ηundo Barnabas, Sol rokó yerero asá yerenğurí*

<sup>1</sup> Asa inğondutu koro huru-huru ηu Antiok yendémo ηunoko ye-ye uni\* kumimboya

<sup>§§ 12:21:</sup> “mande kho inowero yakutí” ηunde quno ronda-ronda unindo ronda-ronda mande meté yeweya, ηu nongo nanje mandí wimbu moré. <sup>\*\*\* 12:23:</sup> “sambo simó” ηuko komo suki-suki Anutuko unipare kama yoriní tunoqi sambo simó yondowaró. Ko itaka eneño sunará teyotoñgo. <sup>\* 13:1:</sup> “ye-ye uni” ηuko Anutuko mandí yunoní unipare yunanğurí.

rondaqe-rondaqe uni kumi nuno yanḡurí. Owéye muko nḡandiro: Barnabas, Simeon owí kako Niker, Lusius, Sairin yendé qu ka, Manain, wiri yerete uni Herot koya ya kanata quno parámi tariyó, ko Sol. <sup>2</sup> Unipareto Uni Parámimboro potoruku tero kundinji† teyuriqo, Yuqa Surumímbo nḡande yaró, “Ye Barnabas koya Sol koya rokó yirika nondo neko yerero kho yunanowó nḡu tewari.” <sup>3</sup> Yiní kundinji tero hariri ti kini tiníqo, kandeye sanḡayarimo rero asá yereḡurí.

*Saipras noko mosowímo nuno mande yesowo yimirariyó*

<sup>4</sup> Asa Yuqa Surumímbo yoriní toḡero Selusia yendémo nuno uriyó. Nḡu nonḡo waḡgowore Saipras noko mosowímo uyariyó. <sup>5</sup> Uyaro Salmis yendémo nuno waḡgo rotoro oro Juda koro huru-huru yawore‡ Anutu koro mande qu yeyariyó. Ko Jonko eneya yotoro samaka yereró.

<sup>6</sup> Asa Saipras noko mosowí soso nḡuwore khete uyareyate Papos yendé andusina nuno uyareḡurí. Nuno Juda uni owí Bar-Yesu geneḡurí, enendo rukusí tero ye-ye uni kota taró. <sup>7</sup> Eneko Rom koro uni parámi, owí Sergius Paulus,§ nuro topé ka. Uni kembé nundo Anutu koro mande qu inḡowero inḡoro Barnabas koya Sol

---

† **13:2:** “kundinji” teyanḡurí quno nuno unipareto Anutu inḡoro eneḡo ri umbuní naru kanata, irisa nḡandiro o kama nanḡurí.

‡ **13:5:** “huru-huru ya” nḡuko Juda uniparetoro ya parámi mu. Sapat naruko nuno hu-hariri tero Anutu koro mandí weyoyi inḡoro hariri teyanḡurí. § **13:7:** “Sergius Paulus” nḡuko Rom koro uni qu ka, enendo Saipras noko mosowí soso nḡu wiri yereró.

koya neko yereró. <sup>8</sup> Quko rukusí teyara uni ñu, owí Grik mandewore Elimas nekoyanngo, enendo, uni kembé ñundo inondutu ma tewero, ye inoro uni kembémboro ino-inoyó wosowero taró.

<sup>9</sup> Quko Sol, owí kako Pol, Yuqa Surumímboro wimbí parámi eneno mangoriní enendo Elimas kondé tojetero ñande yaró, <sup>10</sup> “Otete kota quya otete kaná-kaná quya keno manngoreyote! Keko Monimbu koro nanuní, keto otete roneneñowí\*\* ñuro sanjiríño tete! Kepe Uni Parámimborokhe roneneñowí mu roworemowero kho ñu rotoweyape ma kini? <sup>11</sup> Asa ino! Itakako Uni Parámimborokandímbo kurote, ko tojenge pokaweya. Itaka yate kosa kama qeneweya.”

Yiníqo, waka ta tojí huriri tiní wimbo-wimbo uro uni kandí toworo khe witúñowero qu ka seqayaró. <sup>12</sup> Kowe uni kembé ñundo o ñu qenero, Uni Parámi ñuro mande rondage inariyó ñuro kondé yukuworo inondutu taró.

*Pisitia mirako Antiok yendémo ñuno mande yesowo yimirariyó*

<sup>13</sup> Asa Pol koya topé-topémboya wangowore Papos yendé rotoro Pambilia mirako Perika yendémo ñuno uyarengurí. Ñu nonngo Jon yorotoro Yerusalem pitu ko uyarewero tojeró. <sup>14</sup> Tonjiní irisa ñundo Perika rotoro khendo yate Pisitia mirako Antiok yendémo ñuno oriyó. Ñuno

---

\*\* **13:10:** “otete roneneñowí” ñuko Anutuko nore rokó yirini noreño murínani eneño murí howeyote.



oro Sapat naruko†† ηuno Juda koro huru-huru ya quroko oro kunditariyó. <sup>15</sup> Asa uni kato Hutuño Mande koro mande kaya Ye-ye Unindoro mande kaya weyoní kini tiní huru-huru sopo-sopo uni ηundo Pol, Barnabas neko yerero ηande yaró, “Topo irisa, mande ka unipare newondeye ruk-isoyowero mande ka yimirowero injoyaqa meté yiri.”

<sup>16</sup> Asa Polko kaηero kandímbo rokó-rokó tero ηande yaró, “Ye Israel uni, ko ye Anutu kasir-amo yoteηgo qu, injoyi. <sup>17</sup> Israel uniparetoro Anutuyembo usi-sinani rokó yereηgurí. Nunde rokó yerero Isip mirako ηuno yoriní qambu taηgurí. Yate wimbí tero yoriní Isip rotoro ma-heηgurí. <sup>18</sup> Mahiqa, kumima naru 40 ηunde rotoro mira wimbímo oteteye piyimi ηuro topé kama tero <sup>19</sup> Kenan ηunoko uni wini meyowo kande saηyoro irisa rambaruru yerero miraye ηu rero Israel uni yunaró. <sup>20</sup> Naru soso ηuko kumima naru 450 ηundiro taró.

“Nū naruko ηuno uni tapá enesó-enesó yoriní sopo yereηgurí, yate ye-ye uni Samuel tunoqaró. <sup>21</sup> Nū naru ηunoko unipareto wiri yerete uni karo kirayaηgurí, asa ko Anutuko Sol, Kis naηuní ηu, Benjamin koro wini qu ka, ηu re yunaró. Ko kumima naru 40 ηunde rotoro Solko unipare wiri yereró. <sup>22</sup> Quko Anutuko Sol re howero Dewit rokóηoní wiri yerete uni tunoqaró. Rokóηoro ηuro ηande yaró, ‘Dewit, Jesi naηuní ηu, no qene

---

†† **13:14:** “Sapat naru” ηuko sonda naru weηa ηu. Nū naruko ηuno Juda unipareto huru-huru yayemo huruworu Anutu koro mandí weyoyi inoro hariri teyaηgurí.

inoro n̄ande in̄oyoteno, ko nenen̄o nun̄guríne n̄uko ene nun̄gurí n̄unde nan̄ge. Enendo in̄ojone soso n̄u howeyoweya.’

<sup>23</sup> “Anutuko komo mande kusiyaró n̄u howero Yesu, Rambaruru Kon̄go Yorewero Uni n̄u, Dewit koro sowe qu, n̄u riní Israel maheró. <sup>24</sup> Yesu kama tunoqeyoní Jonko Israel uni soso newonde rohoréjoro sono rewero mande qu yesowo yimiraró. <sup>25</sup> Jon khoyó kini tewero tiní n̄ande yaró, ‘Ye no dani, yero in̄otenggo? Noko uni n̄u maheweya n̄u kini. Quko uni ka imemon̄go no huwónemo maheweya n̄uro in̄oyi, nondo enen̄o khe punu-punuyómboro utó orosoyewero owéne moré kini.’ ††

<sup>26</sup> “Topo okite, ye Abraham koro soweyómboya ye Anutu koro kasiramo yotenggo quya, in̄oyi. Anutuko nore rambaruru kon̄go yoreweya n̄uro mande n̄ako riní noreno maheró. <sup>27</sup> Dokoro unipare Yerusalem yotenggo qu, ko uni kembékembéye n̄uko Yesu okeyá kama in̄o in̄angurí. Sapat naru§§ rokójomomo ye-ye unindoro mandeye weyoro kama in̄oyi tondan̄eyote. N̄unde n̄uroko Yesu topé piyimi in̄angurí quno nuno ye-ye unindoro mandeye n̄u ri hamó taró. <sup>28</sup> Nundiro nan̄ge ene quhuríyó moré kini qenengurí, quko Pailat kandímo rato uroní khumoweya, ye in̄oro re in̄angurí. <sup>29</sup> Inoyi uroyi khumoníqota ye-ye unindoro mandeye mepémo tunoqaró. N̄unde tiní

---

†† **13:25:** Kho n̄u, uni parámimboromo khe punu-punu orosoyewero guro kho n̄uko, kho simó nan̄geko n̄unde teyan̄go. §§ **13:27:** “Sapat naru” n̄uko sonda naru wen̄a n̄u. N̄u naruko nuno Juda unipareto huru-huru yayemo huruwo Anutu koro mandí weyoyi in̄oro hariri teyan̄gurí.

tipiriri\*\*\* koŋgo ri umbuní rero uni tapu kano  
 ɲuno tapuɲaŋguri. <sup>30</sup> Quko Anutuko okokowoní  
 pitu ko uni tapu koŋgo otoqaró. <sup>31</sup> Otoqoro naru  
 parámi ɲuno unipare komo eneya Galili rotoro  
 Yerusalem oŋguri qundo ene qeɲeɲguri. Ko  
 itakako unipare ɲundo unipare eneɲo yesowoy-  
 oteɲgo.

<sup>32</sup> “Nore miti mande meté ɲa yesoworo  
 ye yimiroto. Anutuko komo mande usi-  
 sinanimboya kusiyaró ɲu <sup>33</sup> itaka soweyemboya,  
 nore naɲge, mande ɲu mepémo tunoqewero  
 Yesu okokowoní uni tapu koŋgo otoqaró. Hariri  
 Yambo irisayó quno ɲuno o ɲuro ɲande yete,

“ ‘Ke neneɲo naɲone;  
 Itaka no pisi kereteno.’

<sup>34</sup> Enendo uni tapu koŋgo riní otoqaró. Otoqoro  
 kowí kaɲuya kama puqeweya. Sokomeko mande  
 ɲuro ɲande yete,

“ ‘Nondo komo o meté horé qu se Dewit inowero  
 yanowó mu,  
 ɲu hamó se ye yunowano.’

<sup>35</sup> ɲunde ɲuro mande meyowo ɲande yete,

“ ‘Keɲo uni meté horé qu, ɲu roti uni tapuko kama  
 puqeweya.’

<sup>36</sup> “Qeni, Dewitko nokono yaró quno ɲuno  
 Anutu koro iɲo-iɲo qu howeroqota khumoní rero

---

\*\*\* **13:29:** “tipiriri” ɲunde quko wiri yerete uni kumimbo eneɲo  
 uni saɲgiriye yorero ɲuno uroyi khumoyanɲguri.

usi-símboya tapuŋi puqaró. <sup>37</sup> Quko Anutuko uni okokowoní otoqaró, ŋuko kama puqaró.

<sup>38</sup> “Ŋunde ŋuro, uni topo, mande ŋande yesowatokata, ye iŋoyi, Anutuko uni ŋuwore yeŋo quhuríye se rotoweya. Moses koro hutuŋo mandeko††† quhuríye se rotoro ye yoriní roneneŋowí††† tunoqewero mepémo kini.

<sup>39</sup> Quko unipare soso iŋondutuwoyotenŋo ŋundo uni ŋuwore roneneŋowí tunoqetenŋo. <sup>40</sup> Ŋunde ŋuro meté toŋete sopoyi, komo mande ye-ye unindo ŋuro yaŋgurí ŋu yeno tunoqeweya koro. Ŋande yaŋgurí,

<sup>41</sup> “ ‘Yeko yesaráŋoyotenŋo, ye toŋeti,  
ko iŋondata parámi teroqota rambaruru ti!

Nondo yeŋo naruyemo kho ka tewano,  
ko uni kato kho ŋuro ye yimironíqo,  
yeko kama iŋondutuwowanŋo.’ ”

<sup>42</sup> Asa ŋunde yiri kini tiní yendémo umburiqo, unipareto ŋande yaŋgurí, “Sapat naru aweno mande ŋako pitu ko nore nimirori qembe.”

<sup>43</sup> Yiŋo, sopo-sopo unindo yorotoní yendémo umbuŋgurí. Umburo Juda uni qambu koya uni wini meyowo qu Juda koro muríye hamó howeyanŋo ŋundo Poł koya Barnabas koya yohowanŋgurí. Iriŋa ŋundo mande yunoro Anutuko samaka-

---

††† **13:38:** “hutuŋo mande” ŋuko komo suki Anutuko Sainai purímo Moses inoní Israel unipare yunaró. Mande ŋuko Juda unipareto yoto-yotoye soso sopoyaró. ††† **13:38:** “roneneŋowí tunoqete” ŋuro murí muko ŋandiro: asa Anutuko uni ka, pare ka yiyoro potó moré kini tiní eneŋo unipare qu ka tunoqetenŋo.

samaka tuwó§§§ yunaró ñu sañano kañewero ñuro rukiso yiririyó.

<sup>44</sup> Asa imemoñgo Sapat naruko ñuno unipare soso ta yendé parámimo yañgurí qundo mahero Uni Parámimboro mande qu inowero quro huruwañgurí. <sup>45</sup> Quko Juda unindo unipare qambu ñu yiyoro newonde tutu tañgurí. Ñunde tero Polko mande yaró ñuro yesaráñañgurí.

<sup>46</sup> Quko Pol koya Barnabas koya wimbu rero mande ñande yariyó, “Hamó, koretero nore Anutu koro mande qu rero ye Juda uni yunarowó. Quko mande ñu huwóñoro ñande ye inotengó, ko naru maheweya quro yoto-yotoyó ñu rewero owénani moré kini, ye inotengó. Ñunde ñuroko norendo rohoréñoro uni wini meyowo\* yunowaro. <sup>47</sup> Dokoro, Uni Parámimbo nore ñande nimiraró,

“ ‘Nondo ke korewe uni wini meyowomboro hiyóye tunoqeweya.

Ñunde tero unipare noko soso ñu yimitoka rambaruru koñgo yorewe.’ ”

<sup>48</sup> Ñunde yiriqo, uni wini meyowo ñundo niñguniñgu tero Uni Parámimboro mande quro seré tañgurí. Ko Anutuko unipare rokó yirini naru maheweya quro yoto-yotoyó ñu rewañgo, soso ñundo inondutu tañgurí.

<sup>49</sup> Asa Uni Parámimboro mande qu mira soso ñuno usayero toñeró. <sup>50</sup> Quko Juda unindo

---

§§§ **13:43:** “samaka-samaka tuwó” ñuko Anutu enejombo nore samaka yereyote. Kimoyó moré kini. \* **13:46:** “uni wini meyowo” ñunde quko Juda unipare kini qu nanje.

pare kumi owéye moré qu Anutu potoruku te inoyango quya yendé njuro uni pará-parámboya yori newonde piyimi tero Pol koya Barnabas koya o piyimi te yunoro yendé mongo yohowanğurí. <sup>51</sup> Njunde njuro irisa njundo newondeyari sanğirí ri-himowero njuro kheyarimo murutó siyori nokono umburó. Njunde tero Antiok rotoro Aikoniam yendémo njuno uyaririyó. <sup>52</sup> Ko Antiok njuno Yesu koro ino-ino rewero unipareyó† njundo niŋgu-niŋgu parámi tiqo, Yuqa Surumímbo newondeyemo manğoraró.

## 14

### *Aikoniam yendémo njuno mande yesowariyó*

<sup>1</sup> Asa komo tariyó njunde nanđe Aikoniam yendémo njuno Juda koro huru-huru yano\* oro mande yariyó. Njunde yiriqo, Juda uni, Grik uni qambu parámi horé inondutuwoyanğurí. <sup>2</sup> Quko Juda uni kumi inondutu kama tanğurí njundo uni wini meyowo mu† ino-inoye ri uni topo njuro newonde piyimi tanğurí. <sup>3</sup> Naru piru sanğa Aikoniam njuno yotoro wimbu rero Uni Parámimboro yesowori enendo eneño samaka-samaka tuwó qu unipare witú yerewero quro o wimbí moré‡ enesó-enesó kandeyarimo taró. <sup>4</sup> Quko yendé

† **13:52:** “ino-ino rewero unipare” njunde qundo rondage-rondage unindoya uyaro ino-ino yunoyaró. \* **14:1:** “huru-huru ya” njuko Juda uniparetoro ya parámi mu. Sapat naruko njuno hu-hariri tero Anutu koro mandí weyoyi inoro hariri teyanğurí.

† **14:2:** “uni wini meyowo” njunde quko Juda unipare kini qu nanđe. ‡ **14:3:** “o wimbí moré” njuko o enesó-enesó tunoqini Anutu koro wimbí njunde tunomo yoweya.

unipare soso ñu usoworo irisa tañgurí. Kumimbo Juda unindoya newonde kanata tañgurí, ko kumimbo asá yerewí uni<sup>§</sup> irisa ñuya newonde kanata tañgurí. <sup>5</sup> Yate uni wini meyowo ñuya Juda unindoya uni kembéyemboya ñundo Pol koya Barnabas koya o piyimi te yunoro wondopo yuwero mande ka kusiyañgurí. <sup>6</sup> Kusiyoyiqo, iñoro sorero Listira, Deripe yendé irisa Likonia mira kutaqe quno ñuno toñiriyó. <sup>7</sup> Ñuno uyaro miti mande\*\* ñu yesowoyariyó.

*Polko Listira yendémo ñuno uni khí piyimi ka riní meté taró*

<sup>8</sup> Listira yendémo ñuno uni khí wimbí moré kini ka kina kunditeyaró, ñuko nimímbo ene khí piyimi ñunde pisiyaró, ko eneñombo khete uyarewero mepémo kini. <sup>9</sup> Asa uni ñundo Pol koro mandí iñoní Polko kondé toñetero ñande ye iñaró, ko uni ñu Anutuko riní meté teweya ñu iñondutuwoyote, ye iñaró. <sup>10</sup> Ñunde ye iñoro mande kondé ñande miraró, “Ke otoqo kañe.” Yiní otoqo kañero khímbo uyaró.

<sup>11</sup> Ñunde tiní unipare qambu qundo Polko o taró ñu qenero Likonia mandewore ñande kiwe yañgurí, “Anutu kumimbo uni qembe tunoqero noreno umbutiri!” <sup>12</sup> Ñunde yero Barnabas ñuko anutu ka owí muko, “Sus,” ye nekañgurí. Ko Pol ñuko mande yeyote uni, ñuro anutu ka owí muko,

---

§ 14:4: “asá yerewí uni” ñuko Yesuko rokó yerero asá yirini enejo khoyó tañgurí. \*\*

14:7: “miti mande” ñuko Anutuko Kristo asáñoní khumoro quhurínanimboro kimo tiní Anutu koya newonde kanata tewero ñuro mande meté mu nañge.

“Heremes,” ye nekaṅgurí.†† <sup>13</sup> Sus koro ya surumí ka yendé sumeyoro yaró. Asa Sus koro o qa-qa uni ṅuya unipare qambu Pol koya Barnabas koro o qa-qa te yunowero ye iṅṅgurí. Nunde ṅuro o qa-qa uni ṅundo makao urumuni kumi siyoro o nakayá kumi ṅuya siyoro yendé koro makoyómo maheró.

<sup>14</sup> Quko asá yerewí uni irisa ṅu o tewero ṅuro iṅori newondeyari piyo tiní kowe punu-punuyari se romboṅero khenṅero unipare qambu keweroyemo uyare nekero ṅande yariyó, <sup>15</sup> “Otikeye, ye date koro ṅande tetengo? Noreko uni, ye qembe nanṅe. Norendo miti mande‡‡ ṅa yeno ṅande yeyotero, o kina-kina qu se potorku re inoyotengo ṅu rotoya rohoréṅoya Anutu yoto-yotoyó moré ṅuro iṅoyi. Anutu ṅuko noko sambo windi towaró. Nuya o soso ṅuno yote ṅu yondowaró. <sup>16</sup> Hamó, usisamba naruko ṅuno enendo uni wini soso yorotoní ene oteteye nanṅe howeyanṅo. <sup>17</sup> Quko Anutuko kina kama yorotoyara. Kini, suki-suki o meté te yunoyara. Enendo sono riní sambo rotoro yeno umbuní khono o meté-meté ṅu siyoní woteyote. Ko o qoyemboro se yunoní newondeye niṅgu-niṅgu teyote.” <sup>18</sup> Asa ṅunde yariyó, quko unipare qambu ṅundo wimbu o qa-qa te yunowero tiqo, kusi yerewero quhurí tariyó.

---

†† **14:12:** Kape unipare kumimbo anutu qambu quro potorku te yunoyanṅurí, ko anutu ṅuro kembéye ṅuko owí muko, “Sus.” Meyowo ka, owí muko “Heremes,” enendo Sus koro mandí unipare yimitoyaró. ‡‡ **14:15:** “miti mande” ṅuko Anutuko Kristo asáṅoní khumoro quhurínanimboro kimo tiní Anutu koya newonde kanata tewero ṅuro mande meté mu nanṅe.



<sup>19</sup> Quko Juda uni kumi Antiok nonḡo, Aikoniam nonḡo qu mahero unipare qambu quro inḡo-inḡoye ri otoqaró. Otoqoní wondo raḡoro Pol utoro, ene khuma, yero inḡoro ukúḡo re wosoro yendé sumeyoro rotanḡurí. <sup>20</sup> Quko Yesu koro inḡo-inḡo rewero unipareto mahero wuririyoyuri Polko pitu ko otoqoro yendémo onḡurí. Ko saraḡoníqo, eneya Barnabas koya Deripe yendémo ḡuno oriyó.

*Siria mirako Antiok yendémo ḡuno pitu ko oriyó*

<sup>21</sup> Asa Deripe yendémo ḡuno miti mande§§ yeyuriqo, unipare qambu qundo inḡo-inḡo rewero unipare tunoqanḡurí. Yate irisa ḡundo rohoréḡoro pitu ko Listira, Aikoniam, Antiok\*\*\* uriyó. <sup>22</sup> Uro yendéne-yendéne ḡuno inḡo-inḡo rewero unipare ḡu wikundi yerero ḡande yariyó, “Ye inḡondutu watí teyuri qembe. Nore Anutuko unipareyó wiri yereyote naruyómo††† owerogo koretero quhurí qambu korowowato,” yariyó. <sup>23</sup> Huru-huru kanata-kanata quno ḡuno uni kumi Uni Parámi inḡondutuwoyanḡurí qu yorero huru-huru koro tapá uni rokó yiririyó. Rokó yerero kundinḡi tero††† hariri tero Uni Parámimboro

---

§§ **14:21:** “miti mande” ḡuko Anutuko Kristo asáḡoní khumoro quhurínanimboro kimo tiní Anutu koya newonde kanata tewero ḡuro mande meté mu nanḡe.

\*\*\* **14:21:** Yendé ḡu, “Antiok,” ye nekanḡurí, ḡuko Pisitia mirako ḡuno yora. Antiok meyowo kato Siria mirako ḡuno yora. ††† **14:22:** “Anutuko unipareyó wiri yereyote naruyómo” ḡuno inḡondutu unipareko hamó Anutu kusunḡoyómo yowanḡo.

††† **14:23:** “kudinḡi” teyanḡurí quno ḡuno unipareto Anutu inḡoro eneḡo ri umbuní naru kanata, irisa ḡundiro o kama nanḡurí.

kandímo yorotariyó. <sup>24</sup> Nju nonngo uyaro Pisi-tia mirawore uyaro, yate Pambilia mirako njuno uriyó. <sup>25</sup> Njuno uro Perika yendémo oro mande yesoworo rotoro Atalia yendémo njuno uriyó.

<sup>26</sup> Atalia njuno nonngo wanngowore tonjero Antiok§§§ uyaririyó. Komo Antiok unipareto kho tewero guro rokó yiriqo, Anutu koro samaka-samaka tuwó quwore tonjiriyó. Asa kho njuno kini tini pitu ko mahiriyó. <sup>27</sup> Mahero huru-huru unipare njuno quya koporo Anutuko o soso enewore taró njuno piña mande njande yariyó, ko Anutuko uni wini meyowo\* mako koso yunoní inondutu tanjurí. <sup>28</sup> Njunde yero irisa naru piru sanja ino-ino rewero unipare njunya yanjurí.

## 15

*Huru-huru koro tapá uni Yerusalem njuno huruwanjurí*

<sup>1</sup> Asa uni kumimbo Judia mira rotoro Antiok yendémo\* njuno umburo inondutu uni mande rondage yunoro njande yanjurí, “Ye Mosesko† murí rondage yunaró njuno howero koweye kama tonjowanngo tiniqo, Anutuko rambaruru konngo ye kama yoreweya.” <sup>2</sup> Njunde yiqo, Pol koya Barnabas koya sanjirí parámi tero eneya mandeto kuma tanjurí. Njunde njuno uni topo

---

§§§ **14:26:** Yendé njuno, “Antiok,” ye nekanjurí, njuno Siria mirako njuno yora. \* **14:27:** “uni wini meyowo” njunde guko Juda unipare kini qu nanje. \* **15:1:** “Antiok yendé” njuno Siria mirako njuno yora. † **15:1:** Komo suki “Mosesko” uni parámi tero Israel unipare sopo yereró. Anutuko Sainai purímo hutunjo mande inoní mande njuno rondage unipare yunaró.

ηundo Pol, Barnabas ko uni kumi meyowo ηuya Yerusalem oro asá yerewí uni† ηuya huru-huru koro tapá unindoya mande roηgaruwowero quoro rokó yerηgurí. <sup>3</sup> Rokó yerero huru-huru unipareto asá yiri uyaro Ponisia mira, Samaria mira kewerowore oηgurí. Oyate uni topo ηuno piηa mande ηande yimirηgurí, ko uni wini meyowo kumimbo Anutusina newonde rohoré taηgurí, yimiri niηgu-niηgu parámi taηgurí. <sup>4</sup> Oyate Yerusalem mahiqo, huru-huru uniparetoya asá yerewí unindoya huru-huru koro tapá unindoya yorero oηgurí. Ko Pol koya Barnabas koya Anutuko o soso enewore taró ηuro yariyó. <sup>5</sup> Quko iηondutu uni kumi Farisi wini koηgo qundo otogoro ηande yaηgurí, “Ye ηande yi qembe, ko uni wini meyowo qundo eneηo koweye toηoya§ Moses koro hutuηo mande ηu howewaηgo.”

<sup>6</sup> Yiηo, asá yerewí unindoya tapá unindoya mande ηu roηgaruwowero kopηgurí. <sup>7</sup> Koporo mande qambu yiηo, Pitako kaηero ηande yimiraró, “Uni topo, ye iηotηgo, Anutuko komo ye keweroyemo no rokó niriní miti mande\*\* rero uni wini meyowo yunoyowe iηoro iηondutu

---

† 15:2: “asá yerewí uni” ηuko Yesuko rokó yerero asá yiriní eneηo khojó taηgurí. § 15:5: “kowe toηowero” muri muko ηandiro: Juda pareto simó urumuni ka pisiyoní kosa naru kande saηiyoro kapusa ηunde rotoní hutuηo mande howero kowí toηaηgurí. ηunde tero eneko Anutu koro simó rokóηaηgurí. Ko uni wini meyowo qu kato mahero Anutu potoruku tewero kondé iηaró tiníqo, ene ηuyako eneηo kowí toηaηgurí. \*\* 15:7: “miti mande” ηuko Anutuko Kristo asáηoní khumoro quhurínanimboro kimo tiní Anutu koya newonde kanata tewero ηuro mande meté mu nange.

tanğurí. <sup>8</sup> Anutuko unipare soso newondeye gene injoyote, ko enendo uni ñuro newondeye gene injoro nore nunaró ñunde gembe Yuqa Surumí re yunaró. <sup>9</sup> Ñunde tiniqo, kato noreya eneya ronda yerewero mepémo kini. Anutuko eneño inondutuyewore newondeye riní sara taró. <sup>10</sup> Ñunde ñuroko ye date koro, Anutu towonato, yero injoyotenjo? Ye o quhurí piyimi ña rero Yesu koro ino-injo rewero unipareyó†† sanayemo ma kusiyowero. Komo usi-sinanimboya nore ñuya quhurí ñu korowowero mepémo kini. <sup>11</sup> Quko uni wini meyowo ñundo nore inondutu tatowó ñundiro nanje Uni Parámi Yesu koro samakasamaka tuwó ñuwore inondutu tiqo, rambaruru konjo yoreweya.”

<sup>12</sup> Ñunde yiní kini tiní mondó yuri Pol koya Barnabas koya Anutuko o wimbí moré‡‡ enesó-enesó kandeyarimo uni wini meyowo keweroyemo taró ñuro yariyó. <sup>13</sup> Ñunde yiriqo, Jemsko ñande yaró, “Uni topo, mandene ña injoyi. <sup>14</sup> Koretero Saimon ñande yete, ko Anutuko mahero uni wini meyowo kumi yoriní eneño unipareyó tunoqañgurí. <sup>15</sup> Ko ye-ye unindoro mandeye ñuko ñundiro nanje. Komo suki ñande nakayáñañgurí,

<sup>16</sup> “Imemonjo pitu ko mahero

Dewitko ya qu komo toqaró ñuko nondo pitu ko rewano.

---

†† **15:10:** “ino-injo rewero unipare” ñunde qundo rondage-rondage unindoya uyaro ino-injo yunoyaró. ‡‡ **15:12:** “o wimbí moré” ñuko o enesó-enesó tunoqini Anutu koro wimbí ñunde tunomo yoweya.

Ya ηuro oyó kumi piyo taró,

ηuko nondo keta rewe pitu ko kañeweya.

17 Nunde tero uni watí yotenjo ηuya

uni wini meyowo soso nenejo owéne towoy-  
otenjo ηuya

Uni Parámi seqawango, peka.

Uni Parámi o soso ηu riní tunoqete ηundo ηundiro  
yete.

18 Komo suki o soso ηuro injatowó.

19 “Nunde ηuro no injo-injone muko ηandiro: uni  
wini meyowo qundo Anutusina newonde rohoré  
teyotenjo, nore koweyumu kama yunowato.

20 Kini, nore sokome ka eneno nakayáηoro ηande  
yimirowato, ko oka unindo rero anutu kota-kota  
te inangurí ηu ma newero, ko se simbururu ma  
tewero, ko númbowe unindo puñeye kusiyoyi  
khumi ηu ma newero, ko sitú ηuya ma newero.

21 Dokoro komo suki yate-yate itaka ηuya Sapat  
naruko§§ unindo Moses koro hutujo mande ηu  
Juda koro huru-huru yayemo weyo yesowoy-  
otenjo.”

*Tapá unindo injondutu unipare uni wini mey-  
owo ηuro sokome ka nakayáηurí*

22 Nunde ηuro asá yerewí unindoya\*\*\* tapá  
unindoya huru-huru unipare soso ηuya mande  
kusiyoro keweroye monjo uni irisa rokó yerero  
Pol koya Barnabas koya Antiok uwero rokó  
yerenjurí. Jutas, owí kako Barisapas, koya Sailas

---

§§ 15:21: “Sapat naru” ηuko sonda naru weña ηu. ηu naruko  
ηuno Juda unipareto huru-huru yayemo huruworu Anutu koro  
mandí weyoyi inoro hariri teyanjurí. \*\*\* 15:22: “asá yerewí  
uni” ηuko Yesuko rokó yerero asá yiriní enejo khoyó tanjurí.

rokó yerengurí. Huru-huru koro tapá uni irisa  
 ɲu asá yerero <sup>23</sup> sokomeko mande ka nakayáɲoro  
 kandeyarimo ri toɲengurí. Mande ɲuko ɲandiro,

Asá yerewí unindoya tapá unindoya, yeɲo  
 topo-topoye, sokome ɲa nakayáɲato ye uni  
 wini meyowo inɲondutu tero Antiok yendé,  
 Siria mira, Silisia mirako yotengɔ qu, yeno  
 uyarete. Kosa meté.

<sup>24</sup> Nore koɲgo ɲande inɲatowó, ko uni kumi  
 nore koɲgo uro mande kondé ka yimiriɲo,  
 inɲondata tero yeɲo inɲo-inɲoye quhurí teyara.  
 Quko norendo mande ɲu yewero kama asá  
 yeretowó. <sup>25</sup> Asa ko nore newonde kanata  
 na tero mande kusiyoro uni topo irisa rokó  
 yerero asá yereto noreɲo toponani horé  
 Barnabas, Pol ɲuya yeno utengɔ. <sup>26</sup> Irisa ɲuko  
 eneɲo yoto-yotoyari rotoro Uni Paráminani  
 Yesu Kristo††† koro owímo khoyó teyotiri.  
<sup>27</sup> ɲunde ɲuro norendo Jutas koya Sailas  
 koya asá yeretowó. Eneɲo maɲgoyarimbo  
 mande ɲa re ye yunowari. <sup>28</sup> Dokoro Yuɲa  
 Surumímboya noreya ɲande ye inɲatowó, ye  
 meté otete kumi naɲge howewangɔ, o quhurí  
 meyowo ye saɲayemo kama rewato. <sup>29</sup> Otete  
 ɲuko ɲandiro, ye oka unindo rero anutu kota-

---

††† **15:26:** “Yesu Kristo” - komo suki ye-ye unindo Anutuko  
 uni ka rokóɲoní mahero wiri yerete uni parámi horé tunoqeweya  
 qu karo yaɲgurí. Juda unipareto uni maheweya ɲu, “Kristo,”  
 ma, “Mesaiya,” ye nekaɲgurí. Asa Yesu mahini eneɲo unipareyó,  
 “Kristo Yesu,” ma, “Yesu Kristo,” naɲge ye nekaɲgurí.

kota o te yunaᅅgurí ᅅu ma newero, sitú ᅅuya ma newero, númbowe unindo puᅅeye kusiyoyi khumi ᅅu ma newero, se simbururu ma tewero. Ko ye o ᅅu takawaᅅgo tiníqo, meté yowaᅅgo.

Ime yuri.

<sup>30</sup> Asa asá yiri Antiok uro unipare kopo yerero sokome ᅅu re yunaᅅgurí. <sup>31</sup> Unipare sokome ᅅu weyoyi newondeye wikundiyoní niᅅgu-niᅅgu taᅅgurí. <sup>32</sup> Jutas koya Sailas koyako ye-ye uni.††† Nunde ᅅuro mande meté qambu uni topo yimitoro wikundi yiririyó. <sup>33</sup> Yate naru piru ᅅunde rotoní uni topo ᅅundo uni irisa ᅅu yorero imemo asá yiri oro unindo asá yiri mahiriyó quno ᅅuno pitu ko oriyó. <sup>34</sup> (-)§§§ <sup>35</sup> Quko Pol koya Barnabas koya Antiok ᅅuno yariyó. Irisa ᅅuya meyowo ᅅuya mande rondaqe unipare yunoro miti mande\* yesowoyaᅅgurí.

*Pol koya Barnabas koya mande saᅅgirí tariyó*

<sup>36</sup> Imemoᅅgo ta Polko Barnabas ᅅande miraró, “Nore irisa oya uni topo yendémo Uni Parámimboro mande qu yesowarowó quno yoteᅅgo ᅅundo date yoteᅅgo, ᅅu qene

††† **15:32:** “ye-ye uni” ᅅuko Anutuko mandí yunoní unipare yunaᅅgurí. §§§ **15:34:** Komo suki Lukiko sokome soso ᅅa nakayaᅅaró, yate-yate uni meyowombo mande ka sowe taró. Mande ᅅuko ᅅandiro: <sup>34</sup> Quko Sailas ᅅuno yorowero ye iᅅaró.

\* **15:35:** “miti mande” ᅅuko Anutuko Kristo asáᅅoní khumoro quhurínanimboro kimo tiní Anutu koya newonde kanata tewero ᅅuro mande meté mu nange.

inowaro.” <sup>37</sup> Barnabasko Jon, owí kako Mak, ñu re ñuya owero ye inaró. <sup>38</sup> Quko Polko ñande yaró, “Uni ñako komo Pambilia yendémo ñuno norotaró ñuno qu, enendo noreya kho kama taró, ñunde ñuro noreya kama uwato.” <sup>39</sup> Ñunde yero kiro puso tero usowo-sowo tariyó. Barnabasko Mak rero wangowore Saipras noko mosowímo ñuno oriyó. <sup>40</sup> Polko Sailas riní uni topo ñuno qundo ñande yangurí, “Uni Parámimboro samaka-samaka tuwó yariya yoweya,” yi tonjiriyó. <sup>41</sup> Tonjero Siria mirawore ko Silisia mirawore uyaro Anutu koro huru-huru ñu rukiso yereriyó.

## 16

### *Timotiko Pol koya kopariyó*

<sup>1</sup> Asa Polko uyareyate Deripe yendémo ñuno uroqo Listira yendémo ñuno ñuya uró. Ñunoko Yesu koro ino-ino rewero uni ka\* ñuno yora, owí Timoti. Juda pare ka inondutu taró, ñuro nanuní, quko iwí muko Grik uni ka. <sup>2</sup> Topo unipare Listira nongo ko Aikoniam yendé mongo qundo oteteyó ñuro ñande yangurí, “Timoti ñuko uni meté.” <sup>3</sup> Polko Timoti koya tonjewero ye inaró. Ñunde ñuro Juda uni ñuno yango ñuro inoro Timoti re kowí tonjaró. Dokoro uni soso inangurí, Timoti

---

\* **16:1:** “ino-ino rewero uni” ñunde qundo rondage-rondage unindoya uyaro ino-ino yunoyaró.



iwí muko Grik uni ka.† <sup>4</sup> Asa tojero uyareyate yendéne-yendéne oro, komo asá yerewí unin-doya‡ tapá unindoya Yerusalem ηuno mande kusiyoro sokome ηu nakayáηaηguri qu, ηu rero unipare yunaηguri. Yunoro ηande yimiranηguri, “Ye ηu nanje howeyuri.” <sup>5</sup> Njunde ηuro unipare ijondutuye kondé horé tiní naru rokóηoro huru-huru ηundo sowe tiní qambu tunoqeyara.

*Polko Masedonia koro uni ka quko qeneró*

<sup>6</sup> Asa Yuqa Surumímbo Pol koya topémboya soré yerero Esia mira parámi quno ηuno mande ma yesowowero ηunde yero soré yereró. Asa ko Pirikia mira ko Galesia mira kewerowore yateyanηguri. <sup>7</sup> Yate-yate Misia mira koro wembóηgo ηuno mahero Bitinia mirako uyarewero ye iηaηguri. Quko Yesu koro Yuqa ηundo soré yereró. <sup>8</sup> Asa ko Misia mira ηu takaro windi tapémo Tiroas yendémo ηuno uηguri. <sup>9</sup> Suwono Polko Masedonia mira koηgo uni qu ka quko qeniní kaηero Pol nekoro ηande miraró, “Ke windi karóηoya Masedonia ηano mahe nore samaka yere,” yaró. <sup>10</sup> Njunde qenero nore ηande iηatowó, ko Anutuko miti mande§ ηuno yesowo

---

† **16:3:** “kowe tojowero” murí muko ηandiro: Juda pareto simó urumuni ka pisiyoní kosa naru kande sanijoro kapusa ηunde rotoní hutuηo mande howero kowí toηaηguri. Njunde tero eneko Anutu koro simó rokóηaηguri. Ko uni wini meyowo qu kato mahero Anutu potoruku tewero kondé iηaró tiníqo, ene ηuyako eneηo kowí toηaηguri. ‡ **16:4:** “asá yerewí uni” ηuko Yesuko rokó yerero asá yiriní eneηo khoyó taηguri. § **16:10:** “miti mande” ηuko Anutuko Kristo asáηoní khumoro quhurínanimboro kimo tiní Anutu koya newonde kanata tewero ηuro mande meté mu nanje.

yimirowero neko nereró. Nunde ηuro Masedonia uyarewero sunará tatowó.

*Litiako inɔndutu taró*

<sup>11</sup> Asa Tiroas nonɔgo wanɔgowore roneneɔo karóɔoro Samotires noko mosowímo ηuno uy-atowó. Ko saraɔoníqo, Neapolis yendé windi tapémo ηuno otowó. <sup>12</sup> Nju nonɔgo Filipai yendémo khewore otowó. Komo Rom unindo yendé ηu rero ηuno kunditeyaɔgo.\*\* Njuko Masedonia mira koro yendé korete qu. Nore naru piru ta yendémo ηuno yatowó.

<sup>13</sup> Asa Sapat naruko†† ηuno yendé rotoro hariri tewero mira tomó ka seɔaro sono kano utowó. Uro kunditero pare kumi ηuno kopoyaɔgurí ηu yiyoro eneya mande yatowó. <sup>14</sup> Taiataira mira koɔgo pare ka, owí muko Litia, ηundo mande ηu inɔaró. Enendo tuwi mandumi huririyó sowe-yoyara,‡‡ ko Anutu potoruku te inoyara. Asa inɔoní Uni Parámimbo newondí riní Polko mande yaró ηu inɔndutuwoyaró.

<sup>15</sup> Inɔndutuworo eneya suwisawiyómboya sono raɔgurí. Ri kini tiní nore nimiraró, “Ye nondo Uni Parámimboro hamó inɔndutu teyoteno, yero

---

\*\* **16:12:** “Filipai yendé” ηuko Masedonia mirako yora. Komo suki Rom unindoro kuma unindo yendé unipare ηu taka yerero yendé sopoyaɔgurí. †† **16:13:** “Sapat naru” ηuko sonda naru weɔa ηu. Nju naruko ηuno Juda unipareto huru-huru yayemo huruworo Anutu koro mandí weyoyi inɔoro hariri teyaɔgurí. Filipai yendémo ηuno Juda koro huru-huru ya moré kini peka. ‡‡ **16:14:** Tuwi mandumi huririyó ηunde quko kimoyó parámi, asa ko Litiako wondo pare ka peka.

inotenjo tiníqo, asa meté mahero yanemo yuri qembe.” Nunde yiníqo, eneya uyatowó.

*Unindo Pol, Sailas yorero kusi-kusi yano yoro-tangurí*

<sup>16</sup> Naru kano nore hariri tewero mira tomómo nuno utoqo kho pare kato kheko wisumu nerero niyaró. Yuqa kato pare newondímo yoní enenjo mangómo do ka imemo tunoqeweya nuro yeyara, ko unipareto mandí inowero wondo parámi enenjo sopo-sopoyó yunoyangurí. <sup>17</sup> Asa enendo nore nohowero kondé nande kiweyaró, “Uni nako Anutu Koreko Horé yote nuro sunará simójo. Enendo rambaruru takawero kheyó ye yimi-toyotenjo,” yará. <sup>18</sup> Kosa naru qambu nuno pare nu nunde te yate-yate Pol nuro piyiminoro rohoréjoro yuqa nu nande miraró, “No Yesu Kristo<sup>SS</sup> nuro owímo kimiroteno, pare na roto tonje!” Nunde yiníqota roto tonjeró.

<sup>19</sup> Asa yuqa nu roto tonjiní pare nuro sopo-sopoyómbó nande ye inangurí, ko wondo kanjuya kama rewango. Nunde nuro Pol koya Sailas koya yondoworo yowosoro tapá uni kopoyango quno ongurí. <sup>20</sup> Yorero mande ronda-ronda uni tonjeyemo oro nande yimirangurí, “Juda uni irisa nando norejo yendé unipare qu okoko yiriri newondeye piyo tete. <sup>21</sup> Enendo murí ka rondaje

---

**SS 16:18:** “Yesu Kristo” - komo suki ye-ye unindo Anutuko uni ka rokónoní mahero wiri yerete uni parámi horé tunoqeweya qu karo yangurí. Juda unipareto uni maheweya nu, “Kristo,” ma, “Mesaiya,” ye nekanjurí. Asa Yesu mahiní enenjo unipareyó, “Kristo Yesu,” ma, “Yesu Kristo,” nange ye nekanjurí.

yunoyotiri, quko nore Rom unipareto muriye ñu howewero mepémo kini.”

<sup>22</sup> Unipare qambu qundo uni irisa ñuya kiro puso yero yesará yerengurí. Ko mande ronda-ronda unindo kumba tukuni yanğurí, kowe punu-punuyari se rotoya kumukopo yuto haususu yiri. <sup>23</sup> Nñunde yiğo, kumukopo qambu yutoro yorero kusi-kusi yano yorotağurí. Yorotoro mande kondé ka kusi-kusi ya koro sopo-sopo ñu mirağurí, ke ña meté sopo yere qembe. <sup>24</sup> Mande kondé ñu inğoro sopo-sopo uni ñundo yorero kusi-kusi ya quroko yorotoro kheyari kewá irisa-irisa keweroko quño ñuno kusi yereró.

<sup>25</sup> Suwo keweroko Pol koya Sailas koya Anu-tuwore hariri tero yambo yeyori kusi-kusi uni kumi inğurí. <sup>26</sup> Asa waka ta kunduru parámi ka rağoro kusi-kusi ya tatáño soso toño wisiyoní ya mako soso kosoní utó kondé qu kusi-kusi uni kandeyemo ñu soso tondağaró. <sup>27</sup> Nñunde tiní sopo-sopo uni ñu otoğoro kusi-kusi ya mako qeneró muko soso kosoro koğó taró. Qenero kusi-kusi uni soso soreteğgo, peka, ye inğoro suke parámi ka wosoro eneño kowí uto khumowero taró.\*\*\* <sup>28</sup> Quko Polko kondé nekaró, “Koweke ma rambaruruwowero! Noreko soso ñana yoteto!”

<sup>29</sup> Sopo-sopo uni ñu suru koro nekoní re mahe inoyi toworo khenğero ya quroko oro khe

---

\*\*\* **16:27:** Sopo-sopo uni ñundo ñande ye inğaró, ko kusi-kusi uni soso sorewango tiníqo, enendo topé piyimi reweya. Nñunde ñuroko koretero eneño kowí uto khumowero ye inğaró.

kandí yukuwoní Pol, Sailas tanɣeyarimo umbu ranɣaró. <sup>30</sup> Asa yore yondoworo mirako umburo nɣande yaró, “Awa-awane, no date tero rambaruru takawano?”

<sup>31</sup> Yiní nɣande yariyó, “Ke Uni Parámi Yesu koro inɣondutu tekata, Anutuko keya suwisawikepoya yoriní rambaruru takawaŋgo.” <sup>32</sup> Nunde yero eneya suwisawiyómboya Uni Parámimboro mande qu re yunariyó. <sup>33</sup> Ko suwo keweroko nanɣe sopo-sopo uní nɣundo yorerero mamayari sonowaró. Sonowoní eneya suwisawiyómboya yorerero sono re yunariyó. <sup>34</sup> Nunde tiriqo, yorerero yayómo oro o qoyarimboro yunaró. Ko yano kopoyaŋgurí nɣundo niŋgu-niŋgu parámi tanɣurí, dokoro enendo Anutu inɣondutuwoyaró.

<sup>35</sup> Asa saraŋoníqo, mande ronda-ronda unindo kumba tukuni asá yiri mahero yaŋgurí, “Keto uní irisa ŋu yorotoka toŋiri.” <sup>36</sup> Yiri kusi-kusi ya sopo-sopo nɣundo Pol miraró, “Mande ronda-ronda unindo yari yorotika toŋiri yeteŋgo. Nunde nɣuro kusi-kusi ya roto toŋiri newondeyari ime yoní.”

<sup>37</sup> Quko Polko kumba tukuni yimiraró, “Nore irisa nɣako Rom uní, ko o piyimi ka kama taro. Quko ronda-ronda uní nɣundo nore nondoworo unipare toŋeyemo haususu nerero kusi-kusi yano nɣano norotaŋgo. Ko itaka mondó ta noroti toŋewaro, peka? Kini horé! Eneŋombo mahero

norero eneya mirako amuno uwato.” †††

<sup>38</sup> Asa kumba tukunimbo ronda-ronda uni mande ŋu yimiranḡurí. Yimitoro, irisa ŋuko Rom koro uni qu, yi inoro sasaro tanḡurí. <sup>39</sup> Uyaró o piyimi tanḡurí ŋuro yunḡuna yerero yorero yendémo umburo kira yereḡurí, ko mira ŋa rotoya mira meyowomo toḡiri. <sup>40</sup> Nunde yiḡo, kusi-kusi ya rotoro Litiako yano oriyó. Oro uni topo ŋuno yiyoro newondeye rukisoyoro toḡiriyó.

## 17

*Tesalonaika yendémo mande yesowori kuma tanḡurí*

<sup>1</sup> Asa Pol koya Sailas koya kheyarimbo yate Ambipolis yendé ko Apolonia yendéwore uyarey-ate Tesalonaika yendémo oriyó. Yendémo ŋuno Juda koro huru-huru ya qu ka ŋuno yora. <sup>2</sup> Asa Sapat naru\* kapusa ŋunoko Polko eneḡo murí howero huru-huru yano oro Anutu koro sokome ŋu† rondaḡe yunoro <sup>3</sup> ḡande witú yereró, ko mande ŋuko ḡande yete, Kristo ŋuko hamó kowe surumí rero khumoro pitu ko otoḡoweya. Ko

---

††† **16:37:** Polko Rom koro uni, ŋuya Juda koro uni qu ka. Komo, eneḡo iwímbope ma usí peka owé ka rero Rom koro uni tunoḡaró. Nunde ŋuroko iwímboro sowe qu ŋuya Rom koro uni tanḡurí. Rom uni nunde quko oteteyembo topé piyimi kina kama ranḡurí. Asa ko ronda-ronda unindo o piyimi Pol te inanḡurí ŋuko Rom koro hutuḡo mandeye nunde wendaḡanḡurí. \* **17:2:** “Sapat naru” ŋuko sonda naru weḡa ŋu. Nju naruko ŋuno Juda unipareto huru-huru yayemo huruworo Anutu koro mandí weyoyi inoro hariri teyanḡurí. † **17:2:** “sokome” ŋuko Anutu koro mande korete qu, asa Murí Tero yate Malakai kini tete.

ñande yaró, “Kristo ñuko<sup>†</sup> Yesu na, nondo eneño yesowoyoteno ña.” <sup>4</sup> Nñunde yini Juda unipare kumimboya Grik unipare Anutu potorku te inoyango qambu ñuya yendé ñuro pare pará-pará kumimboya inondutu tero Pol koya Sailas koya kopangurí.

<sup>5</sup> Quko Juda uni kumimbo ñuro newonde tutu tero uni piyimi kina yendémo wimbo-wimbo kunditeyango ñuya unipare qambu ñuya yorero kuma tunoqewero newondeye kasiyangurí. Asa enendo Pol, Sailas yowosoro mande khono yorotowero quro Jesonko ya qu wisumunoro seqa yereñgurí. <sup>6</sup> Iriisa ñu kama yiyoro Jeson koya uni topo kumimboya yowosoro yendé ñuro tapá uni toneyemo yorotoro kondé ñande yanğurí, “Uni ñu mira soso ñuno unipare newondeye roworemoyotiri ñundo yendé ñano mahetiri ña. <sup>7</sup> Ko Jesonko uni ñu yore ene yano oró. Uni ñako Sisa§ koro hutunjo mande soso ñu wendaqero ñande yeyotengo, wiri yerete uni parámi kanğuya yote, owí muko Yesu.” <sup>8</sup> Nñunde yiğo, unipare qambu ñuya tapá unindoya inodata parámi tanğurí. <sup>9</sup> Nñunde ñuro tapá unindo yimiri Jeson koya uni meyowo ñuya mone yuni towi roto tonğurí.

*Beria yendémo mande yesowori meté inğangurí*

<sup>10</sup> Asa suwo tiníqo, uni topo ñundo Pol koya Sailas koya asá yiri Beria yendémo ñuno

---

<sup>†</sup> **17:3:** “Kristo” ñuko Anutuko rokóñoní mahero wiri yerete uni parámi horé tunoqaró ñu. **§ 17:7:** “Sisa” ñuko Rom koro wiri yerete uni parámi ñu. Rom unindo mirane-mirane wini soso sopo yereñgurí.

uyaririyó. Nuno Juda koro huru-huru ya\*\* quroko oriyó. <sup>11</sup> Beria unindoro muriye muko meté horé, ko nundo Tesalonaika yendé unindoro muriye takaró. Iriisa nundo mande yariyó nu inoro meténoyangurí. Kowe naru rokóhoro mandeyari nu hamómbe ma kini inowero quro murí Anutu koro sokome qu†† weyo seqayangurí. <sup>12</sup> Nunde nuro Juda uni qambu inondutu tangurí. Grik pare kumi owéye moré ko Grik uni qambu nyaya inondutu tangurí.

<sup>13</sup> Asa Juda unindo Tesalonaika nuno nande inangurí, ko Polko Beria nuno Anutu koro mande yesowoyaró. Nunde nuro nuno mahero unipare qambu wimbo-wimbo yorango nu newondeye kasiyoyi sangirí tangurí. <sup>14</sup> Waka ta uni topo nundo Pol asányoyi windi tapémo uró, quko Sailas koya Timoti koyako Beria nuno yariyó. <sup>15</sup> Asa unindo Pol re kheko umbungurí, reyate Atens yendé parámimo rotangurí. Rotoro pitu ko oro Polko Sailas, Timoti koro mande kondé ka yaró nu re ongurí. Mande nuko nandiro, “Yari waka ta nono mahiri qembe,” yaró.

*Polko Atens yendé parámimo nuno mande yesowaró*

<sup>16</sup> Asa Pol Atens yendé parámimo nuno sopo yereyate yendémo nuno anutu kota-kota koro kapí-kapí qambu towoyuri qeneró. Nuro

---

\*\* **17:10:** “huru-huru ya” nuko Juda uniparetoro ya parámi mu. Sapat naruko nuno hu-hariri tero Anutu koro mandí weyoyi inoro hariri teyangurí. †† **17:11:** “sokome” nuko Anutu koro mande korete qu, asa Murí Tero yate Malakai kini tete.



newondí piyo taró. <sup>17</sup> Nunde tero ene huru-huru yano<sup>‡‡</sup> oro Juda unindoya uni wini meyowo Anutu potoruku te inoyango quya mande taró. Ko naru rokóŋoro kopo-kopo yendémo oro unipare ŋuno kopoyango ŋuya mande taró. <sup>18</sup> Kopo-kopo yendémo ŋuno iŋo-iŋo uni kumimbo mahero eneya mande yangurí. Uni kumi ŋuko, “Epikurian,” ye nekoyangurí, ko kumi, “Stoik,” ye nekoyangurí. §§ Kumi ŋande yangurí, “Uni ŋako wuruware mande yeyote. Do ka yewero yete?” Quko kumi, “Mira meyowomboro anutuye ŋuro yesowoyote, peka,” yangurí. Nunde yangurí, dokoro Polko Yesu uni tapu koŋgo pitu ko otoqaró ŋuro miti mande yesowaró. <sup>19</sup> Asa ko Pol rero tapá unindoro huru-huru ŋu, owé muko Areopakus, ŋuno oŋgurí. Oro ŋande yangurí, “Ketope meté mande keta rondaŋe yunoyote ŋu nore nimirí iŋowato? <sup>20</sup> Hamó, mande amana yi iŋoteto, ko murí ŋuro iŋowero ye iŋoteto.” <sup>21</sup> (Atens yendémo ŋuno naru rokóŋoro uni soso, asa mira simburí ŋuya mira meyowo quya, kina kaŋero mande amana ŋu iŋoro mande ŋuro epe mito-mito teyanggo.)

<sup>22</sup> Asa Polko Areopakus huru-huru keweroyemo kaŋero ŋande yimiraró, “Ye Atens

---

‡‡ **17:17:** “huru-huru ya” ŋuko Juda uniparetoro ya parámi mu. Sapat naruko ŋuno hu-hariri tero Anutu koro mandí weyoyi iŋoro hariri teyangurí. §§ **17:18:** Iŋo-iŋo uni ŋu, “Epikurian” unindoya “Stoik” unindoya iŋo-iŋo enesó-enesó howeyangurí. Uni wini meyowombo anutu enesó-enesó potoruku te inoyangurí, Anutu hamó ŋuro kama iŋangurí. Huru-huru irisa ŋundo anutu soso ŋu yorotoro eneŋo iŋo-iŋoye nanŋe howeyangurí.

uni, nondo yeño muríye qeneyoteno, yendo naru rokóño anutu enesó-enesó potoruku te yunoyotenjo. <sup>23</sup> Hamó, nondo yendéyewore uyareyate o ɲuro potoruku te yunoyotenjo qu qeneyoteno. Qenero wondo yakutí ka<sup>\*\*\*</sup> qenetenó, ko ɲuno ɲande nakayáŋgurí, ‘Ñako anutu ka nore kama iño inoteto quro wondo yakutí.’ Asa itaka nondo Anutu ye kama iño inoyoteno, quko potoruku te inoyotenjo ɲuro yesowowe teteno.

<sup>24</sup> “Anutu ɲuko noko koya o soso ɲuno yorote ɲuya yondowaró, Anutu ɲuko noko sambo koro uni parámi ɲu. ɲunde ɲuro eneko unindo ya kandeyembo towaŋgurí quno ɲuno kama kunditeyote. <sup>25</sup> Kowe o karo tukuni tiní unindo kandeyembo kama samakaŋoyotenjo. Kini, eneɲombo uni soso yoto-yotoye ɲuya yuqaye ɲuya soso yunoyote. <sup>26</sup> Enendo puko kanata naŋge qu nonjo uni wini soso yondowoní tunoqi mirane-mirane yorotaró. ɲunde tero eneɲombo naruye yunoro miraye rokóŋaró. <sup>27</sup> ɲunde tero, unindo no seqa nerewero wimbo-wimbo toɲeteroqo niyowaŋgo, peka, ye iñaró. Ko enendo nore soso taŋgenanimó yote. <sup>28</sup> Hamó, yeño iño-iño uniye kato ɲande yaró, ‘Ene quroyómo naŋge norendo kunditero otoqo uya mahe tero yoteto,’ yaró, ko kako ɲande yaró, ‘Noreko eneño simó,’ yaró.

<sup>29</sup> “Asa, nore Anutu koro simó yoteto, ɲunde ɲuro oka unindo yero iñoro towaró qu, asa gol kape ma silwape ma wondo ɲuko Anutu qembe

---

\*\*\* **17:23:** “wondo yakutí” ɲuko o qa-qa unindo ɲu yakutímo ɲuno o qa-qa taŋgurí.

yero ma inowero. <sup>30</sup> Nunde njuroko komoko Anutuko yeño oteteye kape-kape njuro kama inaró, guko itakako nande yete, ye uni noko soso njuno yotengo qu, ye newonde rohoré ti. <sup>31</sup> Dokoro enendo otete ronenejowí howero uni soso ronda yerewero guro naru ka rokónaró. Ko rondaronda uni ka rokónaró. Nore meté uni nu inondutuwowato, dokoro uni nu khumoní Anutuko uni tapu konjo riní otoqaró.”

<sup>32</sup> Nunde yini uni ka uni khumaró qundo pitu ko otoqaró njuro mandí inangurí quno njuno kumimbo huwó mande yangurí. Ko kumimbo nande yangurí, “Norendo pitu ko o naro inowato.” <sup>33</sup> Yiqo, Pol yorotoro toneró. <sup>34</sup> Tonini uni kumi inondutu tero eneya womangurí. Njuko Daionisias, Areopakus huru-huru nu nonjo qu ka, ko pare ka, owí Damarisi, ko kumi meyowo njuya.

## 18

### *Polko Korin yendémo njuno mande yesowaró*

<sup>1</sup> Imemongo Pol Atens yendé rotoro Korin yendémo oró. <sup>2</sup> Komo Rom koro wiri yerete uni parámi horé Kolotias njundo hutunjo mande ka yero Juda uni soso Rom yendé monjo yohowini tonjengurí. Nunde yohowini yereka irisa, owéyari Akwila, ko Prisila, njundo Itali mira\* rotoro Korin mahiriyó. Akwila njuko Pontus mira koro uni qu ka. Asa Polko Korin yendémo mahero yereka njuya kopangurí. <sup>3</sup> Yereka irisa njundo eneya kho kopo tero tuwi yamaru tinjyoyango. Nunde njuro

---

\* **18:2:** “Itali mira” njuko Rom yendé njuro mira qu.

ene irisa ñuya yotoro kho teyaŋgo. <sup>4</sup> Ko Sapat naru† soso ñuno Polko Juda koro huru-huru yano oro mande teyara. Ene, Juda unindoya Grik unindoya iño-iñoje reweka otoqoníka Yesu koro iñondutu ti, yero ñunde teyara.

<sup>5</sup> Asa Sailas koya Timoti koya Masedonia mira rotoro Korin ñuno uriqo, Polko koweyumu tero Anutu koro mande qu yero Juda unino mande yesowo ñande yaró, “Yesu ñuko Kristo‡ ñu.” <sup>6</sup> Quko uni ñundo eneya kiro puso tero yesará yereyaŋgo quno ñuno eneño saŋgiríño witú yerero kowe punu-punuyó towo kuriyoro ñande yimiraró, “Yeñombo naŋge yeño rowore yereyowaŋgo. Ñu quhurí ñuko neneño kini. Ña naruko ñanoko yate uni wini meyowo ñu§ mande yesowo yimirowe teteno.”

<sup>7</sup> Ñunde yero huru-huru ya ñu rotoro, uni kako, owí muko Titius Jastus, ñundo yano oró. Uni ñu Anutu potoruku te inoyara. Ko yayó muko Juda koro huru-huru ya sumeyoro. <sup>8</sup> Ko Juda koro huru-huru ya\*\* koro sopo-sopo uni, owí Kirisipus, ñuya eneño suwisawiyó soso, Uni Parámimboro iñondutu taŋgurí. Ko Korin uni qambu Pol koro mande ñu iñoro iñondutu tero

---

† **18:4:** “Sapat naru” ñuko sonda naru weña ñu. Ñu naruko ñuno Juda unipareto huru-huru yayemo huruwo ro Anutu koro mandí weyoyi iñoro hariri teyaŋgurí. ‡ **18:5:** “Kristo” ñuko Anutuko rokóñoní mahero wiri yerete uni parámi horé tunoqaró ñu. § **18:6:** “uni wini meyowo” ñunde quko Juda unipare kini qu naŋge. \*\* **18:8:** “huru-huru ya” ñuko Juda unipareto ro ya parámi mu. Sapat naruko ñuno hu-hariri tero Anutu koro mandí weyoyi iñoro hariri teyaŋgurí.

sono ranğurí.

<sup>9</sup> Asa suwo kano Uni Parámimbo quko Pol nğande miraró, “Ke ma sorewero. Kini, mande yesowo; maņgoke ma kusiyowero. <sup>10</sup> Nondo keya yowano, uni ka otoqoro ke kama rambaruru kerewaņgo. Neneņo unipare qambu ŋu yendémo nğano yoteņgo.” <sup>11</sup> Pol Korin ŋuno yoní kumima naru kanata ko kombo kande saņiyoro kanata nğunde kini tiní Anutu koro mande rondaqe yuno-yaró.

<sup>12</sup> Naru kano Galio nğundo Akaia mira ŋuro uni kembéye yora.†† Asa Juda unindo mande kusiyoro Pol koya saņgirí taņğurí. Nğunde tero rero mande khono rotoro nğande yaņğurí, <sup>13</sup> “Uni nğando unipare iņo-iņoye riní otoqoro noreņo hutuņo mandenani wendaqero murí enesówore Anutu potoruku te inoyoteņgo.”

<sup>14</sup> Asa Polko mande topé yewero taró quno ŋuno Galioko Juda uni nğande yimiraró, “Ye Juda uni, uni nğando hutuņo mande ka karóņoro otete piyimi parámimbe ma tomó tiníqo, asa nondo mande ye iņowano. <sup>15</sup> Quko oseseye nako kina mande ka, yendo owé karo koya yeņo hutuņo mandeye ŋuro yeteņgo. Enina, yeņombo naņge nğa roņgaruwi. Noko osese nğa iņowero piy-imiņoteno.” <sup>16</sup> Nğunde yero mande kho noņgo yohowaró. <sup>17</sup> Yohowiní Juda uni soso nğundo eneņo huru-huru ya koro sopo-sopo uni, owí

---

†† **18:12:** “Akaia” ŋuko Grik unindoro miraye qu ka, quko Rom unindo unipare ŋu sopo yereyaņğurí. Nğundiro naņge Galio ŋuko Rom koro uni ka, ko Akaia mirako ŋuno Korin yendé parámi ŋuko yendé korete qu.

Sositenes koya saŋgirí tero toworo ya kimbino ŋuno uraŋgurí. Quko Galioko o taŋgurí ŋu qenero ŋuro kama iŋaró.

*Polko Siria mirako Antiok yendémo ŋuno pitu ko oró*

<sup>18</sup> Asa Polko naru piru Korin yendémo yora. Yate Siria mirako pitu ko uyarewero ye iŋoro uni topo, ime yuri, yero yorotoro eneya Prisila koya Akwila koya Senkiria yendé moŋgo waŋgowore uyareŋgurí. Quko koretero Anutu yuŋganaŋoro huí toŋaró, dokoro komo enendo Anutu koya mande kondé yaró.†† <sup>19</sup> Asa waŋgowore uyareyate Efesus yendémo ŋuno mahero Polko yereka ŋu ŋuno yorotoro Juda koro huru-huru ya§§ quroko oro eneya mande teyate <sup>20</sup> ŋande miraŋgurí, “Ke noreya soŋga piru yate ta.” Quko, “Mepémo kini,” yero <sup>21</sup> yorotoro toŋewero tero yaró, “Asa Anutuko ŋuro iŋote tiníqo, pitu ko yeno ŋano mahe-wano.” Yero waŋgowore Efesus rotoro <sup>22</sup> Sisaria yendémo ŋuno mahero waŋgo rotoro Yerusalem oro iŋondutu huru-huru ŋunoko naru meté yero yorotoro Antiok ŋuno uró. <sup>23</sup> Antiok ŋuno yateyate toŋero Galesia mirawore ko Pirikia mirawore yendéne-yendéne ŋuno uyaro Yesu koro

---

†† **18:18:** Polko do mande ka Anutu koya yero huí kama toŋaró, nore kama inoyoteto. Nandiro peka, Anutuko ene Korin yendémo ŋuno kawaware tewero quro mande ka yaró (Asá yerewí Uni 18:10 amena weyo qembe). Yiní Polko o ŋu rokóŋoro huí kama toŋaró. Asa ko yate Pol rambaruru kama rero yuŋganaŋoro huí toŋaró.

§§ **18:19:** “huru-huru ya” ŋuko Juda uniparetoro ya parámi mu. Sapat naruko ŋuno hu-hariri tero Anutu koro mandí weyoyi iŋoro hariri teyaŋgurí.

injo-injo rewero unipareyó soso ηu<sup>\*\*\*</sup> rukiso yereyaró.

*Apolosko Efesus yendémo ηuno Yesu koro mande yesowaró*

<sup>24</sup> Ko Juda uni Aleksandria yendé mongo qu ka, owí muko Apolos, ηundo Efesus yendémo ηuno maheró. Eneño mande yewero murí ηuko kekere qu nanje, ko Anutu koro sokome ηu<sup>†††</sup> injomukaró. <sup>25</sup> Komo kumimbo Uni Parámimboro khe quro injo-injo inanjurí, ko newondímbo wimbí tero Yesu koro mande okeyá ta unipare rondage yunoyara. Quko Jonko sono re yunoyara murí ηu nanje injaró. <sup>26</sup> Asa hurí rero Juda koro huru-huru yano<sup>†††</sup> oro kondé yiníqo, Prisila koya Akwila koya injoro rero Anutu koro khe ηu okeyá ta ronenejoro witúnariyó.

<sup>27</sup> Naru kano Apolosko Akaia mirawore uyarewero ye injoní uni topo ηundo injo-injoyó wikundiyoro sokome ka nakayáñoro injo-injo rewero unipare ηuno yanjurí ηu yunanjurí. Uni ηa ri qembe, ye nakayáñanjurí. Asa ηuno uyaro enendo unipare samaka-samaka tuwówore<sup>§§§</sup> injondutu tanjurí qambu ηu samaka yereró. <sup>28</sup> Dokoro kondé kanjero Juda unindo injo-injoye

---

<sup>\*\*\*</sup> **18:23:** “injo-injo rewero unipare” ηunde qundo rondage-rondage unindoya uyaro injo-injo yunoyaró. <sup>†††</sup> **18:24:** “sokome” ηuko Anutu koro mande korete qu, asa Murí Tero yate Malakai kini tete. <sup>†††</sup> **18:26:** “huru-huru ya” ηuko Juda uniparetoro ya parámi mu. Sapat naruko ηuno hu-hariri tero Anutu koro mandí weyoyi injoro hariri teyanjurí. <sup>§§§</sup> **18:27:** “samaka-samaka tuwó” ηuko Anutu enenjombo nore samaka yereyote. Kimoyó moré kini.

koroqe qu ronenejoro Anutu koro sokome ñu rondaqero, Yesu ñuko Kristo ñu, yero witú yereró.

## 19

### *Polko Efesus yendémo ñuno mande yesowaró*

<sup>1</sup> Asa Apolos Korin yendémo ñuno yoníqo, Pol mira purí itaqero uyare yate-yate Efesus yendémo ñuno uró. Uro Yesu koro iño-iño rewero uni kumi\* yiyoro <sup>2</sup> ñande osese yereró, “Ye inondutu tañgurí quno ñuno yembeka Yuqa Surumí ñu rañgurímbe ma kini?”

Yiní yañgurí, “Kini. Noreko Yuqa Surumí ñuro mandí kama iñato.”

<sup>3</sup> Yi ñande yimiraró, “Ñunde ñuro ye date tero sono rañgurí?”

Yiní ñande yañgurí, “Noreko Jon koro sono qu ratowó.”

<sup>4</sup> Yi Polko yaró, “Komo Jonko unipare sono re yunoro ñande yaró, ‘Ye quhuríyembo newonde surumí teya quhurí ñu se rotoya sono ri. Ko ye uni no huwónemo maheweya ñuro inondutu ti,’ yaró. Asa uni ñuko Yesu.” <sup>5</sup> Ñunde yiníqo, uni ñu iñoro Uni Parámi Yesu ñuro owímo sono ri <sup>6</sup> Polko kandí rero sañayemo riní Yuqa Surumímbo eneno umburó. Umbuní mande enesó-enesó yero Anutu koro mande qu yeyañgurí. <sup>7</sup> Uni soso ñuko 12 ñundiro.

---

\* **19:1:** “iño-iño rewero uni” ñunde qundo rondaqe-rondaqe unindoya uyaro iño-iño yunoyaró.



8 Asa Polko kombo kapusa quroko ηuno Juda koro huru-huru yano† oro Anutuko unipareyó wiri yereyote naruyó‡ ηuro kondé yero iño-iñoye okokowaró. 9 Quko uni kumi eneñombo eneño newondeye kondé kusiyangurí. Nunde kusiyoro iñondutu kama tero unipare toñeyemo Uni Parámimboro khe ηuro yesaráñoyango. Nunde ηuro Polko yorotoro iño-iño rewero unipare yorero toñengurí. Ko naru rokóñoro Tiranas koro iño-iño rewero yayómo ηuno mande ηuro epe mito-mito tañgurí. 10 Nunde teyoní, yateyate kumima naru irisa ηunde kini taró. Asa ko Esia mira unipare soso, Juda ηuya Grik ηuya, Uni Parámimboro mande qu iñangurí.

11 Anutuko Pol kandímo o wimbí moré§ enesó-enesó parámi teyara. 12 Unindo eneño kho tewero koro kowe punu-punuyó ηu ri se khumo uniko sañayemo rañgurí quno ηuno se khumoye ηu kini taró, ko yuqa piyimi mu\*\* yorotoro toñeyango.

13 Juda uni kumimbo wimbo toñero yuqa piyimi mu yohoweyango. Kumi muko Uni Parámi Yesu owí nekoro yuqa piyimi ηu yohowango. Ene ηande yañgurí, “Nondo Polko ηu Yesu ηuro yesowoyote ηuro owímo yeya mande kondé

---

† 19:8: “huru-huru ya” ηuko Juda uniparetoro ya parámi mu. Sapat naruko ηuno hu-hariri tero Anutu koro mandí weyoyi iñoro hariri teyañgurí. ‡ 19:8: “Anutuko unipareyó wiri yereyote naruyómo” ηuno iñondutu unipareko hamó Anutu kusunoyómo yowango. § 19:11: “o wimbí moré” ηuko o enesó-enesó tunoqini Anutu koro wimbí ηunde tunomo yoweya. \*\* 19:12: “yuqa piyimi” ηuko sambo simó ηunde qembe, quko Anutu koro sañgirí tero unipare rowore yereyotengo.

yetano.” <sup>14</sup> Juda o qa-qa unindoro tapá uni ka, owí muko Siva, nundo simó kande sanjoro irisa pisi yereró. Simó nundo kho nunde qu tanğurí. <sup>15</sup> Asa naru kano nunde tiqo, yuqa piyimi nundo nande yaró, “Nondo Yesu ino inoteno, ko Pol ino inoteno. Quko ye dani?” <sup>16</sup> Nunde yini uni nu, yuqa piyimi nuro quroko yaró, nu yutoro taka yereró. Kowe punu-punuye uto romboņero yuto wisikara yirini ya nu rotoyi sitú umbuní birimbiri soranğurí.

<sup>17</sup> Asa Juda unindoya Grik unindoya Efesus yanğurí nundo o nu inoro sasaro tero Uni Parámi Yesu owí hokoyanğurí. <sup>18</sup> Unipare qambu inondutu tero mahero oteteye piyimi nu soso komo teyanğo nu tunomo yesowanğurí. <sup>19</sup> Kumimbo o piyimi wimbí moré teyanğo, nundo o nunde tewero quro ino-ino sokomeye nu se koporo unipare toņeyemo se qayi qaró. Sokome nuro kimoyó soweyanğurí muko nandiro, wondo musiyó silwa 50,000 nundiro. <sup>20</sup> Nundiro nanđe Uni Parámimboro mande qu usaye parámi taró.

<sup>21</sup> Asa o soso nu kini tiniqo, Polko nande ye inaró, “Nondo Masedonia mira koya Akaia mirawore uyaro rotoro Yerusalem pitu ko oroqota rohororo Rom nuno uyarero qenewano.” <sup>22</sup> Quko koretero eneņo samaka-samaka uni irisa, Timoti koya Erasitus koya, yorero asá yirini Masedonia uyaririyó. Ko Pol eneņo muko Esia nuno sonğa ta yora.

*Efesus unipareto Polko mande yaró nu inoro kuma tanğurí*

23 Nju naruko njuno uni kumimbo Uni Parámimboro Khe†† njuro saŋgirí tero kuma parámi ri otoqaró. 24 Uni ka, owí muko Demitrius, enendo anutu pare ka, owí Aritemis, koro ya surumí njuro kapo-kapo ka silwapo towoní uni qambu qundo kimoyi o towoyara uni njundo mone parámi reyango. 25 Asa enendo o towoyara uni njuneko yerero uni kho njunde qu teyango njuya neko yiriní kopoyi njande yaró, “Topo okite, ye injotengo, kho teyoteto njano quwore mone parámi rero meté kunditeyoteto. 26 Ko ye njande qenero injoyotengo, uni njun, Polko Efesus yendémo njano njuya Esia mira parámimo soso njuno njuya unipare qambu yowosoní injo-joye rohoréjoyotengo. Njande yimitoyote, ‘Anutu kandeto towoyotengo njuko anutu hamó kini.’ 27 Hamó, mandímbo mone khonani njarambaruruwoweja. Njuya, mandímbo Aritemis koro ya surumí njun riní unipare injo-joyemo oka kina qembe teweya. Komo Esia unipare soso anutu pare njuro injondutu teyango. Quko Polko mande njando owí parámi njun rambarruruwowero tete.”

28 Yiní injoro saŋgirí parámi tero kondé ye nekaŋgurí, “Aritemis, Efesus koro anutu njuro owí njuko parámi!” 29 Njunde yiyo, yendé unipare soso kiwe uyaro soso koporo khengejoro Pol koro topé irisa Masedonia koro qu, owéyari Gaius koya Arisitakus koya yorero o qenewero yendé

---

†† 19:23: “Khe” njuko murí keta qu injondutu unipareto howeyangurí.

quno<sup>‡‡</sup> ηuno oŋguri. <sup>30</sup> Polko yendé ηuno unipare keweroyewore owero iŋaró, quko Yesu koro iŋo-iŋo rewero unipareto<sup>§§</sup> kusiyanguri. <sup>31</sup> Hamó, Esia mira koro uni pará-pará kumimbo Pol koya topo taŋguri ηundo mande ka ri mahiní kondé ηande soréŋguri, “O qenewero yendé quno ηuno ma owero,” yanguri.

<sup>32</sup> Asa yendé ηuno unipare qambu ηu, iŋo-iŋoye kape taró. Nunde ηuroko kumimbo mande ka yanguri, ko kumimbo mande meyo-owo yanguri. Ko unipare qambu kape tero ηande iŋanguri, nore do murí karo kopoteto, yero iŋanguri. <sup>33</sup> Juda uni ηundo eneŋo topoye Aleksanda wosoyi otoqo unipare qambu toŋeyemo kaŋiní kumimbo kiwero roŋgaruwoyanguri. Ko Aleksandako kandí hokoro mande mande topé huru-huru unipare yimirowero taró. <sup>34</sup> Tiníqo, qenero ηande iŋanguri, ηuko Juda uni ka. Nunde ηuro ene maŋgoye koporo watí-watí ye nekoyanguri, “Aritemis, Efesus koro anutu ηuro owí ηuko parámi!” Ene watí-watí ηunde nekeyuri naru piru

---

<sup>‡‡</sup> **19:29:** “o qenewero yendé” ηunde quno uni kumimbo drama teyaŋgo, ko huru-huru enesó-enesó teyaŋgo. Nuko ya kini, mira purí suruŋono yakutí kunditewero qambu raŋguri. Efesus ηunoko o qenewero yendé ηuko parámi horé, asa unipare 25,000 meté kunditero drama qeneŋguri. **§§ 19:30:** “iŋo-iŋo rewero unipare” ηunde qundo rondaqe-rondaqe unindoya uyaro iŋo-iŋo yunoyaró.

ta ñunde kini taró. \*\*\*

<sup>35</sup> Asa Efesus yendémboro sopo-sopo uni ñundo unipare qambu yiyoro mepa mande yero ñande yaró, “Ye Efesus uni, uni soso ñande injoyotengo, ko nore Efesus uni, norendo Aritemis koro ya surumí ñu sopoyoteto, ko enejo kapo-kapoyó sambo konjo umburó ñu††† sopoyoteto. <sup>36</sup> Uni kato mande ñu rohoréñowero mepémo kini. Ñunde ñuro ye mondó yuri. Ye, oka tato, yero waka ta ma tewero. <sup>37</sup> Dokoro uni irisa ña yore mahetengo, guko ya surumí monjo oka kama momo tariyó, ko noreño anutunani pare ñaro kama yesaráñoyariyó. <sup>38</sup> Asa ko Demitrius koya kho kopo topémboya mande ka yewero injoyotengo tiníqo, asa mande kho tewero naruyó yote, ko uni kembé korete qu yote. Ene mandeye mande khono yewero ña ronjaruwi. <sup>39</sup> Ñunde tiqo, mande ka yorote tiníqo, asa ñuko huru-huru naru horé ñuno huruwooro ñu roneneñowaño. <sup>40</sup> Qeni, noreñombo itaka o tunoqete ñuro mande khono kañewato, peka. Dokoro huru-huru ñako murí moré kini. Ñunde ñuro uni kembémo ñande yewaño, norendo kina kuma teyoteto.” <sup>41</sup> Sopo-sopo uni ñundo yini kini tini, unipare asá yirini tonjengurí.

---

\*\*\* **19:34:** Juda unipare kumi muko Efesus ñuno kunditeyanjuri, ko ene ñuya Pol qembe anutu pare ñu potoruku kama te inoyanjuri. Aleksandako do mande topé ka tewero taró ñu, nore hamó kama injoyoteto. Ñande yimirowero, peka, ko Juda unipare ñuyako Pol koro piyiminanjuri. Ñundiro Pol koro potó ñuko Juda unipareto potó kini. ††† **19:35:** “kapo-kapoyó sambo konjo umburó” ñuko wondo ka, Efesus unipareto potoruku te inoyango.

## 20

### *Polko Masedonia, Grik mirawore khendo uyaró*

<sup>1</sup> Asa kuma ɲu kini tiníqo, Polko Yesu koro injo-injo rewero unipareyó\* neko yiriní ma-hengurí. Mahi newondeye rukisoyoro, ime yuri yero, Masedonia mirako owero yoroto toɲeró. <sup>2</sup> Toɲero Masedonia ɲuwore ɲuno khímbo yate mande parámi yero newondeye rukisoyaró. Ko imemoɲgo yate Grik mirako† uró. <sup>3</sup> Uro yoní kombo kapusa ɲunde kini taró. Yate-yate wanɲowore Siria mirako uyarewero taró, ko Juda uni kumimbo mande kusiyoro, uratoka khumoní, yero taɲgurí. ɲunde ɲuro Pol rohoréɲoro Masedonia pitu ko oró. <sup>4</sup> Uni Pol koya toɲengurí ɲuko ɲandiro: Sopater, Pirus naɲuní, ɲuko Beria yendé moɲgo qu; Arisitakus koya Sekundus koya, irisa ɲuko Tesalonaika yendé moɲgo qu; Gaius, Deripe yendé moɲgo qu, ɲuya Timoti; Tikikus koya Tiropimus koya, irisa ɲuko Esia mira parámi moɲgo qu. <sup>5</sup> Asa uni ɲundo koretero oro Tiroas yendémo ɲuno nore sopo nereɲgurí. <sup>6</sup> Quko norendo Bret Yisiyó Moré Kini ɲuro o ne-ne

---

\* **20:1:** “injo-injo rewero unipare” ɲunde qundo rondaqe-rondaqe unindoya uyaro injo-injo yunoyaró. † **20:2:** “Grik mira” ɲuro owé ɲuko Akaia, ɲuno Korin yendé ɲuko yendé parámi korete qu.

ɲu<sup>‡</sup> kini tiníqota Filipai yendé rotoro windi tapé moŋgo toŋetowó. Ko waŋgowore karóŋoro naru kandeka ɲunde kini tiní windi tapémo mahero Tiroas ɲuno otowó. Noreko naru kande sanjyoro irisa Tiroas ɲuno yatowó.

*Polko Yutikas riní pitu ko otoqaró*

<sup>7</sup> Asa sonda naru korete quno nore uniparetoya bret romboŋero o kopo natowó. § Polko, kuyepo toŋewano, yero mande yeyuri, yate suwo kewero taró. <sup>8</sup> Ya kopoyatowó quno ɲuno wasa koreko ɲuno suru qambu yora. <sup>9</sup> Ko simó keta ka, owí muko Yutikas, enendo wituko kunditeyaró. Asa Pol mande watí yeyoní Yutikas kupo tero etewero taró. Yate ete khumaró, ko wituwore kore koŋgo hamó rokaráŋo nokono uró. Uníqo, unindo, kindo khumote, ye iŋaŋgurí. <sup>10</sup> Ko Pol uro simó keta ɲuro saŋano etero pisiyoro yimiraró, “Ye ma yukuwowero. ɲako toŋí yote.” <sup>11</sup> ɲunde yero rotoro pitu ko oro bret romboŋero re naró. Ko mande piru saŋga sowe tero yeyoní, oro saraŋaró. Saraŋoní Pol roto toŋeró. <sup>12</sup> Ko simó keta ɲu toŋí yoní re towo toŋero newondeyemo niŋgu-niŋgu parámi taŋgurí.

---

<sup>‡</sup> **20:6:** “Bret Yisiyó Moré Kini guro o ne-ne” ɲuko naru parámi ka, asa Israel unipareto sonda kanata soso ɲuno bret yisiyó moré kini naŋgurí. Komo suki Anutuko unipare ɲu Isip noŋgo yorini areŋgurí. Arewero taŋgurí quno ɲuno bret hamó qawero mepémo kini. Kini, bret yisiyó moré kini naŋge, asa plaua, sono naŋge qaŋgurí. ɲunde ɲuroko kumima naru rokóŋoro o tunoqaró ɲuro iŋoro o ne-ne ɲu teyaŋgo. § **20:7:** “bret romboŋero o kopo natowó” ɲuko Uni Parámimboro o ne-ne qu peka.

*Polko Efesus huru-huru koro tapá uni rukiso yereró*

<sup>13</sup> Asa nore koretero uro waᅅgowore uyarero Asos yendémo oro Pol sopatowó. Dokoro koretero Pol eneᅅombo ᅅande yaró, “Nondo khendo Asos owero iᅅoteno.” <sup>14</sup> Asa yate Polko Asos ᅅuno mahiníqo, rero waᅅgowore Mitilini yendémo\*\* ᅅuno uyaretowó. <sup>15</sup> Uyaro etato saraᅅoní uyareyate Kios noko mosowí andusina ᅅuno windi tapémo roto etatowó. Saraᅅoníqo, Samos noko mosowímo uyaro etato saraᅅoní, yate windi tapémo Miletus yendémo uyaretowó. <sup>16</sup> Pol komo iᅅo-iᅅoyómo Efesus yendé takawano, yero iᅅo kusiyaró. Ene naru parámi Esia mira parámimo ᅅuno yowero piyimiᅅoro waka ta toᅅewero iᅅaró. Nᅅu mepémo tiníqo, Pentikos o ne-ne†† naruko ᅅuno Yerusalem yowano, peka, ye iᅅaró.

<sup>17</sup> Asa Miletus ᅅuno Polko mande riní Efesus yendémo oní huru-huru koro tapá uni neko yiriní mahᅅurí. <sup>18</sup> Uni ᅅu eneno mahiᅅo, ᅅande yimiraró, “Ye no naru rokóᅅoro Esia mirako no yeya date yoranowó ᅅuro iᅅomukoteᅅgo. <sup>19</sup> Nondo owéne rewe umbuní tendoro Uni Parámimboro kho qu teyanowó. Quko naru qambuko Juda unindo nori umbuwero mande kusiyoyi quhurí parámi korowanowó. <sup>20</sup> Ko nondo ye samaka yerewero quro mande ka yero kama soreyanowó. Kini, yendé kewero ᅅuya

---

\*\* **20:14:** “Mitilini yendé” ᅅuko Lesipos noko mosowímo ᅅuno yora. †† **20:16:** “Pentikos o ne-ne” naru ᅅuko Juda uniparetoro naruye parámi ka. Taka yereró quro o ne-ne ᅅu kini tiníqo, yate kosa naru 50 ᅅunde rotoro Pentikos tunoᅅaró.



ya enemo-enemo ñuya mande rondaqe yunoy-anowó. <sup>21</sup> Naru rokóñoro nondo Juda unino, Grik unino mande yesoworo ñande yimiranowó, norendo Anutusina mahero newonde rohoré teya Uni Paráminani Yesu koro injondutu tato.

<sup>22</sup> “Asa injoyi, itakako Yuqapo kusi niriní no Yerusalem owé teteno. Nuno do ka nono tuno-qeweya qu, no kama injoteno. <sup>23</sup> Nandiro nanje injoteno, ko yendé soso toneyano quno ñunoko Yuqa Surumímbo ñande nimitoyara, ko kusikusiko nondowoyi quhurí parámi korowowano. <sup>24</sup> Quko nondo yoto-yotone kondé toworo ñu parámi yero kama injoteno. Kini, khe howewe kini teweya, yero injoteno, ko Yesu Uni Parámimbo kho nunaró ñu tewe kini teweya, yero injoteno. Kho ñuko mande yero Anutu koro samakasamaka tuwó ñuro miti mandeyó†† yewero kho qu.

<sup>25</sup> “Asa injoyi, komo no ye keweroyewore Anutuko unipareyó wiri yereyote naruyó§§ ñuro yesowo yimitoyanowó. Quko no itakako injoteno, imemonjo yendo umu-kembane pitu ko kama qenewango. <sup>26</sup> Nunde ñuro itaka ñande yimiroteno, ye ka khumowango quro potó ñuko neneño kini. <sup>27</sup> Dokoro nondo Anutu koro injondutuyó soso ñu yesoworo yimiranowó. <sup>28</sup> Ye koweye meté sopoyuri. Ko Yuqa Surumímbo Anutu koro

---

†† **20:24:** “miti mande” ñuko Anutuko Kristo asáñoní khumoro quhurínanimboró kimo tiní Anutu koya newonde kanata tewero ñuro mande meté mu nanje. §§ **20:25:** “Anutuko unipareyó wiri yereyote naruyómo” ñuno injondutu unipareko hamó Anutu kusunjoyómo yowango.

huru-huru soso<sup>\*\*\*</sup> yore yeño kandeyemo rotaró ñu ñuya meté sopo yereyuri. Dokoro eneño nanúnímboro sitúnjombo kimo yereró.††† 29 No inoteno, yoroto toñewano qunoko, isa sangirí qundo ye keweroyemo mahero unipare rambaruru yerewango. 30 Ko uni topoye kumi yeño keweroye mongo otoqoro mande kota yero unipare kaná yerero yowosowango. 31 Nunde ñuro ye kondé sopo yereyuri qembe. Nande inoyuri qembe, kumima naru kapusa qunoko kosa suwo nondo tendo-tendoro oresaka mande ye yimitoyanowó.

32 “Kowe itakako ye yorero Uni Parámi kandímo yorotoro eneño samaka-samaka tuwó‡‡‡ ñuro mande kusunjoyómo yorototeno. Samaka-samaka tuwó ñundo meté wimbu re yunoweya, ko o meté qu Anutuko unipare soso rokó yereró ñu siyowango qu siyoro yunoweya. 33 Nondo uni karo silwayó, golyó, tuwiyó quro qene nungu ka kama tanowó. 34 Yeñombo inotenjo, nenenjombo kho towanowó ñuro tero otoro tukuni teroqo nenenjombo o siyoyanowó, ko nondo uni noya yoteto ñu ñuya samaka yereyanowó. 35 O soso tanowó ñundoko ñande witú yereró, asa yendo kho kondé tero uni wimbuye moré kini ñu samaka yerewango. Yesu Uni Parámi eneñombo

---

\*\*\* 20:28: “Anutu koro huru-huru” ñuko unipare soso Yesu inondutuworu nokone-nokone ñuno huruwoyotenjo qu.  
 ††† 20:28: “kimo yereró” ñuro murí muko ñandiro: unipareto o piyimi kusunjoyómo kusiyowí yotenjo. Nundiro nanje Anutuko kimo tero yoriní kina yowango. ‡‡‡ 20:32: “samaka-samaka tuwó” ñuko Anutu eneñombo nore samaka yereyote. Kimoyó moré kini.

yaró ηuro inato. Nande yaró, ‘Ko uni ka oka topé mongo siyoweya quko puriño ka reweya, peka. Quko uni ka oka topé inoweya ηuko puriño parámi ka hamó reweya.’”

<sup>36</sup> Polko mande ηu yini kini tini potoruku tero tapá uni ηuya hariri tanğurí. <sup>37</sup> Nu kini tini soso tendoro Pol towo pisiyoro mutó inanğurí. <sup>38</sup> Komo Polko yaró, “Yeko no umu-kembane kama qenewanğo,” ηunde ηuro newonde surumí parámi tanğurí. Ko rero wanğo sanano rotanğurí.

## 21

### *Polko Yerusalem owero wanğowore uyaró*

<sup>1</sup> Asa norendo uni ηu yorotoro wanğowore toņero roneneño uyarero Kos noko mosowímo ηuno uyaretowó. Ko sarañoníqo Rotes noko mosowímo ηuno uyaro rotoro windi tapémo Patara yendémo ηuno uyaretowó. <sup>2</sup> Yendémo ηuno wanğo ka Ponisia mirako uyareweya qu seğaro qenero ηuwore toņetowó. <sup>3</sup> Uyareyate Saıpras noko mosowí ηu kandenani tesina yoní qenero takaro, yate-yate Siria mira takaro Tair yendémo ηuno uyaretowó. Wanğo simburí ηundo situwi se rotowero tini ηuno onğurí. <sup>4</sup> Yendémo ηuno Yesu koro ino-ino rewero unipareyó\* kumi yiyato ηundo Yuqapo Pol ηande miranğurí, “Ke Yerusalem ma owero.” Nunde ηuroko naru kande sanğyoro irisa ηunde ηuno yoratowó. <sup>5</sup> Asa ko naru ηu kini tiniqo, nore yendé ηu rotowero tatoqo, Anutu koro uni ηuya pare-simóyemboya,

---

\* **21:4:** “ino-ino rewero unipare” ηunde qundo rondaqe-rondaqe unindoya uyaro ino-ino yunoyaró.

nore norero yendé rotoro windi sumeyoro potoruku rero hariri tatowó. <sup>6</sup> Hariri tato kini tiní, imemoŋgo toŋi, yero nimiranŋurí, ko, ime yuri, yero waŋgo saŋano otowó, ko pitu ko ene norotoro yayemo toŋenŋurí.

*Akapasko ye-ye mande ka yaró*

<sup>7</sup> Asa ko nore waŋgowore Tair yendé rotoro, yate Tolemes yendémo ŋuno uyaretowó. Ŋuno uni topotoya kosa meté yatowó, ko nore kosa kanata na ŋuya yatowó. <sup>8</sup> Ko saraŋoníqo, Tolemes ŋu rotoro nore Sisaria yendémo ŋuno uyaro miti mande yesowowero uni ŋu, Filipko yano oro eneya yatowó. Ŋuko uni kande saŋiyoro irisako asá yerewí uni† samaka yereyaŋgo ŋuro qu ka. <sup>9</sup> Eneŋo nambo-simó keta nimí kini qundo ye-ye mande‡ yeyaŋgo.

<sup>10</sup> Asa Sisaria ŋuno naru kumi ŋuno yato, ye-ye uni ka, owí Akapas, ene Judia mira rotoro Sisaria umburó. <sup>11</sup> Umburo noreno mahero Polko utó newondímo kusiyoyara ŋu rero enenombo eneŋo khe kandí kusiyaró. Kusiyoro ŋande yaró, “Yuqa Surumímbo ŋande yete, ‘Juda uni Yerusalem yoteŋgo ŋundo utó ŋaro simburí rero ŋande kusiyowaŋgo, ko rero uni wini meyowo kumi§ kandeyemo rotowaŋgo.’ ”

---

† **21:8:** “asá yerewí uni” ŋuko Yesuko rokó yerero asá yirini eneŋo khoyó tanŋurí. ‡ **21:9:** “ye-ye mande” ŋuko unindo Yuqa nonŋo mande ka rero unipare soso yimiraró. Mande ŋunde quko uniparetoro oteteye rondaŋarómbe ma newondeye rukisoyaró. § **21:11:** “uni wini meyowo” ŋunde quko Juda unipare kini qu nanŋe.

12 Yiní iñoro noreya yendé unipare ñuya Pol kondé, “Yerusalem ma owero,” yatowó. 13 Quko Polko mande topé yaró, “Ye do karo tendoro no newondene rambaruruwoyotengo? No Yerusalem ñuno kusi nerewangope ma nuroyi khumowano, peka. Enina, Uni Parámi Yesu koro owí hokowero khe ñu howewano.” 14 Nñunde yiníqo, nore iño-iñojó rohoreñowero mepémo kini tero mande ñu rotato. Nñande yatowó, “Uni Parámimboro nuñguri tunoqini.”

### *Polko Yerusalem ñuno oró*

15 Naru ñu kini tiniqo, situwinani rongaruworo Yerusalem ñuno otowó. 16 Oro Sisaria yendémboro iño-iño rewero unipare\*\* kumi noreya oro Nasonko yano norotanguri. Nason ñuko Saipras noko mosowí mongo qu, Yesu koro iño-iño uni korete qu ka.

17 Asa Yerusalem otowó quno uni topo ñuno qundo noreño niñgu-niñgu tanguri. 18 Sarañoníqo, Pol noreya Jems qenewero otowó. Oto huru-huru koro tapá uni soso Jems koya yañguri. 19 Nñuno oro Polko kosa meté yero yimiraró, ko eneñombo meté roneneñoro o soso Anutuko khoyómo uni wini meyoowo qu†† keweroyemo taró ñuro yaró.

20 Nñunde yiníqo, iñoro Anutu owí hokanguri. Ko ñande miranguri, “Topo, qeno. Juda uni qambu horé qundo iñondutu tanguri, ko uni

---

\*\* 21:16: “iño-iño rewero unipare” ñunde qundo rondage-rondage unindoya uyaro iño-iño yunoyaró. †† 21:19: “uni wini meyoowo” ñunde quko juda unipare kini qu nanje.

soso nundo hutuño mande<sup>††</sup> howewero nuro kondé inoyotenjo. <sup>21</sup> Quko uni kumimbo kenjo nande yimiroyi inangurí, “Ko Polko Juda uni kumi uni wini meyowo keweroyemo yotenjo qu rowore yerero Mosesko hutuño mande qu howewero soré yereyote. Ene nande yeyote, ‘Ye simóyembo koweye ma tonjowero. §§ Ko otete komo qu ma howewero.’ <sup>22</sup> Nore date tewato? Juda inondutu uni nundo keto mahe nuro hamó inowanjo.

<sup>23</sup> “Asa otete ka kimiratoka nunde te qembe. Uni nimí kini nana yotenjo gundo komo oka tewero quro Anutu koya mande kusiyangurí. <sup>24</sup> Ke uni nju yorero ye soso Anutu tonjimo sara tunogewero otete nu ti qembe. Nunde teya keto enejo o qa-qa te inowero qu kimoyikata huye tonowanjo. Ke nunde tiqota unipare soso inowanjo, uni kumimbo kota mande keya yangurí na. Nande inowanjo, keko hutuño mande howeyote, yero

---

<sup>††</sup> **21:20:** “hutuño mande” nuko komo suki Anutuko Sainai purimo Moses inoní Israel unipare yunaró. Mande nuko Juda uniparetoro yoto-yotoye soso sopoyaró. **§§ 21:21:** “kowe tonjowero” murí muko nandiro: Juda pareto simó urumuni ka pisiyoní kosa naru kande sanjyoro kapusa nunde rotoní hutuño mande howero kowí tonangurí. Nunde tero eneko Anutu koro simó rokónangurí. Ko uni wini meyowo qu kato mahero Anutu potoruku tewero kondé inaró tiniqo, ene nuyako enejo kowí tonangurí.

inowanngo.\*\*\* 25 Asa uni wini meywomboro inondutu unipare quro norendo komo mande kusiyoro sokome ka ratowó. Nñande yimiratowó, ko unindo nú-qare ka uroyi khumoní rero anutu kota-kota o te yunangurí ñu ma newero, ko sitú ma newero, ko unindo númbowe puñeye kusiyi khumoní ñu ñuya ma newero, ko se simbururu ma tewero.”

26 Asa ko sarañoníqo, Polko uni ñu yorerero eneya Anutu toñímo sara tunoqewero otete ñu tanğurí. Nñunde teroqo Ya Surumímo††† oro piña mande ka o qa-qa uni††† yimitoro ñande yaró, do naru kano murí tewero naruyó ñu kini teweya, ko do naru kano uni soso ñundo o qa-qa Anutu te inowanngo ñuro yimiraró.

### *Unindo Pol Ya Surumímo towanğurí*

27 Asa murí tewero naru kande sanjyoro irisa kini tewero taró quno ñuno Juda uni Esia nonğo qu kumimbo Pol Ya Surumímo qenangurí. Qenero unipare qambu ñu ino-inoye kape tiní Pol toworo 28 ñande neke kiwanğurí, “Ye Israel uni, nore samaka niri! Uni ñando mira soso ñuno

\*\*\*

**21:24:** Juda uni kumimbo naru kumimo Anutu koro kondé inoro eneya mande kusiyoro kombo kanata quroko otete ka howeyango. Otete ñuko ñandiro: wain ka kama newanngo, o Anutu toñímo pusú qu ka kama towowanngo, huye kama toñowanngo. Asa naru ñu kini tiníqo, o qa-qa te inoro huye toñoro wondo yakutímo qanğurí. (Qambuye 6 weyo qembe.) ††† **21:26:** “Ya Surumí” ñuko Anutu koro ya qu, ñunoko Juda unipareto Anutu koya huruwowero quro hu-hariri teyanğurí. ††† **21:26:** “o qa-qa uni” ñundo Ya Surumímo Anutu koro kho tero unipareto quhuriye rotowero quro wondo yakutímo ñuno o qa-qa te inangurí.

mande rondaqe unipare yunoyote, ko mandí muko noreño wininani, hutuño mandenani, ko Ya Surumínani ñaro yesaráñoyote. Nju nanqe kini. Kini, enendo Grik uni ñuya yorerero Ya Surumímo ñano arero Ya meté horé ña riní Anutu toñímo pusú§§§ teyote.”<sup>29</sup> Nunde yañgurí, dokoro komo Grik uni ka Efesus nongo qu, owí Tiropimus, Pol koya yendémo yiyañgurí, ko ñande ye iñañgurí, ko Polko uni ñu re Ya Surumímo ariri, yero iñañgurí.

<sup>30</sup> Asa ñunde yero kiwi Yerusalem uni soso iñoro yukuworo khengeñoro mahe kopañgurí. Koporo Pol toworo rero Ya Surumímo rotoro yendémo uñgurí. Ko waka ta Ya Surumí ñuro mako qu tuñañgurí. <sup>31</sup> Pol toworo uroyiqo, Rom koro kuma unindoro uni kembé ñundo\* Yerusalem soso iño-iñoye kape taró ñuro piña mande iñaró. <sup>32</sup> Nunde ñuro waka ta uni kembémo kuma unindoro sopo-sopo kumimboya† uniyemboya yorerero khengeño uyañgurí. Uyari unipareto yiyoro Pol utoyango ñu rotañgurí.

<sup>33</sup> Uni kembé ñundo kutaqemo mahero Pol

---

§§§ **21:28:** Anutu koro sokomeko ñande yaró, ko o kate-kate Anutu toñímo pusú yora, ko uni ka muri kate-kate taró qundo pusú tunoqaró. Asa ko Juda unindo ñande yañgurí, ko uni wini meyowo ñuko pusú nanqe, Ya Surumímo owero mepémo kini.

\* **21:31:** “kuma unindoro uni kembé” ñunde qundo kuma uni 1,000 wiri yereyara. Rom koro wiri yerete uni parámi ñundo Judia mira ñuya wiri yereró. Asa ko eneño kuma uniyómbó Yerusalem ñuno kunditero unipare sopo yereyañgurí. † **21:32:** “kuma unindoro sopo-sopo uni” ñuko Rom uni ka, enendo kuma uni 100 sopo yereró.



toworo kuma uniyó yimira, kato utó kondémbó irisa kusiyi, ye yimiraró. Yero unipare nǎnde ose yereró, “Nǎ dani ka? Do ka taró?” <sup>34</sup> Yiní unipare qambu keweroyemo uni kumimbo mande ka yero nekaṅgurí, ko uni kumimbo mande meyoowo yaṅgurí. Niri-niri qambu tiqo, kuma uni ṅundo o hamó qene iṅowero mepémo kini taró. Nunde ṅuro kuma uni yimironí Pol re toworo kuma unindo ya quroko owero taṅgurí. <sup>35</sup> Pol oro ya piri saṅano owero tiní unipare qambu ṅundo, uratoka khumoní, yero kuma kondé ti owero rukusuwoní kuma unindo re korowo oṅgurí. <sup>36</sup> Kowe unipare parámi ṅu yohowero oro ene mande kondé nǎnde yaṅgurí, “Urika khumoní!”

*Polko mande ka uni qambu yimiraró*

<sup>37</sup> Asa Pol kuma unindo yayemo owero teroqota kuma unindoro uni kembé ṅu nǎnde kirayaró, “Meté mande ka keya yewe teteno?”

Yiní yaró, “Date koro? Keto Grik mandewore yete. <sup>38</sup> Noko, ke peka Isip uni ṅu, yero iṅoyoteno, sonṅa komo kuma riní otoqoní uni saṅgirí 4,000 uni sukepo yutoyotengo qu yorerero mira wimbímo uyareṅgurí.”

<sup>39</sup> Ko Polko yaró, “Noko Juda uni ka, Tarsus yendé Silisia mirako qu ka. Yendéne muko owí parámi moré. Ai, no unipare mande yunowero iṅoteno.”

<sup>40</sup> Uni kembé ṅundo meté yiniqo, Pol mako piṅo saṅano ṅuno kaṅero kandímbo naṅge rokó-rokó taró. Nunde ṅuro soso maṅgoye kusiyoyi Polko Hibru mandewore mande yaró. Nǎnde yaró,

## 22

<sup>1</sup> “Uni topo ko awa okite, ye injoyi. No mande topé yeya yewe teteno.” <sup>2</sup> Nunde Hibru mandewore yiniqo, inoro mondó ta yotoro niri-niri ka kama tanjurí.

Polko nande yaró, <sup>3</sup> “Noko Juda uni ka. Námembo Silisia mirako Tarsus yendémo nuno pisi nereró, quko no Judia mirako nana parámi tanowó. Gamalielko\* ino-ino no nunaró, ko usi-sinanimboro hutunjo mandeye nuro ino-ino nunaró. Nunde nuro ye itaka teyotenjo nunde nanje nondo Anutu koro kondé inoyanowó. <sup>4</sup> Nunde nuro no unipare Khe nu† howeyangurí qu yutoyano, ko uni nyaya pare nyaya yorero kusikusi yano yorotoyano. <sup>5</sup> O qa-qa unindoro tapá unindoya uniparetoro uni kembé-kembéboya, sowo mande nu meté ye yimirowanjo. Dokoro enendo Damaskus topo-topoyembo sokome ka nunoyi unipare nunde qu yondoworo oteteye piyimi nuro topé rewero quoro yore Yerusalem mahewero khendo Damaskus yendémo nuno unowó.

### *Polko ene date inondutu taró nuro yimiraró*

<sup>6</sup> “Asa no khendo yate kosa keweroko Damaskus yendémo nuno owero nanje tanowó. Ko waka ta hiyó parámi ka sambo sanja nonjo umburo no hiyó nunaró. <sup>7</sup> Hiyó nunoní rokaránoro nokono umbuweqo, manjo kato

---

\* **22:3:** “Gamaliel” njuko Farisi uni qu ka, ko hutunjo mande rondaje yunoro owé parámi taró. † **22:4:** “Khe” njuko muri keta qu inondutu unipareto howeyangurí.

nimiraró, ‘Sol, Sol, ke do karo no rambaruru nereyote?’

<sup>8</sup> “Yini mande topé nande yanowó, ‘Uni parámi, ke dani?’

“Yewe nimiraró, ‘Noko Yesu, Nasaret nonjo qu, keto no rambaruru nereyote,’ yaró. <sup>9</sup> Uni noya yatowó nuko hiyó nu qenengurí, quko manjó inanowó nu ene kama inangurí.

<sup>10</sup> “Asa nande yanowó, ‘Uni Parámi, no itaka do ka tewe teteno?’

“Yeweqo, Uni Parámimbo nimiraró, ‘Ke otoqoya Damaskus oyo. Ko nu yendémo nunoko uni kato do kho ka kunoteno qu kimiroweya,’ yaró.

<sup>11</sup> Hiyó nuko parámi horé, asa ko kini tiniqota nondo o qenewero mepémo kini. Uni noya yatowó nundo kandenemo nondoworo norero Damaskus otowó.

<sup>12</sup> “Ko uni ka nuno yaró, owí muko Ananias. Uni nuko hutunjo mande† hamó howeyara. Juda uni soso Damaskus yotenggo nundo nande yeyotenggo, nuko uni meté. <sup>13</sup> Asa ene mahero no tanjenemo kanjero nande nimiraró, ‘Topo Sol, ke pitu ko tonjete.’ Yiniqo, nu naruko nuno nanje tonjene muko pitu ko meté tini tonjete ene qenenowó.

<sup>14</sup> “Asa nande yaró, ‘Usi-sinanimboro Anutuyembo ke rokó kerero nande ye injaró, ko keto enejo injo-injo qu inoyi tondaneweya, ko keto Uni Ronenenjowí nu qenero manjómbo mande yete nu inoweya. <sup>15</sup> Nunde ye injaró, dokoro

---

† **22:12:** “hutunjo mande” nuko komo suki Anutuko Sainai purímo Moses inoní Israel unipare yunaró. Mande nuko Juda uniparetoro yoto-yotoye soso sopoyaró.

keto maṅgó rero toṅeṅgepo qeneró ṅuya kusumbokepo injaró ṅuro unipare soso yesowoweya. <sup>16</sup> Asa ke do ka sopoyote? Otoqoya owí nekoya sono rika enendo quhurínge soworo se rotoweya.’

<sup>17</sup> “Imemoṅgo no Yerusalem mahero Ya Surumímo§ ṅuno hariri teroqo, ino-inone enesó-enesó tiní <sup>18</sup> Uni Parámi qenenowó. Qenewe ṅande nimitoyaró, ‘Waka ta Yerusalem roto toṅe. Dokoro ke mandene re ṅano yeweya, quko uni kumimbo inowero piyimiṅowango.’

<sup>19</sup> “Ko nondo yanowó, ‘Uni Parámi, uni ṅano qundo ṅande inotengo, komo nondo huru-huru ya\*\* soso quwore uro inondutu unipare kusi yereyano, ko haususu yereyano. <sup>20</sup> Ko komo enendo keṅo yesowowero uni Stiven ṅu uri khumoníqo, neneṅombo kutaqemo kaṅero niṅuniṅu tero urowero uni ṅuro kowe punu-punuye sopoyanowó.’

<sup>21</sup> “Yeweqo, nimiraró, ‘Ke oyo. No asá kerewe sewemo toṅero uni wini meywowo keweroyemo yoweya.’ ”

### *Pol ṅuko Rom uni ka*

<sup>22</sup> Asa Juda unindo Pol koro mande qu soso inoro kondé nekaṅgurí, “Urika khumoní! Uni ṅunde qundo nokono ṅano kama yoweya!”

---

§ **22:17:** “Ya Surumí” ṅuko Anutu koro ya qu, ṅunoko Juda unipareto Anutu koya huruwowero quro hu-hariri teyaṅgurí.

\*\* **22:19:** “huru-huru ya” ṅuko Juda uniparetoro ya parámi mu. Sapat naruko ṅuno hu-hariri tero Anutu koro mandí weyoyi inoro hariri teyaṅgurí.

23 Njunde yero hurí tero wimbo-wimbo nekero kowe punu-punuye piru qu†† se wendaŋe raŋoro kuku somoyaŋgurí. 24 Asa ko kuma unindoro uni kembé ŋundo‡‡ kuma uni yimitoro ŋande yaró, “Pol yano re oya haususuwoya ŋande oseseyuri, do murí karo unipareto niri-niri parámi ŋunde teyotenŋo,” yaró. 25 Asa kusiyoro haususuwowero taŋgurí quno Polko kuma unindoro sopo-sopo ka§§ ŋande oseseyaró, “Yembe meté Rom uni mande khono kama kaŋaró qu ka haususuwowaŋgo?”

26 Yiníqo, sopo-sopo uni ŋu kuma unindoro uni kembé ŋuno uyaro oseseyaró, “Ke do tewero? Uni ŋuko Rom uni ka.”

27 Ko uni kembé ŋundo Pol ŋande miraró, “Ke no nimito. Kepe Rom uni kape ma kini?”

Yiní, “Iyo,” yaró.

28 Yiní ŋande yaró, “Nondo kimo parámi raŋoro Rom uni tanowó.”

Ko Polko yaró, “Quko námbo pisi niriníqo, nondo Rom uni tanowó.”

29 Njunde ŋuro kuma unindo oseseyowero qundo waka ta toŋenŋurí. Kowe kuma unindoro

---

†† 22:23: Njuno naruko ŋuno Judia mirako ŋuno unipareto kowe punu-punuye irisa punuwoyaŋgurí. Kako quroyómo punuwoyaŋgurí. Tuwi piru saŋanimo ŋuko matú kutiti ŋu wisumuŋaró. ‡‡ 22:24: “kuma unindoro uni kembé” ŋunde qundo kuma uni 1,000 wiri yereyara. Rom koro wiri yerete uni parámi ŋundo Judia mira ŋuya wiri yereró. Asa ko eneŋo kuma uniyómbo Yerusalem ŋuno kunditero unipare sopo yereyaŋgurí. §§ 22:25: “kuma unindoro sopo-sopo uni” ŋuko Rom uni ka, enendo kuma uni 100 sopo yereró.

uni kembé ñundo sasaro taró. Dokoro enendo Pol, Rom uni ka, kusiyaró. \*\*\*

*Polko Juda koro uni pará-pará toñeyemo mande yaró*

<sup>30</sup> Kuma unindoro uni kembé ñundo do murí horé karo Juda unindo Pol mande kho inoyango ñuro inowero taró. Ñunde ñuro sarañoní re rotoro o qa-qa unindoro tapá unindoya uni pará-parámboya neko yiriní mahe huruwañgurí. Ko Pol rero rotoní.

## 23

*Sanedrin huru-huru \* ñuro toñeyemo kañaró.*

<sup>1</sup> Polko kañero Sanedrin kondé toñetero yaró, “Uni topo, no ino-inonemo ñande inoteno, ko naru rokóñoro Anutu koro o qu howeyoteno arero itaka ña.” <sup>2</sup> Yiníqo, o qa-qa unindoro tapá uni Ananias ñundo uni Pol koro tañgímo kañañgurí ñu yimironí mañgó tamañgurí. <sup>3</sup> Ñunde ti Polko miraró, “Ke hoñgo ka sono sara-sarapo sonowañgurí qu! Anutuko ke kuroweya! Qeno, ke mande khono norotoro hutuño mandewore†

---

\*\*\* **22:29:** Polko Rom koro uni, ñuya Juda koro uni qu ka. Komo, eneño iwímbope ma usí peka owé ka rero Rom koro uni tunoqaró. Ñunde ñuroko eneño sowe qu ñuya Rom koro uni tañgurí. Uni ñunde quko oteteyembo topé piyimi kina kama rañgurí. Asa ko kuma unindoro uni kembé ñu eneñoombo topé piyimi reweya, peka. \* **23::** “Sanedrin” ñuko uni kembé-kembémboro huru-huru ka. Enendo Anutu koro hutuño mande sopro Juda unipare sopo yereyango. † **23:3:** “hutuño mande” ñuko komo suki Anutuko Sainai purímo Moses inoní Israel unipare yunaró. Mande ñuko Juda uniparetoro yoto-yotoye soso sopoyaró.

ronda nerete, quko keŋombo nanġe mande ŋu karóŋoro no nuri yero yimirote!”

<sup>4</sup> Yiní uni kutaqemo kaŋaŋgurí ŋundo yaŋgurí, “Ke peka Anutu koro o qa-qa unindoro tapá uni ŋu ŋunde huwóŋote, peka?”

<sup>5</sup> Ko Polko yaró, “Uni topo, ŋuko o qa-qa unindoro tapá uni qu ŋu kama iŋoro yeteno. Dokoro sokomeko ŋuno ŋande nakayáŋaró, ‘Ke uniparetoro wiri yerete uni ŋuya mande piyimi ma yimitoyowero.’ ” †

<sup>6</sup> Asa Polko ŋande iŋaró, ko sopo-sopo uni ŋuno huruwaŋgurí kumi muko Sadyusi§ ko kumi Farisi.\*\* Nunde ŋuro Sanedrin ŋunoko nekero ŋande yaró, “Uni topo, noko Farisi koro wini qu ka, ko awane ŋuya Farisi koro wini qu ka. Nondo unipare khumaŋgurí qundo pitu ko otoqowaŋgo, yero iŋondutu teteno. Nju murí ŋuro no norero mande khono norotoyoteŋgo.” <sup>7</sup> Nunde yiníqo, Farisi unindoya Sadyusi unindoya kiro puso tiqo, huru-huru ŋuko usowaró. <sup>8</sup> Dokoro Sadyusi unindo ŋande yeyaŋgo, unipare khumaŋgurí qundo pitu ko kama otoqowaŋgo, ko sambo simó†† kama yoteŋgo, ko yuqa piyimi

---

† **23:5:** Toŋeŋgurí 22:28 § **23:6:** “Sadyusi uni” ŋuko unindoro huru-huru ka Israel mirako ŋuno yaŋgurí. Eneko wondo uni kumi owéye parámi tero unipare soso sopo yereyaŋgurí. \*\* **23:6:**

“Farisi uni” ŋuko unindoro huru-huru ka Israel mirako ŋuno yaŋgurí. Enendo Anutu koro hutuŋo mande ŋuro okeyá ta howero uniparetoro toŋeyemo owéye parámi taŋgurí. †† **23:8:** “sambo simó” ŋuko komo suki-suki Anutuko unipare kama yorini tunoqi sambo simó yondowaró. Ko itaka eneŋo sunará teyoteŋgo.

ɲuya kama yoteŋgo. Quko Farisi unindo o kapusa ɲuro iɲondutu teyaŋgo.

<sup>9</sup> Asa ko niri-niri parámi tero Farisi koro hutuɲo mande ɲuro iɲo-iɲo uni<sup>‡‡</sup> kumimboko kondé ɲande yaɲgurí, “Nore uni ɲaro quhurí ka kama geneteto. Yuqa kato eneya mande tarómbe, ma sambo simó kato eneya mande taró, peka.”

<sup>10</sup> Yiɲo, kiro saɲgirí ɲu parámi horé taró, ko kuma unindoro uni kembé ɲundo,§§ Pol kawore-kawore towo wosoyi wuriwe tete, peka, ye iɲaró. ɲunde ɲuro kuma uni yimironí uni keweroyemo uro rero kuma unindo ya quroko oɲgurí.

<sup>11</sup> Asa saraɲoní suwono Uni Parámimbo Pol taɲgímo kaɲero miraró, “Newondeke kondé yoní. Keto neneɲo mandene ɲa Yerusalem ɲuno ya, ɲunde naɲge oro Rom ɲuno ɲuya yesowoweya.”

*Juda uni kumimbo, Pol urato khumoweya, yero mande kusiyangurí*

<sup>12</sup> Saraɲoníqo, Juda uni kumimbo koporo mande kusiyoro ɲande yaɲgurí, “Hamó yeteto, ko noreko oka kama neyate oro Pol urato khumoníqota.” <sup>13</sup> Uni mande hamó yero mande kusiyangurí ɲuko 40 ɲundiro. <sup>14</sup> Asa ɲunde yero o qa-qa unindoro tapá unindoya uni kembé-kembémboya ɲuno oro ɲande yimirangurí, “Nore mande kusiyoro mande hamó moɲgo yero ɲande

---

<sup>‡‡</sup> **23:9:** “hutuɲo mande ɲuro iɲo-iɲo uni” ɲundo Anutu koro mande ɲu unipare rondaqe yunoyangurí. **§§ 23:10:** “kuma unindoro uni kembé” ɲunde qundo kuma uni 1,000 wiri yereyara. Rom koro wiri yerete uni parámi ɲundo Judia mira ɲuya wiri yereró. Asa ko eneɲo kuma uniyómbo Yerusalem ɲuno kunditero unipare sopo yereyangurí.



yatowó, ko nore oka kama neyate oro Pol urato khumoníqota. <sup>15</sup> Nunde njuro yeya Sanedrin njuya kota mande rika kuma unindoro uni kembémo oní Pol rero yeno umbuweya. Ye kota mande yewango njuko njandiro, ko yendo Pol koro murí njú okeyá ta injowero ye injotenjo. Asa ko yeno mahe yoroní urato khumoweya.”

<sup>16</sup> Quko Pol okímbo mondó sóqero uri khumoweya mande kusiyangurí njú injoro tojoro kuma unindo ya quroko oro Pol njuro miraró.

<sup>17</sup> Nunde njuro Polko kuma unindoro sopo-sopo uniye nekoró miraró, “Simó keta njá reya kuma unindoro uni kembémo oyika mande ka miroweya.” <sup>18</sup> Nunde yiníqo, re toworo uni kembémo oro njande yaró, “Kusi-kusi uni Pol njundo no neko nerero nimiróní uni keta njá rero mande ka re kunowero keno maheteno.”

<sup>19</sup> Yiní uni kembé njundo simó keta njú kandímó toworo rero tapémo uro njande oseseyaró, “Keto do mande ka noya yewero?”

<sup>20</sup> Yiní yaró, “Juda uni kumimbo mande ka njande kusiyangurí, ko kuyepo osese kiri keto Pol rero Sanedrin njuno re uweya. Kota mande njande yewango, enendo Pol koro murí njú okeyá ta injowero ye injotenjo. <sup>21</sup> Quko ke mandeye njú ma howewero. Uni kumi muko 40 njundiro, njundo mande hamó njande yero, o koro kundinji teyate\*\*\* Pol urato khumoníqota, yangurí. Ko itakako o rongaruworo keto meté yekata yero ke sopo kereyotenjo.”

---

\*\*\* **23:21:** “kudinji” teyangurí quno njuno unipareto Anutu injoro enejo ri umbuní naru kanata, irisa njundiro o kama nangurí.

<sup>22</sup> Njunde yiniqo, uni kembé njundo simó keta nj mande kondé njande miraró, “Keto mande no nimirote nj yero uni ka ma yimirowero” yini tojeró.

*Rom koro unindo Pol rero Sisaria yendémo ungurí*

<sup>23</sup> Asa, kuma unindoro uni kembé njundo kuma unindoro sopo-sopo uni irisa neko yerero yimiraró, “Yari kuma uni 200 njundiro, ko uni hosi sañano kunditeyotenggo 70 njundiro, ko uni sangaye se towoyotenggo 200 njundiro nj yoriri suwono 9 kilok njunoko Sisaria yendémo njuno uwanggo. <sup>24</sup> Ko Pol ri hosi sañano kunditero wiri yerete uni Feliksiko††† njuno khewore uní.”  
<sup>25</sup> Njunde yero sokome ka njande nakayáñaró.

<sup>26</sup> No Kolotias Lisias, nondo Wiri Yerete Uni Feliks, keya kosa meté yeteno.

<sup>27</sup> Uni njako, Juda unindo toworo, uratoka khumoní, yero tangurí. Quko komo uni kato, njuko Rom uni ka, yi injanowó, njunde njuro noya kuma unindoya oro kandeye mongo re tojetowó. <sup>28</sup> Ko nondo do murí karo mande khono rotangurí njuro injowero quro rero huru-huruyemo utowó. <sup>29</sup> Uro njande injanowó, ko o taró njuko hutunjo mandeye nanje karóñaró, norendo urato khumowero

---

††† **23:24:** “Feliks” njuko Rom koro uni ka, enendo Rom koro wiri yerete uni parámi kusunoyómo yotoro Judia mira nj wiri yereró. Naru rokógoro Sisaria yendé parámimo kunditeyara.

qu kini, ko kusi-kusi yano rotowero qu kini.  
<sup>30</sup> Asa uni kumimbo, uni ñu urato khumoní, yero mande kusiyoyi mande ñu nono tunoqaró. Nunde ñuro nondo asáñowe keno uró ñu. Kowe no unindo uni ña mande khono rotowero ye inotenjo ñu yimirowe ene ñuya keno uro ino-inoye tonjengemo yewanjo.

<sup>31</sup> Sokome ñunde nakayáñoro riní kuma unindo mandí howero Pol rero Antipatiris yendémo ñuno suwono ungurí. <sup>32</sup> Sarañoní kuma uni khímo uyareyanjo ñu rohoréñoro yano pitu ko ongurí. Ko kuma uni hosi sañano kunditanjurí ñundo nanje Pol rero Sisaria uyanjurí. <sup>33</sup> Uyate Sisaria oro sokome ñu rero wiri yerete uni ñu inanjurí, ko Pol ñuya re mahi tonjimo kanjaró. <sup>34</sup> Wiri yerete uni ñundo sokome ñu weyoro Pol oseseyaró, “Ke do mira ka nonjo qu?”

Yiní yaró, “Noko Silisia nonjo qu.”

<sup>35</sup> Yiní yaró, “Uni mande khono korotowero ye inotenjo ñundo mahikata mande kho ñu tewano.” Yero ñande yimiraró, “Reya uya wiri yerete uni Herotko yano<sup>†††</sup> ñuno sopoyoyi.”

## 24

*Polko Rom koro wiri yerete uni Feliks tonjimo kanjaró*

---

<sup>†††</sup> **23:35:** Komo “Herotko” Juda unipare sopo yerero ya parámi ñu towaró.

<sup>1</sup> Asa kosa naru kandeka ñunde rotoro o qa-qa unindoro tapá uni\* Ananias ñuya uni kembé kumimboya maṅgó uni owí Teritululus ñuya ñuno uṅgurí. Uro wiri yerete uni mitoro do murí karo Pol rero mande khono rotanṅurí ñuro miranṅurí.

<sup>2</sup> Miroyi Pol nekoní mahiní Teritululusko ñu murí ñuro ñande yaró, “Uni parámi Feliks, naru piruko ñuno keto nore wiri niri meté kunditeyoteto.† Iṅondutuke meté ñundo nore samaka nerero keto o piyimi qundo noreño wini qu rambaruru nereyaró ñu roṅgaruwaró. <sup>3</sup> Ñunde ñuroko Feliks, keko uni meté horé, ko nore naru rokóṅoro ñuro yuṅguna kereyoteto. <sup>4</sup> Quko yate nondo naru piru kusi kerewano koro. Meté keño newonde metémboro nanje mande tukuni ka iño.

<sup>5</sup> “Nore ñande iṅoteto, ko uni ñano qundo otete piyimi horé teyote. Enendo kiro kuma riní Juda uni soso keweroyemo ko mira yendé soso ñuno tunoqeyote. Eneko Nasaret yendé uni karo usowo-sowo quro uni korete-koretaye.

<sup>6-7</sup> Ko Ya Surumí ñu‡ ñuya riní pusú tewero taró, quko toworo kusiyatowó. <sup>8</sup> Ñunde ñuro keṅombo uni ñu oseseyoya eneño maṅgó moṅgo o soso norendo ñuro rero mande khono rotatowó ñu iṅoweya.”

<sup>9</sup> Ñunde yiní Juda unindo ñuya samakanoro ñande yesowanṅurí, “Mande ñu soso hamó.”

---

\* **24:1:** “o qa-qa unindoro tapá uni” ñundo Ya Surumímo hu-hariri soporo ronda-ronda huru-huru owí muko, “Sanedrin,” ye nekoyanṅurí ñu sopoyaró. † **24:2:** “Feliks” ñuko Rom koro uni ka, enendo Rom koro wiri yerete uni parámi kusuyoyómo yotoro Judia mira ñu wiri yereró. ‡ **24:6-7:**

*Polko eneño sowo mandeyó yero Feliks miraró*

<sup>10</sup> Asa wiri yerete uni ñu kandímbo rokóníqo, Polko mande topé ñande yaró, “No inoteno, kumima naru qambu ke unipare ñaro ronda-ronda uniye yora. Nunde ñuro ñingu-ningu tero mandeye topé yewe teteno. <sup>11</sup> Keto uni osese yereweya tiníqo, ke ñande inoweya, ko nondo komo kosa naru 12 amena Anutuko potoruku te inowero Yerusalem ñuno onowó. <sup>12</sup> Uni mande kho nunoyotenjo ñundo no niyi eneya mande sangirí Ya Surumímo ñuno kama yanowó, ko huru-huru yaye§ kumimo ñunope ma yendémo unipare qambu kama okoko yerenowó. Kini. <sup>13</sup> Ko mande ña yero no norero mande khono norotaño ñako, enendo mande kho ñuro murí hamó ñu ri tunoqewero mepémo kini. <sup>14</sup> Quko nondo mande ka keno yewe teteno. Khe ñaro enenjombo ñande ye nekotenjo, ‘Usowo-sowo,’ ñuko no hamó howeyoteno. Nondo Khe\*\* ñu howero usi-sinanimboro Anutuye ñuro potoruku te inoyoteno. Nondo Hutuño Mande soso koya Ye-ye Unindo mande nakayáñangurí ñuya soso inondutuwoyoteno. <sup>15</sup> Uni mande kho nunoyotenjo ñaya noya o kanata quro kondé inoyoteto, ko Anutuko uni soso khumañgurí mu, asa uni roneneñowímboya uni piyimimboya soso yoriní pitu ko otoqowaño. <sup>16</sup> Nunde ñuro no naru rokónoro Anutu toñímo ko unipare toñeyemo

---

§ **24:12:** “huru-huru ya” ñuko Juda uniparetoro ya parámi mu. Sapat naruko ñuno hu-hariri tero Anutu koro mandí weyoyi inoro hariri teyangurí. \*\* **24:14:** “Khe” ñuko murí keta qu inondutu unipareto howeyangurí.

ɲuya no kondé tero otete sopowero quro iɲo-  
iɲone ɲu rewe roneneɲoní o piyimi ka kama  
teyoteno.

<sup>17</sup> “No kumima naru kumimo mira meywomo  
yate pitu ko ɲano mahenowó. Nondo mone  
siyoro sitú topo-topone otoro tukuni teyaɲgo ɲu  
samaka yerenowó, ko o qa-qa†† Anutu te inowero  
qu se mahenowó. <sup>18</sup> Nunde tanowó, ko Anutu  
toɲímo sara tunogewero otete ka tero Ya Su-  
rumímo ɲuro quroko owego, no niyaɲgurí. Uni-  
pare soɲga ta naɲge noya yatowó. Ko norendo  
niri parámi ka kama tatowó. <sup>19</sup> Quko Juda uni  
kumimbo Esia mira parámi moɲgo qu Ya Su-  
rumímo ɲuno yaɲgurí. Uni ɲundo meté mahero  
toɲeɲgemo kaɲero mande kho nunowaɲgo, peka.  
<sup>20</sup> Nunde kini tinígo, asa uni ɲano qundo no  
Sanedrin toɲeyemo kaɲanowó quno do quhurí  
ka nono qeneɲgurí ɲu meté yewaɲgo. <sup>21</sup> Mande  
kanata karo mande kho nunoyoteɲgo naɲge,  
peka. ɲu naruko ɲuno nondo keweroyemo  
kaɲero kondé ɲande kiwanowó, ‘No unipare  
khumanaɲgurí qundo pitu ko otoqowaɲgo ɲuro  
iɲondutuwoyoteno. Nunde ɲuroko no norero  
mande khono norotoyoteɲgo ɲa.’ ”

<sup>22</sup> Feliksiko Khe ɲuro komo iɲaró, ɲunde ɲuro  
ɲande yaró, “Imemoɲgo kuma unindoro uni

---

†† **24:17:** “o qa-qa” ɲunde qu unipareto Anutu iɲoro potorkuku  
te inoro nú-qare ka o qa-qa uni inoyi uroní khumoní wondo  
yakutímo ɲuno qaró.

kembé, †† Lisias ŋu, mahe umbuníqota nondo mande ŋa ronḡaruwowano,” yero Juda uni asá yiriní tonḡenḡurí. <sup>23</sup> Ko enendo kuma unindoro sopo-sopo uniye§§ ŋu mironí Pol sopoyuri, quko kondé ma kusiyowero, eneḡo topé-topémbó o qímboro se mahewanḡo, yaró.

<sup>24</sup> Imemonḡo ta Feliks koya parí Durusila koya mahiriyó. Durusila ŋuko Juda pare ka. Ko Feliksiko Pol nekoní mahero unipareto Yesu ŋuko Kristo\*\*\* ŋu inḡodutu teyotḡo ŋuro yiní inḡaró. <sup>25</sup> Polko otete roneneḡowí††† ŋuro yaró, ko uni kato eneḡo meté sopoyote ŋuro yaró, ko imemonḡo Anutuko unipare ronda yereweya ŋuro yaró. Nunde yiníqo, Feliks sasaro tero yaró, “Koro ŋu! Tone. Imemonḡo naru ka yoníqo, neko kerewe maheweya.” <sup>26</sup> Nunde yaró, quko oka karo ŋuya ḡande ye inḡaró, ko Polko peka kina rotowero ŋuro mone ka inoweya, peka. Nunde ŋuro naru qambu nekoní mahiní ŋuya mande yeyari.

<sup>27</sup> Yate-yate kumima naru irisa ḡunde rotoro Posias Festus ḡundo Feliks mepé raró. Ko Feliksiko, Juda uni eneḡo metéḡowanḡo, ye inḡoro Pol rotoní kusi-kusi yano yaró.

---

†† **24:22:** “kuma unindoro uni kembé” ḡunde ḡundo kuma uni 1,000 wiri yereyara. Rom koro wiri yerete uni parámi ḡundo Judia mira ŋuya wiri yereró. Asa ko eneḡo kuma uniyómbó Yerusalem ḡuno kunditero unipare sopo yereyanḡurí. §§ **24:23:** “kuma unindoro sopo-sopo uni” ŋuko Rom uni ka, enendo kuma uni 100 sopo yereró. \*\*\* **24:24:** “Kristo” ŋuko Anutuko rokóḡoní mahero wiri yerete uni parámi horé tunoḡaró ŋu. ††† **24:25:** “otete roneneḡowí” ŋuko Anutuko nore rokó yiriní noreḡo murínani eneḡo murí howeyote.

## 25

### *Polko wiri yerete uni Festus tonjimo kanjaró*

<sup>1</sup> Asa Festus\* ñu Judia mirako mahiníqota kosa naru kapusa kini tiní Sisaria yendé rotoro Yerusalem oró. <sup>2</sup> Oní o qa-qa unindoro tapá uni kumimboya Juda koro uni pará-parámboya eneno uyaro Pol mande kho inoyañgurí. Ene kondé eneya ñandiro yañgurí, <sup>3</sup> “Keto noreño metéñoya uni ñu ri Yerusalem areweya.” Ñunde yañgurí, dokoro kheko sóqero, Pol uratoka khumoní, yero tañgurí. <sup>4</sup> Asa Festusko mande topé yaró, “Pol Sisaria ñuno kusi-kusi yano yote, ko naru tukuni ta neneñombo Sisaria uwano. <sup>5</sup> Ñunde ñuro tapá uniye muko noya uwato. Ko uni ñuro quhuríño ka yote tiníqo, asa enendo rero mande khono rotowaño.”

<sup>6</sup> Festus eneya yotoro naru kande sañiyoro kapusape ma kande irisa ñunde rotoro Sisaria uró. Uní sarañoníqo, mande kho inowero yakutímo† kunditero yimiraró, Pol re mahi qembe, yaró. <sup>7</sup> Ri mahiní Juda uni Yerusalem rotoro umbungurí qundo wuririyoro mande quhurí yero sañgawañgurí. Quko mandeyembo muri hamó wisiyowero mepémo kini.

<sup>8</sup> Asa Polko mandeye topé ñande yaró, “Nondo o piyimi ka kama tanowó. Nondo Juda unindoro

---

\* **25:1:** “Festus” ñuko Rom koro uni ka, enendo Rom koro wiri yerete uni parámi kusunoyómo yotoro Judia mira ñu wiri yereró.

† **25:6:** “mande kho inowero yakutí” ñunde quño ronda-ronda unindo ronda-ronda mande meté yeweya, ñu nongo nanje mandí wimbu moré.



hutuño mande qu kama karójanowó, ko Ya Surumínani<sup>†</sup> kama roworemanowó, ko Sisa<sup>§</sup> mandí kama wendaqanowó.”

<sup>9</sup> Yiní Festus ñundo Juda uni meté yerewero Pol ñande oseseyaró, “Ke date ñote, meté oyika nondo o quhurí ñaro Yerusalem ñuno ñowanope ma kini?”

<sup>10</sup> Polko ñande yaró, “No itaka Sisa koro ya ñano nanje kañewe mande kho ñu ñoweya ñuro yeteno. Ya meyowo ñuno kañewero mepémo kini. Ke ñande ñote, noko Juda uniko ñuno o piyimi ka kama tanowó. <sup>11</sup> Quko no oka khumowero guro tanowó tiníqo, meté nuri khumowano. Quko kota mande yero no norero mande khono norototenjo tiníqo, asa uni kato norero kandeyemo rotowero wimbí moré kini. Nondo Sisa nekowe ronǵaru nereweya.” \*\*

<sup>12</sup> Ñunde yiní Festus koya eneño ño-ño uniyómboya epe mito-mito tero ñande yaró, “Ke Sisa nekote. Ñunde ñuro eneno oweya.”

### *Festusko Pol koro sowo mandeyó ñu yero Agripa miraró*

---

<sup>†</sup> **25:8:** “Ya Surumí” ñuko Anutu koro ya qu, ñunoko Juda unipareto Anutu koya huruwowero guro hu-hariri teyangurí.

<sup>§</sup> **25:8:** “Sisa” ñuko Rom koro wiri yerete uni parámi ñu. Rom unindo mirane-mirane wini soso sopo yereñgurí. \*\* **25:11:**

Ñu naruko ñuno Rom uni soso, Pol ñunde qembe, ñande meté yewanjo, ko Rom koro wiri yerete uni parámi Sisa ñundo mande khoye ñoweya. Asa mande ñunde yewanjo tiníqo, ronda-ronda uni meywombo mande kho ñowero mepémo kini.

13 Imemongo ta wiri yerete uni ka, owí muko Agripa,†† koya kuwí Berinaiis koya Sisaria mahero Festus koya naru meté yariyó. 14 Iriisa nju Sisaria yendémo nuno naru piru yariyó, nunde njuro Festus koya wiri yerete uni njuya Pol koro sowo mande njuro epe mito-mito tariyó. Festusko njande yaró, “Komo Feliksiko uni ka rotoní kusi-kusi yano yora. Itaka yote. 15 Komo no Yerusalem nuno owé o qa-qa unindoro tapá unindoya Juda koro uni kembé-kembéyembo mande kho inoro njande kira nerenjuri, ko meté Pol urato khumoweya.

16 “Mandeye topé yanowó, ‘Noreko Rom, noreño murínani njandiro, uni ka kina kama urato khumoweya. Kini, koretero uni njundo danimbo mande kho inoyotenjo guro tonjeyemo kanjero mandeye topé yeweya.’ 17 Asa ko uni pará-pará njundo nono mahigo, mondó kama yoranowó. Kini, sarañoníqo mande kho inowero yakutímo†† kunditero uni nju re mahi qembe yanowó. 18 Ri mahiní enenjo sangirínjo njundo kanjero mande kho inoyanjuri, guko o piyimi taró njuko o enesó nanje. Komo o njunde guro kama inoyanowó. 19 Kini, enenjo yambo haririyembo muri yero uni ka khumaró qu, owí muko Yesu, njuro kiro kuma yeyanjuri. Polko uni khumaró njuro, tonj yote, yaró. 20 No mande muri nju seqanowó, guko

---

†† 25:13: “Agripa” njuko Herot koro sowe qu ka. Enendo Rom koro wiri yerete uni parámi kusunoyómo yotoro mira ka Juda uniparetoro miraye sumeyo qu sopo yereró. †† 25:17: “mande kho inowero yakuti” njunde quno ronda-ronda unindo ronda-ronda mande meté yeweya, nju nonjo nanje mandí wimbu moré.

no ɲu wisiyowero mepémo kini. Asa ko nondo oseseyanowó, ‘Kepe meté Yerusalem oyika nondo o quhurí ɲuro ɲuno inowano?’ yanowó. <sup>21</sup> Quko Polko yaró, ene kusi-kusi yano yowero inote, ko imemonɲo wiri yerete uni parámi horé enenombo mande ɲu ronɲaruwoweya. ɲunde ɲuro nondo kusi-kusi yano yoní yanowó, imemonɲo nondo asáɲowe Sisa ɲuno oweya.”

<sup>22</sup> ɲunde yini Agripako Festus miraró, “No nenenɲo nanɲe uni ɲu inowero inoteno.”

Yini yaró, “Kuyepo keto meté inoweya.”

<sup>23</sup> Asa saraɲoníqo, Agripa koya Berinaiis koya o nakayá qambu tero kuma unindoro uni kembemboya yendé uni pará-parámboya huru-huru yano mahenɲurí. Mahi Festusko yini unindo Pol re mahenɲurí. <sup>24</sup> Mahi ɲande yaró, “Wiri yerete Uni Agripa, ko ye uni soso noreya yoteto qu, ye uni ɲa qeni. Juda unipare soso, Yerusalem yotenɲo quya ɲano quyako uni ɲaro osese nerero kondé nekoyanɲurí, ‘Uni piyimi ɲunde qundo yowero mepémo kini.’ <sup>25</sup> Quko nondo qeneteno quko ene oka kama taró ɲuro tero kama khumoweya. Quko enenombo wiri yerete uni parámi horé ɲu nekoní ronɲaruwoweya. ɲunde ɲuro tero nondo mande kusiyoro asáɲowe toneweya. <sup>26</sup> Quko nondo enenɲo mande date nakayáɲowe uni paráminemo owero quro kama inoteno. ɲunde ɲuro, nondo uni ɲa yeno re maheteno, ko Wiri yerete Uni Agripa, keno ɲuya re maheteno. Nore soso enenɲo murí seqatoqota nondo mande hamó ka meté nakayáɲowano. <sup>27</sup> Dokoro mande ka kama

yero kina kusiyoro asáñowano tiníqo, ore piyimi howeyowano.”

## 26

### *Polko mande yesoworo Agripa miraró*

<sup>1</sup> Asa Agripako Pol miraró, “Ke keño mande qu ye.”

Nunde nuro Pol kandí hokoro mande nande yaró, <sup>2</sup> “Wiri yerete Uni Agripa, ino. Itaka no tonjengemo kanero Juda unindoro mandeye soso topé yewano. Nundiro puriño ka reteno. <sup>3</sup> Hamó, keko Juda uniparetoro muriye injomukote, ko o kumi nuro kiro kuma yeyotenjo nuro injomukote. Nunde nuro nande osese kereyoteno, mandene na injoya waka ta ma piyiminowero.

<sup>4</sup> “Juda uni soso nundo khe u-une, asa no miranemo simó yorano qu nonjo yate Yerusalem nuno yoranowó quro injomukotenjo. <sup>5</sup> Naru piru no ino nunoyanğurí, ko enendo nunğurí tiníqo, nene muríne meté yewanjo. Nande injoyotenjo, ko noko Farisi unindo\* otete qu howeyano. Wini nundo noreño hutunjo mande† okeyá ta hamó horé howeyotenjo. <sup>6</sup> Ko itaka komo Anutuko usinanimboya mande ka kusiyaró quro no mande khono kaneyoteno. <sup>7</sup> Norendo wini qu 12 nundo kosano suwono Anutuko mande kusiyowí riní o

---

\* **26:5:** “Farisi uni” nuko unindoro huru-huru ka Israel mirako nuno yanğurí. Enendo Anutu koro hutunjo mande nuro okeyá ta howero uniparetoro tonjeyemo owéye parámi tanğurí. † **26:5:** “hutunjo mande” nuko komo suki Anutuko Sainai purímo Moses inoní Israel unipare yunaró. Mande nuko Juda uniparetoro yoto-yotoye soso sopoyaró.

meté mu tunoqeweya njuro injoro soporo enejo khoyó teyoteto. Asa, Wiri yerete Uni, injo. O meté mu tunoqeweya njuro nange Juda unindo mande kho nunoyotengo. <sup>8</sup> Do karo ye kato Anutuko uni khumaró mu riní otoqaró njuro injondataqeyotengo?

<sup>9</sup> “Komo no nenenjombo o qambu tero, Yesu Nasaret nonjo njuru owí rewe umbuweya, kondé ye injanowó. <sup>10</sup> Ko no Yerusalem njuno njunde tanowó. No o qa-qa unindoro tapá uni<sup>†</sup> nonjo wimbu rero unipare meté horé njuru yorerero kusikoko yorotanowó. Ko mande khono kanjiko, uni pará-parámbo, yurato khumowanjo, yangurí quuno no njuya njunde yanowó. <sup>11</sup> Ko naru parámi nondo huru-huru ya<sup>§</sup> enemo-enemo seqa yerero yondoworo enendo Anutu yesaránjowero kondé yimitoyanowó.\*\* Hamó, nondo eneya newonde sanjiri nange tero yendé sewemo njuno njuya yohowero o piyimi te yunoyanowó.

<sup>12</sup> “Naru kano o njunde tewero quuro khendo unowó. Komo o qa-qa unindoro tapá uni nonjo wimbu rewe Damaskus yendémo njuno asá niri unowó. <sup>13</sup> Asa Wiri yerete Uni Meté, injo. Kosa keweroko khewore uroqo no sambo sanjano hiyó kako kosa koro hiyó takaró qu qenenowó. Hiyó njuko noya uni noya mahetowó njuya noreno

---

<sup>†</sup> **26:10:** “o qa-qa unindoro tapá uni” njundo Ya Surumímo hu-hariri soporo ronda-ronda huru-huru owí muko, “Sanedrin,” ye nekoyanjurí njuru sopoyaró. **§ 26:11:** “huru-huru ya” njuko Juda uniparetoro ya parámi mu. Sapat naruko njuno hu-hariri tero Anutu koro mandí weyoyi injoro hariri teyanjurí. **\*\* 26:11:** Unipare njundo Anutu yesaránjowanjo tiníqo, Polko meté mande khono yorotoweya.

parámi hiyóqaró. <sup>14</sup> Nore soso rokaráŋoro nokono umbutowó, ko no maŋgo ka Hibru mandeko injanowó. Nande yaró, ‘Sol, Sol, ke do karo no rambaruru nereyote? Keto tisi ka pitoro keŋo ŋuya rambaruru teyote.’

<sup>15</sup> “Ko nondo yanowó, ‘Uni Parámi, ke dani?’

“Ko Uni Parámimbo yaró, ‘Noko Yesu, keto no rambaruru nereyote. <sup>16</sup> Quko ke otoqoya kaŋe. Nondo ke neneŋo kho qu kunowero keno tunoqeteno. Ko neneŋo o qu itaka qenete ko imemoŋgo witú kerewano ŋuro yesowoweya, ŋuro rokó kereteno. <sup>17</sup> Nondo keŋo wini qu kandeye moŋgo ko uni wini meyowo†† kandeye moŋgo ŋuya ta kerewano. Nondo asá kerewe toŋero <sup>18</sup> eneŋo toŋeye ri hiyóqiní huriri rotoro hiyómo owaŋgo, ko Monimbu koro wimbí rotoro Anutuko owaŋgo. Nunde ŋuro tero nondo quhuriye se rotoweŋo, enendo unipareto injonduu nerero meté horé yoteŋgo ŋuya yuri.’

<sup>19</sup> “Asa, Wiri yerete Uni Agripa, ino. No sambo koro kapo qenenowó ŋu kama wendaqanowó. <sup>20</sup> Kini, no koretero Damaskus yendémo ŋuno, ko imemoŋgo Yerusalem ŋuno, ko Judia mira koro yendé soso ŋuno, ko uni wini meyowo quno ŋuno ŋuya mande yesowanowó. Nande yimiranowó, ‘Ye newonde rohoré teya Anutuko oyi, ko newondeye rohoréŋaŋgurí qu oteteyewore witú yiri qembe.’ <sup>21</sup> Nju murí ŋuro tero Juda unindo, uratoka khumoní, yero Ya Surumímo‡‡

---

†† **26:17:** “uni wini meyowo” nunde quko Juda unipare kini qu naŋge. ‡‡ **26:21:** “Ya Surumí” ŋuko Anutu koro ya qu, ŋunoko Juda unipareto Anutu koya huruwowero quro hu-hariri teyaŋgurí.

nondowanḡurí. <sup>22</sup> Nunde ḡuro Anutuko samaka nereyoní, yate arero itaka ḡa. Asa ko no ḡano kaḡeteno, ko no uni owéye moré kini quya uni pará-pará quya soso mande yesowoyoteno. Ko mande yeyoteno ḡuko komo ye-ye unindoya Moses§§ koya yaḡurí naḡe. <sup>23</sup> Nande yaḡurí, ‘Nu Kristo\*\*\* ḡuko kowe surumí korowoweya, ko eneko uni soso uni tapu koḡgo otoḡowaḡo ḡuro korete-korete qu yoweya. Nundiḡo naḡe enendo eneḡo winiyómboya uni wini meyowo ḡuya hiyó ḡuro yesowoweya,’ ḡunde yaḡurí.”

<sup>24</sup> Polko mande yeyoní Festusko kondé ḡande yaró, “Pol, keko kape! Keḡo iḡo-iḡo parámi ḡundo koriní kape-kape teyote!”

<sup>25</sup> Yiní yaró, “Festus, ke uni meté, noko kape kama teteno. Kini. No hamó yeteno, ko iḡo-iḡo ḡako kape qu kini. <sup>26</sup> Wiri yerete uni ḡuko o soso ḡuro iḡomukote. Nunde ḡuro nondo eneya taḡo yeyoteno. No ḡande iḡoteno, ko o soso ḡu sóḡero kama tunoḡaró. Nunde ḡuro ene ḡene iḡomukaró. <sup>27</sup> Wiri yerete Uni Agripa, kepe ye-ye unindo mande qu iḡondutuwoyote? No iḡoteno, keko iḡondutu teyote!”

<sup>28</sup> Ko Agripako Pol oseseyaró, “Date koro? Naru tukuni ta ketope no nori Kristen uni††† tewano, yero iḡotepe?”

---

§§ 26:22: Komo suki “Mosesko” uni parámi tero Israel unipare sopo yereró. Anutuko Sainai purímo hutuḡo mande inoní mande ḡu rondaḡe unipare yunaró. \*\*\* 26:23: “Kristo” ḡuko Anutuko rokóḡoní mahero wiri yerete uni parámi horé tunoḡaró ḡu. ††† 26:28: “Kristen uni” ḡunde ḡundo Kristo iḡondutuworo huru-huruko ḡuno huruwaḡurí. (Asá yerewí Uni 11:26 weyo ḡembe.)

<sup>29</sup> Yiní yaró, “Naru tukuni ñundiro meté, ko naru piru ñu ñuya meté. Quko nondo Anutuwoore ñande hariri teteno, ko keya uni soso itaka mandene inoyotenjo ñuya no qembe tewanjo. Nunde ti qembe, quko utó kondé qundo kusi neretenjo qu, ñu ma rewero.”

<sup>30</sup> Asa wiri yerete uni ñuya Rom koro uni kembé ñuya Berinai ko uni soso yanğurí mu otoqo kañanğurí. <sup>31</sup> Kañero mirako uro epe mito-mito tero ñande yanğurí, “Uni ñu oka kama taró, ñuro tero meté kama khumoweyape ko kusi-kusi yano kama yoweya.”

<sup>32</sup> Ko Agripako Festus miraró, “Uni ñundo Sisa kama nekoníqo, meté keto roti toñeweya.”

## 27

### *Polko wanğowore Rom uyarewero uyará*

<sup>1</sup> Asa wiri yerete uni ñundo ñande yaró, ko nore Itali mirako\* uyarewato, yaró. Nunde ñuro enendo Pol koya kusi-kusi uni kumimboya yore kuma unindoro sopo-sopo uni karo kandímo yorotanğurí. Sopo-sopo ñuro owí muko Julias, ko ñuko Okastus† koro kuma unindoro kopo-kopo qu ka. <sup>2</sup> Noreko wanjo ka Atiramitium yendé monjo quno otowó. Wanjo ñuko Esia mira parámimo yendéne-yendéne windi tapéwore uyarewero taró. Asa, nore oro roto toñetowó.

---

\* **27:1:** Rom yendé parámi ñu “Itali mirako” ñuno yora. † **27:1:** “Okastus” ñuko Rom koro wiri yerete uni parámi horémboro owí ka. Nuro murí muko ñandiro, wiri yerete uni parámi horé. Kuma unindoro kopo-kopo kanatape ma irisa nanje wiri yerete unindoro owí ñu meté korowanğurí.



Arisitakus, uni Masedonia mira nongo qu ka, Tesalonaika yendé nongo nu noreya uyaretowó.

<sup>3</sup> Sarañoní Saiton yendémo nuno oro wanjo kusiyatowó. Juliasko newonde metémboro tero Pol rotoní yendémo oní topé-topémboro wutuwanjurí. <sup>4</sup> Asa Saiton rotatoqo, matúmbo wanjo kikinoyaró. Nunde nuro Saipras noko mosowí huwówore uyaretowó. <sup>5</sup> Nu nonjo windi karóñoro Silisia mira koya Pambilia mira nuno windi tapéwore uyareyate Lisia mirako Maira yendémo nuno oro kusiyatowó. <sup>6</sup> Nuno kuma unindoro sopo-sopo uni nu wanjo ka Aleksandria nonjo maheró qu Itali mirako uyareweya nu seqayate qenero nuno otowó. <sup>7</sup> Nu nonjo uyareto matúmbo wanjo kikinoní koweyumu teyuri, yate-yate naru kumi kini tiní Nitusi yendé tanjímó mahetowó. Matúmbo kikinoní anduwore uyarewero mepémo kini. Nunde nuro Kiriti noko mosowí huwówore Salamone yendé tanjímó uyaretowó. <sup>8</sup> Noko mosowí huwówore koweyumu teyuri, yate-yate yendé kano mahetowó, nu nande ye nekoyanjo, “Yendé Sóqewí Meté Qu,” yeyanjo. Nuko Lasia yendé tanjímó.

<sup>9</sup> Asa windi sanjano uyaretowó quno nundiro naru qambu nunde kini taró, ko naru Juda unindo kundinji koro naruye parámi<sup>‡</sup> nu komo kini taró. Ko windi toqe mahero nu piyimi

---

<sup>‡</sup> **27:9:** “kundinji koro naruko” nuno o qa-qa unindoro tapá unindo Ya Surumímboro Wembó Surumí Horémo oro o qa-qa tiní Anutuko Juda unipare soso koro quhuriye se rotaró. Nuko Septemba ma Oktoba nuno tunoqeyara.

horé taró, ñunde ñuro Polko ñande yimiraró,  
<sup>10</sup> “Ye uni, no ñande inoteno, ko nore watí  
 uyarewato tiníqo, o piyimi horé tunoqeweya.  
 Situwi, waŋgo, noreño yoto-yotonani ñuya soso  
 piyo teweya.” <sup>11</sup> Ñunde yaró, quko waŋgo sim-  
 burímbo mande enesó yiníqo, kuma unindoro  
 sopo-sopo uni ñundo waŋgo simburímbo mandí  
 injaró. <sup>12</sup> Yendé sóqewí ñuko, matú parámi naruko  
 ñuno waŋgo yendémo ñuno meté yowero mepémo  
 kini. Ñunde ñuro nore qambu qundo Finiks  
 yendémo oro matú parámi naruko ñuno yendémo  
 ñuno yowero inañgurí. Finiks ñuko Kiriti noko  
 mosowímbo yendé sóqewí qu ka. Ñuko matú  
 naruko ñuno meté sóqewero.

*Matú parámi kato waŋgo kikinjaró*

<sup>13</sup> Asa yate matú ka wimbí parámi kini tuno-  
 qiníqo, yendé sóqewí ñuno uyarewato, yero inoro  
 waŋgo orosoyero Kiriti noko mosowímo ñuno  
 windi tapéwore uyaretowó. <sup>14</sup> Naru tukuni ta  
 yate matú parámi horé ka “Yurakulon” yeyango  
 qu, ñu Kiriti nonjo umburó. <sup>15</sup> Matúmbo waŋgo  
 kikinjoníqo, simburímbo eneño ino-inoyó howe  
 uyarewero mepémo kini tero rotoní matúmbo  
 waŋgo riní wimbo-wimbo uyaró. <sup>16</sup> Ñunde  
 uyareyate Kauta noko mosowí huwówore uyaro  
 nore koweyumu tero waŋgo tomó ta ñu wosato  
<sup>17</sup> waŋgo parámi quroko areró. § Ariní utó kumi  
 siyoro waŋgo parámi ñu wiwiyatoka kondériní,

---

§ 27:17: “waŋgo tomó ta” ñuko, naru rokógoro sim-  
 burímbo utómbo kusiyoro waŋgo parámi huwómo windi sanjano  
 wosoyañgurí. Quko matú parámi ñunde quko huwoyoníqo, tomó  
 ta ñu wosoro parámi quroko kusiyañgurí.

yero taṅgurí. Yate matúmbo kikiṅoní waṅgo Sirtis ṅuno windi tapémo tokoṅowero yero iṅoro tuwi parámi ka utómbo kusiyoro sono quroko rotaṅgurí.\*\* Rotoyiqo, matúmbo kina kikiṅoní wimbo-wimbo uyaró. <sup>18</sup> Matú koya windi koya nore kondé pito niriní uya mahe teyatowó, ko saraṅoníqo, situwi se raṅi windi quroko uró. <sup>19</sup> Ko naru kapusayómo ṅuno kandeyembo waṅgo koro kho tewero qu se raṅi umukaró.†† <sup>20</sup> Naru píru kosa tutu kama qeneyato matú parámi ṅundo naṅge maheyoní, nore rambaruru tewe teteto, peka, ye iṅatowó.

<sup>21</sup> Asa naru parámi uni ṅundo o kama neyuriqo, Polko keweroyemo kaṅero yaró, “Ye uni, komo Kiriti ma rotowero yimiranowó, quko kama iṅaṅgurí. Mandene iṅaṅgurí tiniqo, kama piyo tewango. <sup>22</sup> Quko itaka ṅande yimiroteno, kondé kaṅi, ma sorewero. Noreko ka kama piyo tewato. Waṅgoko naṅge piyo teweya. <sup>23</sup> Noko Anutu koro uni qu, no eneṅo khoyó teyoteno. Suwo ṅano Anutu koro sambo simómbo†† no taṅgenemo kaṅero <sup>24</sup> ṅande nimira, ‘Pol, ma sorewero. Keto Sisa koro mande khono ṅuno kaṅeweya. Ko iṅo, uni soso keya waṅgo quroko yoteṅgo ṅuko, Anutuko keṅo iṅoní uni ṅuya kama piyo tewango.’ <sup>25</sup> Ṃunde ṅuro ye kondé kaṅi. No Anutu

---

\*\* **27:17:** “tuwi parámi” ṅunde sonono rotoyikata tuwipo waṅgo kondé wosoní waka ta uyarewero mepémo kini. †† **27:19:** Ṃunde raṅaṅgurí, waṅgoyómboro quhurí ṅuko yowosoní sono quroko rambaruru rewaṅgo koro. †† **27:23:** “sambo simó” ṅuko komo suki-suki Anutuko unipare kama yoriní tunoqi sambo simó yondowaró. Ko itaka eneṅo sunará teyotengo.

inondutuwoe o tewero no nimira nunde nanje teweya. <sup>26</sup> Quko nore khenjengoro noko mosowí kano tokoŋowato.”

*Waŋgo ŋu piyo taró*

<sup>27</sup> Asa naru 14 nunde rotoro matúmbo waŋgo kikinoní Atiria koro windiwore uyatowó. Uyareto naru 14 quro suwo keweroko ŋuno waŋgo koro kho uniyó, windi tapémo maheteto, yero inañgurí. <sup>28</sup> Ene wondo ka utómbo kusiyoro sono quroko raŋoro sono meréño rokóñaŋgurí, ko meréño muko mita 40 nundiro taró. Ko waŋgo ŋu songa ta uyariniqo, wondo pitu ko rañaŋgurí muko mita 30 nundiro taró. <sup>29</sup> Nunde tiní sasaro tero wondo parámimo tokoŋowato, yero inoro ákaŋŋ nimí kini waŋgo kundósina raŋoro kosa waka raŋowero ŋuro hariri taŋgurí. <sup>30</sup> Kho uni nundo mondó ta waŋgo rotowero ye inañgurí. Asa ko enendo nore kaná nerero nande yaŋgurí, “Nore áka waŋgo kembésina waŋgo tomówore raŋowe teteto,” yero waŋgo tomó ŋu utómbo kusiyoro raŋi windi saŋano uró. <sup>31</sup> Quko Polko sopo-sopo unindoya kuma unindoya yimiraró, “Úni ŋu waŋgo parámimo nana kama yuriquo, asa yendo rambaruru takawero mepémo kini.” <sup>32</sup> Nunde ŋuro kuma unindo waŋgo tomó ta ŋu re utóño toŋoyi kina uró.

<sup>33</sup> Kosa raŋowero tiniqo, Polko meté uni soso o newaŋgo ye yimiraró. Nande yaró, “Naru 14 nunde kini tiní yendo sasaro tero o newero quro

---

ŋŋ 27:29: “áka” ŋuko o aini ka, quhuriyómbo waŋgo noko windi quroko yote quno ŋuno kekaŋañgurí.

rukusuworo o kama neyaŋgo. <sup>34</sup> Quko itaka kondé yimiroteno, o ni. Njuko samaka yereweya. Yeko rambaruru ka kama rewaŋgo.” <sup>35</sup> Njunde yeroqo, toŋeyemo bret rero Anutu yuŋganaŋoro romboŋero naró. <sup>36</sup> Niníqo, uni soso qeni newondeye rukisoyoní ene ŋuya o kumi siyoro naŋgurí. <sup>37</sup> Nore waŋgo quroko yatowó ŋuko uni 276 ŋundiro yatowó. <sup>38</sup> Kowe o mepémo ne rotoro wit rotaŋgurí ŋu se sonono raŋgurí, ŋunde tatoka waŋgo ŋu taŋo tiní, yero iŋaŋgurí.

<sup>39</sup> Kosa raŋoníqo, noko qeneŋgurí, quko mira ŋu kama iŋaŋgurí. Ene yendé sóqewí ka quroko oro sotama ka meté quno owero qeneŋgurí. Ko waŋgo ŋuwore oweya, yero iŋaŋgurí. <sup>40</sup> Njunde ŋuro áka koro utó qu soso toŋomukoro windi quroko ŋuno rotaŋgurí. Rotoro tesanga ŋuko waŋgo dawore kheŋgeŋwero sopoyote ŋuro utó ŋu orosoyaŋgurí. Orosoyero tuwí parámi matúmbo huwoyote ŋu hokoyi waŋgo kheŋgeŋoro windi tapémo uyarewero taró. <sup>41</sup> Quko kutaqemo naŋge uyaro sotama saŋano oro kembésina sorowoní windi toqe mahero kundósina uroní piyo taró.

<sup>42</sup> Ko kuma unindo kusi-kusi uni yurowero taŋgurí, windi saŋawore uyarero kina sorewaŋgo koro. <sup>43</sup> Quko kuma unindoro sopo-sopo uniyembo Pol kama khumoweya, yero iŋoro soré yiriní kama yuraŋgurí. Ko sopo-sopo ŋundo uni windi saŋawore meté uyarewaŋgo qu yimiraró, “Ye soreya uyaya nokono yurika.” <sup>44</sup> Ko kumi muko te puŋo se toworo ŋuwore uyarika ko kumi waŋgo piyo ta ŋuro sombé siyoya ŋuwore uyarero

tapémo uyareᅅgurí. Nᅅndiro tero uni soso meté windi tapémo mahēᅅgurí.

## 28

### *Polko Malta noko mosowímo yora*

<sup>1</sup> Asa nore meté tapémo mahero ᅅande iᅅatowó, ko noko mosowí ᅅuko, Malta, ᅅunde nekoyanᅅo.

<sup>2</sup> Unipare ᅅuno qundo o meté parámi nore te nunaᅅgurí. Sono umbuní nore kutiti tatoᅅo, kewá qaró ᅅuno kopo nereᅅgurí. <sup>3</sup> Nᅅnde tiᅅo, Polko te kambiní koporo se maheró.

Kewáko riníᅅo, sire piyimi ka te kambiní quroko kowí tiwi riní sorero Pol kandímo kiro porowaró. <sup>4</sup> Unipareto ᅅenero yanᅅgurí,

“Hamó peka, uni ᅅando uni uroní khumaró qu ka. Nᅅndiro windiko kama uroní khuma, quko murí roneneᅅowí quro anutu ᅅundo rotoweka toní yoní yero kama iᅅoyote.” \* <sup>5</sup> Quko Polko sire ᅅu re raᅅoní kewá saᅅano umburó, ko Pol rambaruru ka kama raró. <sup>6</sup> Unipareto sopo toᅅetero, eneko koᅅewero tetepe ma khumoro rokaráᅅoro umbuwe tete, yero iᅅanᅅgurí. Quko naru yate-yate oka piyimi ka eneno kama tunoᅅiníᅅo, iᅅo-iᅅoye rohoréᅅoro ᅅande yanᅅgurí,

“Nᅅuko anutu ka.”

<sup>7</sup> Asa noko mosowí koro uni kembé ᅅu, owí muko Pupilius, eneᅅo mira kutaᅅemo yora. Enendo norero yayómo oro meté ta sopo nereyoni

<sup>7</sup> Asa noko mosowí koro uni kembé ᅅu, owí muko Pupilius, eneᅅo mira kutaᅅemo yora. Enendo norero yayómo oro meté ta sopo nereyoni

---

\* **28:4:** Unipare ᅅundo anutuye enesó-enesó potoruku te yunoyanᅅgurí. Anutu kanata kato uni o piyimi tanᅅgurí ᅅuro kimoyó re yunoyara. Asa ko ᅅande ye iᅅanᅅgurí, ko anutu ᅅundo sire ᅅu riní Polko o piyimi taró ᅅuro kiró.

yato kosa kapusa ηunde rotaró. <sup>8</sup> Pupilius koro iwí kowí tiwí riní qonziriri tero eteyaró. Etiní Polko oro hariri tero kandí rero sañanimo riní meté taró. <sup>9</sup> Nunde tiníqo, se khumo uni ηu mirawore qu Polko mahiqo, yoriní meté tanğurí. <sup>10</sup> Nunde ηuro unipareto owénani hokañğurí. Ko imemoñgo nore wañgowore toñewero tatoqo, o soso nore ηuro tukuni teyato ηu se nunañğurí.

### *Polko Rom yendémo ηuno oró*

<sup>11</sup> Nore kombo kapusa quroko noko mosowímo ηuno yatowó. Asa imemoñgo wañgo kawore toñetowó. Wañgo ηuko Aleksandria yendémboro qu, ko matú parámi naruko ηuno yate noko mosowímo ηuno yora. Wañgo koro kembésinañgo kapo-kapo ka yora, ηuko anutu penzakara owéyari Kasitoru koya Poluks. <sup>12</sup> Asa toñeyate Sirakus yendémo ηuno oro naru kapusa quno ηuno yatowó. <sup>13</sup> Nju noñgo kheñgeñoro, yate Rekiu yendémo uyaretowó. Sarañoníqo, matú meté mahiní ko sarañoní ka Puteoli yendémo otowó. <sup>14</sup> Nju yendémo ηuno iñondutu uni toponani kumi yiyato enendo yiqo, eneya yato naru kande sañiyoro irisa ηunde taró. Naru ηu kini tiníqo, khendo Rom otowó. <sup>15</sup> Topo kumi Rom yañğurí qundo nore mahetowó ηuro iñoro kopo nerewero mahəñğurí. Kumimboko Ya Etewero Kapusa quno ηuno sopo nereñğurí, ko kumimboko Apius koro maketino ηuno sopo nereñğurí. Polko uni ηu yiyoroqo Anutu yuñğunañaró, ko newondí kondéraró. <sup>16</sup> Asa yate Rom yendémo otowó quno Rom koro sopo-sopo

unindo meté yi Pol enemata yano yaró, ko kuma uni kato sopoyaró.

*Polko Rom yendémo ηuno miti mande yesowaró*

<sup>17</sup> Asa naru kapusa ηunde rotoro Polko Juda unindoro tapá uni neko yiriní kopoyi ηande yimiraró, “Uni topo, nondo oka tero noreηo wini qu ka owéye rewe kama umburó, ko usi-sinanimboro oteteye ηu ka kama wendaqanowó. Quko Yerusalem ηuno unindo norero Rom uni kandeyemo norotaηgurí. <sup>18</sup> Rom uni ηundo mandene iηoro, ηuro urato khumowero mepémo kini, yero norotowero ye iηaηgurí. <sup>19</sup> Quko Juda unindo piyimiηoyiqo, nondo Sisako mandene roηgaruwoweya, yero nekanowó. Quko nondo sitú toponembo otete piyimi taηgurí quro mande ka kama yanowó. <sup>20</sup> Ŋu murí ηuro tero nondo ye yiyowero iηoro mande yunowero neko yereno. Nore Israel o meté horé sopoyoteto ηuro no utó kondé ηando kusi nereyote.”

<sup>21</sup> Ŋunde yiní miraηgurí, “Judia uni kumi kato keηo sokome ka kama nakayáηoro nimitoyango, ko topo uni kato Yerusalem nonηo keηo o piyimi taró quro piηa mande ka kama re ma-heró. <sup>22</sup> Quko keηo iηo-iηoke ηu maηgokepo yeka iηowato. Dokoro ηande iηoteto, ko yendé soso qunoko unipareto ηu wini usowo-sowo ηuro mande piyimi yeyotenjo.”

<sup>23</sup> Ŋunde yero naru ka eneya pitu ko huruwowero qu rokóηaηgurí. Tukú, ηu naruko ηuno uni qambu yayómo maηeηgurí. Ita saraηoní, yate suwo tiníqo, Polko mande rondaqe yunoro



Anutuko unipareyó wiri yereyote naruyó† nuro yaró. Kowe nande witú yereró, ko Moses koro Hutuño Mande nuya Ye-ye Unindoro mandeye‡ nuya Yesu koro yaró. <sup>24</sup> Uni kumimboko mandí inondutuwoyangurí, ko kumimboko kini. <sup>25</sup> Polko mande weña ka yiniño, uni nundo ino-ino enesó-enesó toworo tonewero tanğurí. Mande weña nuko nandiro, “Yuqa Surumímbo mande hamó ka ye-ye uni§ Aisaia mañgómo usi-sinanimó nande yaró,

<sup>26</sup> “Keto unipare nuko oya nande yimito,  
 ‘Yendo naru rokóñoro mande inoyotengo,  
 guko mande nuro murí kama inoyi ton-  
 daneyote.

<sup>27</sup> Dokoro unipare nundo newondeye komo kondéraró,  
 ko kusumboyembo meté mande kama inoyangurí,  
 ko toneye pokamañğurí.  
 Toneyembo oka qenewango koro,  
 ko kusumboyembo oka inowanğo koro,  
 ko newondeyembo mande murí inowanğo koro.  
 Ko nunde tero newonde rohoré tero nono mahi yorewe meté tewango.’

<sup>28</sup> “Nunde nuroko ye nuro inoyi, Anutuko uni rambaruru koñgo yoreweya, nuro piña mande

---

† **28:23:** “Anutuko unipareyó wiri yereyote naruyómo” nuno inondutu unipareko hamó Anutu kusunoyómo yowanğo.

‡ **28:23:** “Hutuño Mande koya Ye-ye Unindoro mandeye” nuko Anutu koro mande korete qu. § **28:25:** “ye-ye uni” nuko Anutuko mandí yunoní unipare yunangurí.

ηuko uni wini meywomo asáηoní tonjeró. Ko enendo kusumbo rewanḡo.” 29 (-)\*\*

30 Asa Polko ya kimaró quno ηuno yotoro uni soso eneno mahi o meté te yunoyoní kumima naru irisa ηunde rotaró. 31 Nu naruko ηuno uni kato kama kusiyoní Anutuko unipareyó wiri yereyote naruyó ηuro yesowaró, ko Uni Parámi Yesu Kristo†† ηuro mande rondaqe yunoyaró.

---

\*\* 28:29: Ino-ino uni kumimbo, wini 29 ηuya yote, ηunde ye inoyotenḡo. Wini 29 ηuko ηandiro: “Nunde yiníqo, Juda uni ηundo tonjero keweroyemo mandeto kuma teyangurí.” †† 28:31: “Yesu Kristo” - komo suki ye-ye unindo Anutuko uni ka rokóηoní mahero wiri yerete uni parámi horé tunoqeweya qu karo yangurí. Juda unipareto uni maheweya ηu, “Kristo,” ma, “Mesaiya,” ye nekaḡurí. Asa Yesu mahiní eneḡo unipareyó, “Kristo Yesu,” ma, “Yesu Kristo,” nanḡe ye nekaḡurí.

**Iyo New Testament**  
**The New Testament in the Iyo Language of Papua New**  
**Guinea**  
**Nupela Testamen long tokples Iyo long Niugini**

copyright © 2009 Wycliffe Bible Translators, Inc.

Language: Iyo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files dated 9 Oct 2020

eeccd6a2-c477-5b9f-9623-cf07dbead483